





詩稿八卷
文稿八卷

詩餘四卷

小山詩文全稿

涇東曹山藏板



序

人生而內有賢父兄之樂外有多
賢友之益姿雖下未有無所成者
故余即老而無成而於此未嘗不
深以自幸也余少從先君子受書
年十七先君子客館他郡所藉二
三良友晨夕風雨輔翼切劘以期



序

進於古故後雖別數千里或數年
余雖盡交當世知名之士而此里
閑二三良友時去來於心不能
釋余未成童即聞先君子稱里中
才子必曰願玉停王抱翼又聞玉
停与抱翼交若一人又余女兄夫
王蕙帶與二子交余從蕙帶所見

二子詩文雖未盡解知慕之余初
學為詩文二子亦見而賞之二子
者亦知余也稍長遂得与二子游
有所為即是正於二子先君子亦
以余與二子遊喜也抱翼尊甫与
先君子交以父執事先君子而長
於余十季余託輩行恒兄事之云

抱翼才氣俊逸於六經子史百家
二氏之書無所不讀一書輒有
以按是書之精而議論商榷於微
茫浩渺之際以立其說其意致超
邁避俗若浼不一接其耳目其有
所感則一發於詩放之為數萬言
歛之為一二韻要以力追古人而

後止余初從之遊見其所著銳意
欲與之並遊既久媿弗能及而竊
自以為能知抱翼也猶記抱翼與
蕙帶玉停輩聯吟社時余亦操筦
唱和凡刻畫景光雕鏤罔象直聊
以為寄當其銜觴劇論上下古今
俯仰悲來繼以痛哭旁觀者愕不

解其何故孰知其鬱勃於中有不
欲自得而已者哉已而玉停蕙帶
與余及唵社諸子咸取科第入仕
獸挹翼久困諸生再遊京師雖名
動公卿間卒詘於有司拂衣歸
而平昔舊遊殆無一在里門者素
不妄交遂漠然無所与接日扃戶

著書無仕進意余常歎挹翼不遇
我輩之耻也歲在戊申

憲廟苟求才俊有以挹翼名
聞者特

召見由諸生授縣令三更劇邑遷
佐漳州以疾歸今

上改元以蒲州府同知再起未幾

遷知成都府為政以儒術飾治廉
介愷悌所在民德之如慈母而抱
翼已老矣季七十求退未允率於
官其子景元梓其詩文若干卷求
序於余、嘗念自少得多良友為
幸然所交者類多十季以長少亦
六七年倘余幸而不先朝露則余

老而十季以長者當先我凋謝將
生死之感索莫之傷必有大難為
懷者以此為無涯之慮焉今抱翼
之沒二年而與余別已十有餘季
矣前沒一季自成都寓書有引疾
之志余亦私擬歸里與二三老友
重理吟社追少季時歡聚并互訂

生平所著其樂當更何如乃遽哭
其死序其文而余之踈猶未卜也
不禁重自傷已抱翼之行事美政
玉停狀之既詳即其詩文亦豈藉
余以傳用叙交契始卒以為之序
以志余之感慨焉
乾隆十有一年歲次丙寅六月同

學弟沈起元撰



舊序

詩至今日而極盛矣海內文房之士類皆研討聲律雕繪篇章自命風雅子弟自勝衣以上即無不懷鉛吮墨朝諷暮吟斐然有綴述之志然作詩者日多而詩之道益以不振大率學唐者流於膚學宋者入於俚求其負卓立傑出之才刻意以古人自期體高意遠如青松之拔灌木白玉之暎塵沙者固未可多見也吾友王子抱翼曠世逸才深沉篤學覃精經史分日程課窮探力取未嘗畧刻去書作爲詞章根本於三百篇浸淫於漢魏六朝其於三唐則沉酣韓杜而間出入於昌谷玉溪之間至其五言遊覽諸作蕭閒澹遠復於韋柳有神合焉

其意直欲追踪古人而非猶夫近今之爲詩者也吾州
文才之盛莫若太原王氏抱翼與其兄稷亭太史族屬
爲長自少並擅才名兄弟互相摩切自爲師友禊亭已
擢甲科入翰苑而抱翼年近強仕猶不得志於場屋故
其學益深其詣益邃蓋不至於古之作者不已也所親
屢招之入都而貧不能辦裝遂巡未應吾知抱翼之志
蓋深遠矣使其遊於長安如唐人之挾行卷求知已者
當有所不屑然人所驚異者必在乎世之所少譬諸鳳
皇芝草賢愚皆知爲美瑞又何必負劉勰之書碎子昂
之琴始可以騰聲於京國哉癸巳秋九月同學友弟唐
孫華頓首拜撰昔年八十

贈詩

附

瓌寶積瑤圃名材出鄧林我昔游京師同志合朋簪

姜查才最雄

西溟夏重

風標並敲欵湯吳矜綺麗

西厓西齋霞

裾異織絳惠子善用少

研谿

惜墨常如金宮生慣用多

恕累斛傾奇琛而我愧黥淺異苔托同岑聯轡或朝

詠刻燭多宵吟有花輒共賞得酒無孤斟自從歸閭

里曠隔如商參獨倡無與和寂若秋蟬瘖疲暮逢王

子蓬藿肯見尋三復小山詩知君用意深托志必師

古吐詞非諧今孤桐生律呂泠泠聞玉琴大雅久不

作由茲暢元音如聆鸞鳳嘯蕩彼鼉蠃淫昔游各鄉

縣蹤跡異飛沉今適同里閑時時得披襟斯文紹前

哲非君諒誰任我老久衰退斂衽徒傾心努力期千載榮名非所欽

舊序

昔詹事元禮自誇門世七葉之中爵位蟬聯人人有集沈隱侯亦謂江左以來文才相繼未有若王氏之盛今以吾宗太原觀之未知與古人何如而隨珠荆玉人各擅長不特相門多才逮於羣從不少大雅閎博之士若小山先生者尤可謂之傑出者已先生少稟異才落筆妙天下未弱冠即以能詩名與仲兄禊亭先生有雙鳳之目既而沉浸含咀益肆力於古人沿源溯流挾其闡奧陶鎔醞釀而出之而其體亦屢變始則才情橫溢出入太白長吉之間繼而高躡漢魏兼馳杜韓房中饒吹之篇宮體玉臺之詠亦時有之邇年刊落藻華漸歸沖

淡一以盛唐爲宗蓋每變而益上如此而先生猶方進而未止也先生於武屬序爲尊以犬馬之齒折輩行與周旋辱過論文出其近藁見示武受而讀之大抵標格清妍風神逸秀如東家之子不假粉朱姑射仙人盡除煙火至於爐錘之妙吐屬之工取精用弘字皆芳潤而水文雲態出自天然靜觀微悟物尠遁情而鳥語花香得之象外言雖約而涵蓄有餘響將終而蘊味不歇至矣哉先生之於詩其殆天授也已年來數踏省闈不遇適京華親舊寓書相招將理裝北上夫天之生才必非無意故豫章不屈於朱儒瑚璉必登諸清廟禊亭先生旣以湛深績學珥筆於承明著作之廷先生珠玉淵海才名相埒豈菰蘆中人乎語云馭二龍於長塗又不僅吾宗之盛事也矣康熙癸巳且月宗姪孫吉武拜識

舊序

家小山先生詩未弱冠即爲宗老汲園伯所推許風骨
超然拔俗殆謫仙後身予遊燕時錄置篋中代呈之大
司寇新城公公咨賞以爲秀絕昔公嘗以使事之嶺南
見南海山水猶謂奇而不秀獨以許蜀之峨眉玉壘然
則公之所稱秀者何如哉而先生且不自滿也癸未歲
乃酣寢於少陵變爲雄壯予嘗題之云無心拾香草有
力掣鯨魚蓋實錄也邇年所造益深脫棄形似獨標神
韻偶以戊巳二年橐垂示并命點次退而讀之深沉高
雅不主故常汲園伯今已矣使新城見之更不知如何
標舉也謹書數語以識景仰之意云庚寅春正五日族

孫慮拜題

先生詩凡屢變少年最近青蓮間雜以長吉轉溯源於漢魏窮瀾於杜韓蘇戊子以後日抄諸經義疏爲本源之學詩不多作漸歸平澹大旨以唐賢三昧集爲宗舊橐一千五百餘篇盡藏篋衍獨刊近橐二卷問世斯神龍之一爪也癸巳冬族孫慮又識

墓誌銘

世宗憲皇帝御宇厲精爲治重選守令間從翰林改授復慮科甲不足以盡天下才於下第舉子內擇其良且許同列得互保任復念天下才俊士必有抑伏不得與計偕者乃

詔諸郡守各舉有猷有爲有守者一人無論出身以名聞于是吾友王小山以諸生被薦起家而引

見卽授晉江劇縣則又自薦舉來小山一人而已君諱時翔字舉謨一字抱翼小山其號太倉州鎮洋縣人大父承爵明相國文肅公輩行也父珩字文叔號野水以仲子時憲貴贈翰林院檢討野水九子

君行五君年十三始就傅一歲而通四書易詩書
三經喜吟詩才俊逸傾里中老宿謂太白復生尋
以第一補博士弟子員博覽經史著書數萬言詩
歌樂府流播遠邇再遊京師公卿皆折節願交然
竟未得一遇君爲人脩潔視流俗若浼家素貧口
不及鹽米在里與王蕙帶恪顧玉停陳埽及余四
五人族子則秋涯遵宸交最密時爲文酒會高歌
長嘯意致蕭然出塵壒外人競以文學風雅推余
顧知君胸中磊磊有經濟略也雍正六年余守興
化適奉

詔當薦士遂以君應顧玉停在署余謂曰小山意重詞館

外吏非其好也雖然以經術潤飾吏治惟此君優
耳吾爲

國家擇才不復計小山素志矣玉停亦然之旣得晉
江當是時

上方振飭閩省積玩盡易守令有司急自見務彊幹而諱
慈祥而晉邑故險健好訟前令以英銳擊斷人至
訟庭無不股栗郡守以爲能君至則憮然曰此吾
赤子也忍以盜賊視乎昨

聖訓命我實心愛民敢忘之于是以一以寬和爲治每聽訟
旣判決呼兩造前諄諭之令各釋憾對揖階下歡
然而出訟日簡有負嶠者前令捕之不能得君命

一老卒持票往諭立至觀風整俗使寶應劉公按
泉委鞠疑獄二十餘輒報可謂人曰晉江長者治
事又何精敏也題其堂勤慎廉平以旌之鹽大使
以緝私誣良移從君治君每察其寃立出之制府
高公司鹽政心器之在晉不數月民德之如戴慈
母而郡守弗之能也力掎之調政和民數千訴府
乞留不得爭負斗米束薪鮭菜之屬置館門外出
則牽衣號哭有流交平糴米六千石新令不受代
邑中商漁船戶數百呼其衆曰王公飲晉江一杯
水安所得錢補虧折耶吾屬請分買納原價十日
而事畢瀕行傾邑祖送渡萬安橋三十里不絕政

和山僻君擒治劇盜小老斃之捕訟棍范斌宥其
死令感悔縣中益無事日引諸生講學於署東之
玉成堂未幾調甌寧建寧府首邑也君爲政一如
晉江民大悅初政和有虎患君馳牒驅之一夕遂
絕是歲隣邑蜚災甌境獨無人謂史傳所稱王公
兼之於是巡撫泰山趙公亦儒者與制府高公交
薦擢漳州府同知駐南勝南勝故蠻崗也山箐深
奧民族居其中一構釁數千百人爲黨訟而曲抗
不就捕手兵械死鬪吏不敢詰故新議移駐同知
彈壓時有賴唱者糾衆搶犯當捕治君檄示者三
遂親入山漳人素聞君名謂此必能活我者夾道

跪迎賴姓萬丁隨其族長房老出君爲宣德化陳
利害痛切開諭之諸賴感服未幾賴唱自縛至遂
繫之出往返六日行萬山中所至觀者如堵無不
屏息立君於是歎民雖獷可教也察所犯可原白
上官薄其罪尙民從此帖然歲除繫囚數人請暫
寧家君許之至期則皆至撫軍聞之曰此王丞儒
術之效也瀨子阮民葉楊煽亂君意緩之可一紙
定有急欲見功者輒張之遂奉嚴檄督兵弁夜入
山捕治事旋平然非君志也乃引疾歸無仕進志

乾隆元年

今上旁求廢員復有以君名聞者

特旨召見除蒲州府同知治永樂或言薦君者爲浙閩
制府高文良公也公不言然高公故知君者未幾
奉

特旨晉成都府知府府領州縣十六地邊左官吏好植
黨君凝然獨立以廉率屬持大體審機要上下翕
然信之錢價騰藩司榜示平價市爲之囂君方休
沐亟召成都華陽二令曰爲我謝方伯市當順民
情官爲之價錢益閉不出無寧時矣藩司悟趣撤
榜錢價尋平自雍正間民爲滿兵歲買穀萬石已
重累至是綠旂兵援以請君議滿兵不習賣買言
語文字與漢人殊故爲之購漢兵本市上兒卽一

丁在軍無父兄子弟可代者而必煩民乎事得寢制府欲徙涼州駐兵於成都主者欲拓成都滿城奪民居二千家圍之民恟恟君考故牘示藩司曰成都滿城故容駐防三千見駐兵一千五百尚虛其半無庸拓也但清駐兵所侵地出之足矣藩司如所議行乃止拓涼兵亦不果徙漢州某甲妻私隣乙而殺甲甲弟具控乙不承賂獄中盜引甲爲同盜見殺有司遽成讞然終不得甲尸甲弟疊控無聽之者君廉得乙有弟實共埋尸乃攝乙弟別訊之果得姦殺狀獲尸傷皆具乙與甲妻咸伏其辜新都陳現習與其從姊夫某謹一日某從現父

貸斗麥將渡河休于崖現潛往納大石橐中已某負橐以涉橐重踣於水石鎮之不復起現懼匿後縣令究石所自現不能辨然不得致死故乃坐現與從姊姦窮治之現不勝楚誣服君疑之及庭訊二犯皆唯唯然察其色若寃甚懼不敢言者君乃屏左右好諭之則張目相視哭失聲始以情告君惻然爲力白之出其死一郡稱神歲壬戌江南湖廣災撫軍奏請運米四十萬石以濟吳楚

上許之及檄下楚省委吏赴川領運江南米自足用不委員至撫軍檄州縣運送時兩省並運內河小舟不給計米集將及封峽而川中商賈不通成都無

隻船入城城中斷薪炭炊烟不繼民苦之君謂江
運可緩而徒病蜀甚無謂欲白知非撫軍意然事
勢迫不忍默遂具摺極陳其弊且言不如停止運
江獨運楚而聽商客運江良便雖業已奏可事勢
中改

聖明可以實告也撫軍竟怒甚欲劾君不為動江運卒
行吏民重困米下峽多覆溺者後紀撫軍至君屢
乞休不聽年七十卒于官病卧猶治事無間卒之
日猶召成華二令入內署訊獄口為定讞訖遂卒
蓋乾隆九年五月十八日午時也噫向使君成進
士登詞館以文學顯亦止於黼黻太平出入風議

於吾儒經世化民之道何與今君雖晚遇未大其
用而使世知儒術之措施若是君亦可以無憾矣
所著小山詩稿八卷文稿八卷詩餘稿四卷梓行
于世君娶戴氏早卒繼娶范氏子一景元亦能詩
女一適朱倬孫男三澄溱潤景元將以乾隆十九
年九月十五日葬君於二十九都一畝鄒庄涇圩
之新阡先期以顧玉停所作行狀稽顙乞銘於余
余不能辭銘曰

春華無實儒術輕學不積中顛且傾人知君詩李
杜生龔黃吏治俄垂聲寬和外著內精明執持大
體意氣平制科帖括紛尺程匪

聖旁求曷知名銘諸幽宮告來襁科目外周多賢英
乾隆甲戌仲秋年家姻眷同學愚弟沈起元拜撰

香華照實

今不增補

二波門

半世

下

小山詩文全稿總目

詩共八卷

初稿二卷
後稿二卷

續稿四卷

詩餘共四卷

香濤集

紺寒集

青綃樂府

初禪綺語

旗亭夢囈

文共八卷

小山詩初稿目錄

卷一

短歌

夜來樂

春日南城曲

吁嗟篇

浮萍篇

白馬篇

仙人篇

鷓鴣謠 三首

蒿里曲 二首

映水曲 二首

金閭少婦曲

孤松行

寄答顧玉停

光福道中

病中寄幼濤姪

贈孫徵君赤崖先生

周忠介公墓

別潭影軒

銀屏

夏日邨居 六首

重過南城雨窗悼感 二首

書解光劾趙氏奏後 二首

題周乾初詞卷 葑溪吳烈女歌

題枯松圖寄松陵楊維箕

呈吾師易亭楊先生

晚步浣山邨訪惠二仲儒不值

冬夜宿棲霞菴 初入赤松山示內 四首

柳 書玉停札後

題美人擲笛圖 題著色梅畫扇

采桑曲 二首 初夏登晚眺嶺

書漢舒姪香雪詞後

閭邱嶺草花雜發彌望爛然携酒獨酌

小游仙詩 四首 登桃花嶺

夏日涼甚題扇

雨後觀漁洋鄧尉諸山偶感作歌

微風 新月

懷維箕 晚霽

贈戴高士南枝 寄范聲佩進士都門

秋感 二首 宿積翠菴

書夢 寄懷愚千都門

秋歸

小山言初和目錄
歲六空綺閣落成晚坐即景

夢愚千

冬日簡張山人懋齋

頭骨數珠歌

曉度柴莊嶺由元墓至青芝山

胡南溪齋觀梅得邨字

過李山人笠峰齋漫題二絕

題李山人方菴消夏圖 秋夜

夜坐懷諸兄

秋日登劉陽堡

野望

重陽前三日示山中諸子

秋閣晚眺

晚庭

曉粧詞

徐雲期見予新月二分寒雁背殘陽一抹病梧枝
之句以爲近鬼語漫題一絕寄示

書愚千都門寄歸詩後

早春再宿積翠菴用沈石田拂水巖韻

春日偕友過笠峰齋小飲即事

野塘行藥

送楊三文叔之華亭

三月二日雨後作

三月三日集沈校書山園

三月十二日偕山中諸子泛湖游蟠螭山飲於石
壁夜宿如是菴明日游查山登六浮閣是夜阻

風再宿如是菴菴僧挑蕨作清供次曉發棹復
登竺山望穹窿頂歸後夜坐雜題六詩以志勝

遊 春郊即事

春思次韻 雨閣書懷

虎邱舟中戲贈 二首 哭周十襄虞

晚秋偕山中友人散步 除夕用戴叔倫韻

卜居 三首 哭蓀蒞二女

讀文中子作 宿晚清軒留別箴六

咏懷 二首 憶昔行壽易亭師七十

嘯古草堂送別箴六 懷愚干楚中

題徐侯齋空林雪霽圖 田家行

贈朱竹垞先生 秋感 二首

秋夜 寄山中諸子 二首

中秋夜月下作

卷二

秋日偕葉嘯古游支硎山

秋霖歎 寄家書後作

寄愚干 夜坐吟

張麗華侍女汲井圖 李密挂書牛角圖

唐昭陵六駿石像圖 宋徽宗賜周準人馬圖

雜感 六首 別愚干

陪稷亭兄游積翠菴作 偕山中諸子泛舟作

杏花雙燕畫扇

寄稷亭兄金陵

橘

三十生朝述懷三十韻

移居十首用孟東野立德新居韻同稷亭兄作

贈毛鶴汀

南溪齋玩宣州石用東坡仇池石韻

金陵中秋用東坡中秋見月寄子由韻

游金山

題畫

酬方礎臣

壽母

偕顧玉停沈子大集繆氏雙泉草堂贈文子武子

送稷亭兄入都

送玉停入都

義興城上

視徐大龍友疾

北星關曉泊

錢王祠

岳墳

于忠肅公墓

湖上漫書二絕

山中聞琴

招愚千徐漢光顧蓀臣玉停沈子大集古香堂分

賦得新晴新綠限一東二首

和鶴汀懷古四首

金陵
錢塘

維揚
姑蘇

觀鷺粟

茉莉

同徐漢光顧蓀臣玉停雙粟毛用雨家愚千懷一

集子大雙桂軒和陶桃源詩用原韻

登蓮華峰次儲五汜雲韻

夏日偕玉停過顧亦巖南圃

題畫

詠蓼

颶風

紺寒閣漫書

重陽前一日集抱觀堂即事六絕句

松陵道中

和鶴汀席上四咏并引

寓樓晚眺

蘇堤晚坐

湖上雜題 四首

四賢祠

湖上小集分賦竹枝詞 一首

曉渡西湖泊茅家埠

飛來峰

靈隱寺後山

冷泉亭

遊葛嶺 四首

登吳山

鍾翠亭

游韜光寺贈山止上人 二十韻

偕運甓翁泛湖用東坡和蔡準郎中見邀游西湖

韻 二首

醉歌贈江天錦天璋

和繆武子冬夜言懷次原韻

聞故園諸同志檢校桃源草堂已有成局喜而有

作

飲笠峰齋賦贈

冬日過積翠菴

伯兄雙溪先生五十初度 二首

小山詩初稿目錄終

小山詩初藁卷一

婁東王時翔抱翼著原字

臯謨

短歌

被酒出門日暮何之短歌微吟翹首沈思羣山蒼蒼百川
森森我於其間維憂用老不知我者謂我何求人如
朝露歲月其邁賢達奈何神仙安在今我不樂自貽伊
悔

夜來樂

乳燕蹴花窺画檐雙鬟放下蝦鬚簾黄昏竝坐銀箏語
秀月瓊樓酌香醕明珠百琲奉妝臺買心惟買桃花開
繡衾向曉熏煙重醉眼丰茸破迷夢簾外烏啼楊柳寒

嚶嚶白馬金鑲動數錢那怕郵江貧今宵錦瑟伴何人

春日南城曲

天桃嫁雨三日老城南水漲色如草紅霧濕衣光濛濛
路深迂步隨東風玉樓燕子金翦尾玳牛牽簾人睡起
清眸低掠綠波春楊花化身種魚子鶯笙吹徹日西沈
怨別江南一千里

吁嗟篇

吁嗟泥憶雲高下不相聞如何君與妾恩情中道分恩
情中道分羅巾掩淚啼妾情風中草從君東復西從君
東復西君恩倘來還豈知決絕意安固若南山願爲孤
飛鳥哀鳴投遠林離羣非不悲同羣總異音

浮萍篇

北渚生浮萍飄流到南渚根淺本易移況有風吹汝風
吹水更流東西兩浦頭微溜已不穩急湍能自由衝激
無已時來依藻荇邊藻荇亦弱質安能久相全委身就
漁人置之魚腹中身滅非不痛願避浪與風

白馬篇

白馬著金鞭難羈似落日少年好游俠意氣故無匹蕭
蕭復蕭蕭騎馬出荒徼馬驕人更儼飛矢貫雙雕迴身
入燕市金鞭換玉竿不用聽爾歌但請看我馬我馬行
且飢爲我餵豆糜少年與白馬性命久相依

仙人篇

仙人跨白鶴期我青雲端我愧非仙才惻惻仰天歎入
山采靈芝虎豹踞其間入水求丹砂下有蛟螭蟠處凡
既匪易學仙良獨難身世兩茫茫憂來不可寬十千沽
美酒沈醉開愁顏仙人顧我笑安知非金丹

鷓鴣謠

客舍之北有林曰鷓鴣土人云昔曾有鷓鴣爭巢於此故名因戲作鷓鴣謠

鵲有巢鴉爭之鵲不勝鴉居之鴉聲鬧鵲心悲鵲心悲
前致辭爾奪我巢知無還時巢失且復作可憐離故枝
鵲有巢鴉居之鵲有兒鴉驅之鴉驅之鵲致辭巢讓爾
完我兒我兒大時能作巢爾子當復來居之
鵲有巢鴉居之一鴉出百鴉飛百鴉飛鵲笑之有巢不
居奪我何為奪我何為他鴉來歸

蒿里曲

出門望蒿里松柏叅天峙中有陳死人乃是當年我與
子
出門望蒿里松柏叅天列何來行路人見我他年髑髏
骨

映水曲二首

妾家臨水居含愁時一映盛年減容華倘非真薄命
映水復映水眼長眉曲曲何處不宜人故應是妝束

金閨少婦曲

誰家少婦迴含愁郎到橫塘學弄舟今夜南風涼似水

香巾玉席自登樓

夏日子夜歌香巾拂玉席共郎登樓寢

孤松行

孤松何凜凜傑立南山頂天神呵護救虎狼匠師不敢
窺其旁吾聞義竹入御苑寒梅放官閣茲獨奚爲守寂
莫吟風嘯雨含精靈蒼髯古鬣成龍形山僧稽首野老
拜願乞飛騰活下界

寄答顧玉停

才上籃輿又葉舟可知生性愛清游報君一語真癡絕
爲待梅花十日留

光福道中

水碧山青二月時催花雨過訪花宜逢人便問梅開信
船尾先看載一枝

病中寄幼濤姪

汝叔秋來憔悴甚阿咸羸體近何如愁生涼雨殘荷夜
人在西風落葉初雙屐偶聞時誤起一燈獨對始知疎
可能無事常相見麥飯黃齏共校書

贈孫徵君赤崖先生

高步今看似鶴清昔經遷謫益知名五噫好向吳門隱
萬死寧忘絕塞行老去文章猶動主生還匡濟爲諸兵
寂寥門外無車馬問字人來徑草生

周忠介公墓

浩氣當時冠六君貂璫膽落亦逡巡葬身不敢遵魚腹
及禍誰知己角巾里有亂民成義士家留孝子繼忠臣

千秋碧血埋茲土一半曾濺許顯純

別潭影軒

小軒枕水得軒名軒裏居人事事清
髹几學書堆柿葉石欄題句點桐英
投竿此去空波影把酒誰來對月明
惟有寂寥雙海燕梁間猶憶嘯歌聲

銀屏

銀屏有夢不曾成起揭風簾欲二更
今夜小庭春一色粉梨白燕月初生

夏日邨居六首

活計人生合校量清吟原不救空腸
粗能拾蟹撈蝦了管領黃姑數里塘

桑柘陰陰野景新箇中恰好鬪閒身
圍棋玉麈俱拋後不是東山捉鼻人

隱約斜陽雨後明出門流水小橋橫
麥秋天氣新陰密一路科頭自在行

竹鎖青帘望欲無一瓢邨酒自來沽
晚雲疊疊天西北畫出橫峰落照圖

雨後蜻蜓欵欵飛汀花汀草漾餘暉
手持碧竹竿如玉直到南塘喚鴨歸

鎮日柴門靜不諱藥欄桑圃淡生涯
文壇舊侶休相約別赴雞豚祭賽家

重過南城雨窗悼感二首

生別亦已悲死別悲何如之子即長暮形影倏俱徂念
子不可見獨立自踟躕牀頭啓衣笥展爾繡羅襦上有
嫁時淚歷歷數點餘注目未及定怵怛肝腸屠哀極淚
猶歛真哭聲原無

寒意寫空林棲鴉多偶羽自爾棄我來獨身無處所爾
棺委荒草爾魂將安主魂兮倘來依因之念風雨

書解光劾趙氏奏後二首

長信要情約青宮未冊儲不禁飛燕啄更用綠囊書

昭儀啼眼在葦篋置屏東君寵真難恃渾忘飾室中

題周乾初詞卷

名元方小字阿乾好爲詩餘所著有寒香集二
卷雅愛其何處是江南落花風雨寒之句嘗携
其集以示家兄欒亭亦舉此二語爲壓卷余與定交在
壬申秋杪距今六年矣夏以暴疾卒年止二十六云

周郎清真裔少小工樂府楓冷句猶傳秀宇沈黃土年
年寒食時江南落花雨

葑溪吳烈女歌

葑溪水清且深葑溪女賢而烈女年初及笄未嫁夫先
歿烈士重一顧不在相綢繆烈女重一聘不在同衾裯
脫我繡羅衣分與諸侍兒將我翠與珠贈與隣家姑散
髮披麻出香閣拜罷爺孃雙淚落回身上小樓終日坐
樓頭執義不知樓上苦今生不踏樓下土豈知女子有
家父母心復納紅羅百匹千黃金兒逆命兒身罪兒不
死兒心悔樓前月映窗紗黃顧影重燒一炷香自解佩
悅懸高梁生時不識夫君面夜臺那必能相見惟有葑

溪之水長東流竝爾芳名無日休

題枯松圖寄松陵楊維箕

鶴澗淒涼山燒逼龍鱗剝落野風吹綠君自作枯松樹
試看繁花總弱枝

呈吾師易亭楊先生

撲馬黃塵路幾千求官乞米盡游燕何人更似揚夫子
寂莫空亭只草玄

晚步浣山邨訪惠二仲儒不值

行行浣山邨歷歷度野寺歸鳥投空林木葉下殘翠之
子不可見折蘭竟誰遺

冬夜宿棲霞菴

歲暮客心苦夜宿寒寺中轉輾未能寢獨步庭西東熒
熒殘燭滅枯樹一窗風

初入赤松山示內

天壤王郎莫漫嗤綠窗調黛暗尋思十年綵筆無人賞
恐畫雙蛾不入時

初旭橫窗暈作斑箇儂妝閣亂峰間折枝屏展湘簾挂
半擁紅蕤看曉山

閒凭熏籠滿袖煙小闌同話未來前粉梨一樹垂垂白
好是清明細雨天

上林休憶杏花紅家在湖山最勝中鎮日彈琴看鬢影
清茶相對過東風

柳

婀娜復搖曳春三二月時逢橋是離別見陌又相思都
恐聞新曲何心學翠睂登樓腸欲斷煙雨正絲絲

書玉停札後

谷鳥呼其羣翩然向人飛懷哉深山裏索居儔侶稀佳
人渺天末何以慰調飢故篋搜殘牋粲若雲錦輝顛倒
再三讀清風徐拂衣置之襟袖間揚芬何馥馥揚芬何
馥馥望望空依依盍來兮山中與子兮采薇

題美人擷笛圖

太湖石覆蘚痕乾燕子春風梵字闌待月有人偷擷笛
玉花雙墮袖羅寒

題著色梅畫扇

骨態依然玉女家空將渲染學繁華不知幾許胭脂費

能使梅花作杏花

元揚允孚灤京雜咏詩梅花點徧無餘白看到今朝
是杏株其自注云冬至後帖梅花一枝於窗間曉妝

時以胭脂日圖一圖八
十一圈既足變為杏矣

采桑曲

乳鳩鳴布穀飛采桑去蠶欲飢蠶未飢采桑歸夜聞儂
家阿母道今歲蠶成作嫁衣

布穀飛乳鳩鳴采桑去聞馬聲馬上郎何太輕馬知郎
意鞭不行妾去蠶飢空復情

初夏登晚眺嶺

嶺原名晚眺晚眺自相宜新綠一萬樹殘花三兩枝湖

流夕陽去帆映暮山移歸指煙邨路輕寒麥秀時

書漢舒姪香雪詞後

半是柔情半慨慷一編觸手爛生光如行畫戟雕戈裏
忽入珠歌翠舞場欲駕辛蘇擬詩史更拋周柳接騷香
憶曾取笑邯鄲步拜賈虛言愧寄將

漢舒序余香濤詞有塞其
香草真同拜賈之誠語

問邱嶺草花雜發彌望爛然携酒獨酌

樵漁叢裏寄吟身佳事今年試斬新清酌沈沈容入手
好山的的解迎人郎當袖曳斜陽影澹泊花生冷谷春
徐度石橋煙欲暝金鷺飛破一溪賞

小游仙詩四首

林是丹剛樹白環韻飄神籟閩風閑玉樓十二俱明月

但問飛瓊第幾間

拋擲林禽浪作恩也令下吏得高騫具妃手握三枚棗
不是揚羲不與吞

掌内生文果不差盧倕猶未識仙家武尼山下雲來後
說與前身是玉華

游戲廬山跨白龍羅衣輕曳紫煙濃屏風疊限分南北
一箇仙人占一峰

登桃花嶺

穹窿父羣山桃花嶺其脊我來不支筇登此試脚力牽
蘿綠相引垂果青可摘雲動風推松瀑飛雨敲石蓊匄
谷霧黃鞞鞞巖花赤景幽物增妍地僻意殊適晚投山

下居孤吟自浮白開軒面所歷煙月相與碧

夏日涼甚題扇

憐爾團團影長捐篋笥中及時猶見棄况復遇秋風

雨後觀漁洋鄧尉諸山偶感作歌

朝不見山山在雨間暮而見山山色可餐有如玉人參
差立修眉碧彎彎或作高髻垂餘髮仰頭看未足低頭
發長歎我本欲附青雲士年少來居白雲裏梁甫吟成
憶臥龍世人輕我鴻毛似丈夫出處會有時草履黃冠
何必輸金紫吾聞長安翕輶多王侯昂車怒馬馳如流
日亦不得息夜亦不得休折腰屈膝令我羞何如看此
雨後山白雲無盡長悠悠

微風

避暑竹軒裏恰有微風送力淺不成涼但覺爐煙動

新月

西樓新月生纖纖亦可愛嗔人說如眉開鏡拂螺黛

懷維箕

楊公六十老無兒禪榻茶煙裊鬢絲獨上山樓望梅里
湖雲一片隔相思

晚霽

雲散夕光露東風晚霽天一林生碧氣片月倚新烟山
閣閒登處鄉園在望前好憑春水漲寒食放歸船

贈戴高士南枝

江山一劫古今哀慟哭西臺復釣臺猶喜諸陵無恙在
冬青只爲故人栽

寄范聲佩進士都門

我占湖濱一釣竿相思夢不到長安美人何處碧雲合
欲贈芙蓉江水寒

秋感二首

梧葉蕭蕭下寒蟲唧唧鳴入秋花亦淡到夜月偏明貧
賤早爲客艱難長此生由來搖落候容易使心驚
散步柴門外疎林帶野坳湖晴看捲白山瘦欲收青空
濶浮雲戰淒迷埜草零西風如此急孤柏自亭亭

宿積翠菴

竹院僧留宿前峰雨意成飯知山稻熟浴惜澗泉清一
靜入深夜無眠話短生明朝歸路滑去去憺忘情

書夢

散帙滿木榻倦即枕以眠神適夢亦幽恍落縹緲巔天
青水欲合地白月正圓雲氣觸石迴盪作松梢煙飛蘿
挽我袖谷鳥歌我前脫冠挂高枝濯足清冷泉俯仰失
往境獨立風飄然

寄懷愚千都門

望山雲未出葉落忽數聲涼飈何處來吹起故人情故
人適長安長安路難行車馬自喧鬧而多秋意生千金
亦不重一身亦不輕竹花冷蕭瑟鳳飢慎勿鳴貧賤復

貧賤永期東臯耕

秋歸

我出反爲常我歸亦云偶問途故里中望門認衰柳入
巽向影堂肝腸斷已久退拜慈闈親默祈金石壽千絲
萬絲愁白髮散前後兄貧爲殺雞弟幼能把酒稍敘骨
月情團坐開西牖寒菊煙離離野竹風瀏瀏念是先人
培相看復垂首人生被飢驅桑梓不能守泣語諸弟昆
我將營十畝

箴六空綺閣落成晚坐即景

遠煙霏紫夕陽沈小閣閒登和鳥吟一檻涼風吹薄袖
幾家秋思帶疎林清琴未泛茶先熟新月初流竹已陰
欲問主人空綺意十年曾畫翠蛾深

夢愚千

落月照寒夜茫然空自疑與君方久別結夢是相思路
遠豈易到山深誰使知何當同握手真看老梅枝

冬日簡張山人懋齋

懋翁蕭散甚不作治生謀對雪哦新句看山上小樓米
空那曉索酒盡始知愁定向寒梅畔相思掉白頭

頭骨數珠歌

傳是建文時物余偶得之作歌以紀所聞

高皇龍飛懿文亾太孫踐祚謀諸王一朝削奪似七國
誰爲鼯錯齊與黃北平真人亦龍種躍淵之始亂雲擁
砮旬霹靂征輦來朝廷無謀四海恐長興善戰老率師

猶然沈作滹沱泥松亭關衆亦十萬將軍一騎得遁歸
嗚呼九江豢養兒授以大任誠非宜橫屍方積鄭邨壩
璽書斧鉞從天下怙寵氣驕肆毒虐先失軍心吁可訝
白溝河頭再敗餘纍纍頭骨成輪珠內寺豈能爲冥福
用恩如此何其愚燕師南下疾如掃金川門中旗鼓鬧
佛聲猶在宮殿空喚得君王著僧帽茲事於今三百年
人間陵谷已再遷臥鎗折戟久不見一百八顆驚勺圓
盥手摩挲未敢觸忠魂上有瞿都督殘燈颯颯眼迷離
疑看戈矛紛鬪逐

曉度柴莊嶺由元墓至青芝山

斜月照殘更野風吹曉程雪消寒水下路轉衆山迎老
檜勢如攫早梅香已清恐驚宿鳥起欲緩筍輿行

胡南溪齋觀梅得邨字

雪後來尋林處士便煩驚喜爲開尊濕煙冪歷花如夢
晚院昏黃月有痕沈醉未妨添酒病一清真欲瘦詩魂
歸時滿袖寒香在心憶西山何處邨

過李山人笠峰齋漫題二絕

交深無送迎入室不問主坐看湖中山薄雲釀疎雨
清愁不可寫羸病復相侵知我客懷惡憑君盡此心

題李山人方菴消夏圖

時在赤松山圖中寫
余及諸子共七人

李郎本是龍眠裔丹青無師得天契茅菴人數七賢同
歷歷山窗潑墨中曳杖飄蕭白須叟婆娑樹底昂其首

旁有白晳一少年指點遙峰欲開口其東竹林裏二子
翳蒙密似有學嘯者驚鳥撞人出竹繞僧寮清珊珊搖
玉聲一人橫榻臥一人據几聽葛衫羽扇者誰子端坐
凝神說無始其餘山僧童子各有態酒罇茶具列一帶
遠林缺處露湖光莫釐縹緲橫青黛祝融方張火傘垂
烈日杲杲草木萎是中消夏樂復樂休遣人間熱客知

秋夜

清景屬秋夜幽居更不同邨醪隨意把蔬甲幸常充滅
燭坐殘月罷吟聞暗蟲倦來投短榻夢落玉山東

夜坐懷諸兄

踪跡如鴻雪何時返舊林拙難_全世好貧易失人心笑

口隨年減愁眉與日深懷兄不眠衣望月自悲吟

秋日登劉陽堡

海角劉陽堡蒼茫夕照開黑風吹草急白浪打城迴氣
肅魚龍蟄天高鴻雁哀雙忠血戰地牧笛數聲來

先世父及姑壻
殉節處

野望

病無脚力尋幽勝野望時時上古原秋晚割雲收穰稭
年豐打鼓賽雞豚霜渲木葉分諸嶺風引炊煙接數村
興盡自歸簷下息一鉤新月挂柴門

重陽前三日示山中諸子

燕臺梁苑到無因偃仰湖山托病身思醉偶來招飲約

懶吟時有索逋人十年空鍊三都賦百歲終成一窖塵
指日重陽叢菊綻諸君料理綠醅新

秋閣晚眺

山閣蕭森晚吹涼秋原野色迥蒼蒼白雲嶺欲闌歸鳥
黃葉邨宜受夕陽衲子閉門孤寺靜漁翁繫纜一汀荒
閑心判斷居人業飲犢呼雞味亦長

晚庭

晚庭騷屑動秋悲獨倚闌干未穩時新月二分寒雁背
殘陽一抹病梧枝飄零身世歸難定冷淡生涯計轉疑
坐看流光如水逝孤雲羸鶴共棲遲

曉妝詞

小窗鸞鏡照清容瘦絕山花尚道濃莫向短髮嫌冷淡
今朝破例插寒松

蘇詩寒松無時
花安得插髻髮

徐雲期見予新月二分寒雁背殘陽一抹病梧
枝之句以爲近鬼語漫題一絕寄示

暮秋詩境入清寒驚得良朋作識看重向燈前拈鬼語
暗風吹雨到更闌

書愚干都門寄歸詩後

時爲新城
先生所賞

新篇愛爾近逾工綵筆無由宛軟紅聞說長安居不易
古原春草壓逋翁

早春再宿積翠菴用沈石田拂水巖韻

山居久已絕塵緣時憇僧窗愛靜便月墮桂香成昔夢

風吹梅信入今年羣松結幄春藏鳥亂石迎流夜吼泉
却笑忘名猶未得擬將姓氏竹林鐫

春日偕友過笠峰齋小飲即事

養花天氣雨霏微閒客相携欵竹扉帖帖墻陰眠犢子
斜斜屐齒印苔衣援琴指落流泉韻命酌盤堆野蕨肥
勝事更於何處覓尋常還往竟忘歸

野塘行藥

窗外幽禽喚夢醒野塘行藥出林坳風吹水漾晴蕪綠
雲放天爭遠岫青梅落無詩春草草柳長不折影亭亭
打魚最愛斜陽候爛熳歌聲獨自聽

送楊三文叔之華亭

青青荇葉渚蒲芽淡沲春光別思賒弭楫煙籠吳苑柳
揚舲風落泖湖花金盞入饌應忘客黃耳傳書易到家
定有新篇追老鐵空山延佇望瑤華

三月二日雨後作

薄雲釀雨灑銀塘點點浮花曲澗香定爲人情思稷飲
預煩天意佐流觴緩歸牧笛沾青箬帶濕風箏挂綠楊
晚院輕寒晴未老鶯梭一擲破煙光

三月三日集沈校書山園

執蘭依舊亂山中彈指三年袂襖同偶涸春泉依澗石
忽聞流水在絲桐竹光搖碎酒鱗綠花片舞添人面紅
獨少張華吟上巳興闌相與訴東風

時憩齋
已歿

三月十二日偕山中諸子泛湖游蟠螭山飲於
石壁夜宿如是菴明日游查山登六浮閣是
夜阻風再宿如是菴菴僧挑蕨作清供次曉
發棹復登竺山望穹窿頂歸後夜坐雜題六
詩以志勝遊

騰騰放棹綠波灣幅幅吳綾寫髻髮約得詩人聯白社
携來茶具訪名山一峰陡拔當湖踞雙壁高擎有路攀
繫纜身輕凌絕頂閒雲野鳥滿松關

煮茗旋收柏子焚僧雛朴訥也殷勤山花半拆欹闌石
埜竹輕捎散谷雲蘿徑琴聲和鳥度楸枰棋響隔林聞
振衣千仞當新浴第一峰頭眺夕曛

月中團坐瀉銀瓢醉哭狂歌撼碧霄松柏斂魂隨地滿
湖山載酒幾人澆穿林杳杳聞清磬裂石嗚嗚起洞簫
我欲誅茅共僧住尚憐塵累未能超

查山拳石競游嬉想見前人獨賞時

明李長蘅查山詩昔來我獨賞近乃游者競

傑

閣撐雲開遠望名流擊鉢剩殘詩

去春秀水朱竹垞先生偕吳中名士觀梅六浮閣詩牋猶滿

壁地連銅井二三里梅接石樓千萬枝漫惜我來花落
後綠陰青子自相宜

南湖風急打松扉欲阻湖船不放歸亂樹掃雲衝壁起
怒濤捲雪接天飛傾乾荒店連鉸酒採却山僧一稜薇
兩宿何緣便思去暮寒偏自上單衣

勝地難忘作後期歸舟風順別僧時七人游屐從容去

六幅輕帆美滿吹，竺嶺驚塵聲撲朔。笠峰橫靄勢躩踞，到家轉憶狂游地。枕上吟成寄所思。

春郊即事

蹋青閒過小橋東，幾處春情入望中。野店酒停游子騎，輕衫人耐落花風。雲端半露遙山翠，天末微留夕照紅。絕愛暮歸行犖确，嫩鶯新樹霧濛濛。

春思次韻

欲暖還寒雨乍收，柔桑須采下妝樓。愛臨綠水疑開鏡，羞近桃花默轉頭。蛺蝶飛來連扇影，鴛鴦繡出一羣愁。不知天上黃金屋，貯得佳人似妾不。

雨閣書懷

秦樓窈窕接輕陰，犯曉鈎簾點筆吟。宿雨鳥多辭樹意，附風雲有出山心。家於松嶺橫邊隔，春向楊花落後深。莫笑長卿空四壁，一篇封禪冠詞林。

虎邱舟中戲贈

風前燕燕掌中身，作伴携舟采白蘋。新是秣陵驢背客，煩君紅袖拂緇塵。

金閶十里繡簾垂，院院笙歌動客思。一種好花齊解語，東風擡舉鳳皇枝。

哭周十襄虞

端重如君者，誰知早喪因。一棺停野寺，三口向何人。卹後貧交愧，遺文敝篋珍。斷腸金石契，屈指十餘春。

晚秋偕山中友人散步

長歌紫芝曲攜手暮林東行見寒潭碧坐依秋樹紅野禽雲路遠細嶺屐痕通杖策誰招隱名題里社中

除夕用戴叔倫韻

何堪逢此節長憶白頭親今夜更寒雨明年猶旅人淚彈孤坐處燈照不眠身未遂東歸計鶯花空復春

卜居三首

海國吾故鄉吹簫入巖阿雖與骨月違頗喜湖山多金門既杳渺鹿車亦蹉跎依人豈長策無家將奈何僦屋得數間聊足容嘯歌僑寄非素願人事有輒軻草草補葺謀晨起牽青蘿

蘚痕斜斜生山翠遠遠撲入門餘隙地衰草帶殘綠薤草蒔菘薤桃李倚墻曲種樹法已知鋤菜手未熟余也藜莧腸本不稱食肉何必華堂居但願麤飯足高歌梁甫吟悠然在深谷

維渭則有涇惟玉則有珉諧俗世莫識泛泛皆我倫親朋競謀食托業寧無隣樊侯屠狗者馬卿沽酒人吾時學牧豕聊得希平津眷言桑梓懷振策披蒼榛極目東江東停雲意難申

哭蓀菹二女

二女能言笑非男亦慰情命同朝菌盡淚向暮帷傾小壙孤花志餘衣舊繡明夜臺雙姊妹索乳有啼聲

讀文中子作

六季之亂大義荒銅川有子生開皇龍頸龜背鬚飄揚
手扶三才乘五常視爾民瘼心悲傷鼓琴汾亭思廟廊
上策十二言空長作歌東征聲激昂道不行矣歷四方
北山丈人譏皇皇汾水一曲疏屬陽先人敝廬在故鄉
其徒足樂聊徜徉六經屢伸道乃光龍舟五更曲未央
江都變起開大唐惜哉遂夢修文郎天不爲留常與璋
祇餘事業付杜房嗚呼斯人今則亾安得從之共翱翔
宿晚清軒留別箴六

我歸必宿此如鳥投故林清尊連夜持猶未開離襟
日煙江上孤舟渺渺心

咏懷二首

昔我多遠志未遂常刺促今來飽艱難無事心便足
舉身付大鑪逃世入空谷雖無組冕榮而少昏夜辱幽鳥
飛且止孤雲起猶伏燒香對羲畫暗室即明燭餘文雜
翻倒適性隨手觸永懷陶公篇點筆亦時續此詩有靜
機未許動者讀

桃李何灼灼隨風忽飄颺蕭瑟南山松霜骨久無恙天
運互往復物情有衰旺丈夫年少時困苦莫悽愴宜因
禍患多慷慨益自壯所爭千秋名眼前俱可讓哀哉長
沙傅弔屈母乃妄才高氣無餘輕身遂凋喪古來英俊
人晦跡全其量水深蛟龍蟄泥沙蟠倔強閉塞雷雨開

飛騰復誰抗吾將采茯苓散髮老煙嶂

憶昔行壽易亭師七十

憶昔赤符欲改黃巾起渡江一馬高騰驤須臾化龍雲
氣薄繽紛白雁凌空翔南斗之墟泰伯鄉文星照耀何
煒煌生擲頭顱報天子身騎箕尾歸帝旁翩然遺我雛
鳳皇不巢阿閣巢空岡綵翼錦羽善自藏深山氣寒天
雨霜竹實何處盈瀟湘不采非因道路長君不見籠中
二鳥矜榮光君不見隨陽羣雁謀稻梁碧梧棲老枝未
易一鳴獨待岐山陽

嘯古草堂送別箴六

鄉心已無限送子況臨岐酒散持螯夜風飄落葉時薄

醺憑檻久細雨去帆遲空綺相尋日新梅定著枝

懷愚于楚中

離襟紛百感迨此授衣辰日暮倚秋樹天寒懷遠人湘
山拾芳草江水斷丹鱗遲子一尊酒悽悽笠澤濱

題徐侯齋空林雪霽圖

深山觀物暇寫出歲寒姿一自秋槐落空留孤柏枝

田家行

分擬張
王樂府

木生枝草生花生兒慎勿爲田家去年畜疫牛盡死今
年旱缺秧田水麥荒不得供朝舖忍飢庠水氣力無驚
聞隔邨寡婦哭知有健吏來催租默下水車繩繫項且
去城中喫官棒

贈朱竹垞先生

時寓吳門
慧慶寺

玉堂舊是神仙侶却愛精藍作近游老去詩篇多放達
少時樂府擅風流女郎曾執紅牙拍酒客猶尋紫綺裘
禪榻鬢絲方結夏茶煙輕裊氣如秋

秋感二首

金天氣肅殺秋風滿空園園丁持斧入意態何軒軒側
眼視高枝舉手亂葉翻惡木固須伐終恐傷本根
孤芳昔愛蔽眾草秋亦零但恐蘭蕙質共受嚴霜刑所
重王者香慎毋棄閒庭嗟嗟藜麻根春風吹易榮

秋夜

草際百蟲響羈愁酒不勝薄衾秋館夢疎雨夜窗燈北
澗菱三畝西疇稻十塍何時生計足歸興一飛騰

寄山中諸子二首

海鶴階下鳴未脫樊籠苦知爾山中人佳游復容與躡
屐寒巖雲漾舟清川雨
空庭展高步愁心入歸鴉涼風隕木葉攬衣忽思家亦
恐山籬下灌莽埋孤花

中秋夜月下作

山豁飛金鏡清光看不休忽生將缺意翻起最圓愁斫
桂莫傷手種榆非遠謀野人何所感浩歎坐南樓

山豁飛金鐘... 中夜交月不...

空翠... 翠... 翠... 翠...

男景元校刊

小山詩初藁卷一

小山詩初藁卷二

婁東王時翔抱翼著
原字 臯謨

秋日偕葉嘯古游支硎山

八月陂塘清理楫成佳游帆影漾藻荇篙聲散鳧鷗魚
鱗雲細細天風看搖曳遠渚弄晴碧諸嵐接空翠水窮
上籃輿數里行崎嶇稻熟山農田竹香野人廬陟巘時
下上攬勝屢俯仰荔牆有幽色松濤激清響名僧與高
人已矣俱沈淪聽雪澗未竭放鶴亭猶新古墓入佳景
秋芳氣何靜金粟飄幽香芙蓉淡孤影薄寒低夕曛酌
酒相殷勤微雨灑歸艇菱歌隔煙聞

秋霖歎

皇穹何淫溢秋霖苦淒淪陰晴雜晝夜一月氣昏慘烟
烟日初出翳翳雲復黯森如銀竹立細似輕塵糝稭稻
已久熟欲穫仍未敢恐遂致腐壞豈止薄收歛潭潭祈
晴鼓社鬼田夫謠水旱出天意雲師肯誅貶此邦號佳
麗奢俗恒相染金盤鱠縷縷美醞杯灑灑狼籍酒肉氣
積穢能上感降罰良由茲願人莫生憾但恐及窮黎無
辜誠足惜箋天空有心忍見白日掩

寄家書後作

嗟予辭親來山陬飢烏傍人五載留東望海水心悠悠
思歸不歸益有由故園無茅可遮頭今春卜居非愛幽
失業不得理鋤耰欲依中林張兔罟伯龍之貧鬼所羞
風雨出嘯聲啾啾傷哉二女病不瘳三時歔過淚未收
阿兄書傳阿母愁燈前拆書涕泗流身欲奮飛計未周
夜坐不眠數更籌細行作書語呶嘍將封復看揩兩眸
天寒北風吹敝裘曉蹋霜露尋行舟乞報阿兄爲我謀
破屋可得三間不

寄愚千

憶昔宗老汲園叟論詩嘗許我與而謂携所作北走燕
以謁濟南必受知不才萬事付嬾惰子竟結束揚鞭馳
黃河水深秦岱高帝京宮闕撐巍巍雄觀入眼思愈壯
萬景奔會下筆追忽看故句自不愜千篇新製何偉奇
飛將引軍破堅陣快劍出匣剗生犀欄衡卓躒處士俊

無能刺謁屠沽兒濟南尚書雖大官風雅實乃騷人師
篝燈繕錄裝卷軸晨起走獻光陸離雁門太守真傑作
一見驚倒韓昌黎不惟帶為長吉束幾使頭因東野低
方知異才有真賞前人浪道知音希嗟我愁病才力薄
子於何處收殘詞猥蒙手寫上宗匠奏雅繼以淫哇隨
一字之褒重華衮子最誠信豈予欺金陵八月開省試
跨驢觸熱汗雨垂三千里歸得携手醉眠共被秦淮溜
聯翩鍛翮避新羽我固應爾子可悲鄱陽湖波大於屋
乃復鼓棹天南陲謫仙去後無好句獨上黃鶴攄雄辭
一年消息竟斷絕念子不見生嗟唏歲云暮矣衣裳薄
胡不歸來共賦詩

夜坐吟

西日落鷗歸林小山子夜坐吟調高聲苦寫憂心客為
家日為年瞻故鄉若登天居無屋兮耕無田我夢前生
侍玉皇一笑被謫日月長寄語仙人世難住早晚金華
去牧羊

張麗華侍女汲井圖

素縷銀瓶拂井床麗華晨起索寒漿忽驚門外韓擒虎
天子牽來下景陽

李密挂書牛角圖

頭銜光祿竟何成洪客江都計未行若作多牛翁自好
當年誤信李元英

唐昭陵六駿石像圖

珠汗桃花八尺龍晉陽蹀躞慶遭逢須知六駿皆天馬
不比瀛洲有敬宗

宋徽宗賜周準人馬圖

畫筆君王豈足矜馬圖一幅到今稱飽看五國蒲梢種
寫寄中原恨不能

雜感六首

小時梨栗覓堂前蘚壁猶黏責子篇霜倒菊花餘舊徑
風搖楊柳在寒川飄零稻雁何由薦愚魯箕裘恐失傳
竹馬鳩車彈指頃平頭三十是明年
憶母看雲淚暗垂去家百里即天涯五年明月隨孤客

三匝寒鳥揀一枝萊袖未應慚進菽牛衣曾亦許鋪糜
但令歸有桓孀井東海波臣涸不辭

南軒竹木映清淪燈火孤窗近十春門外時來麈尾客
風前常作護花人當時文采能驚座此日行歌學采薪
慚愧昌黎負兄嫂重聽夜雨亦霑巾

桃花邨外水東流塘號黃姑景最幽弟子鮑宣初入室
仙郎蕭史遂登樓漁灣細雨閒叉鯉隴畔斜暉愛跨牛
一自安仁歎遺挂枯荻落葉八年愁

鳳嘴膠成再鼓絃辭家獨向五湖邊松中野寺聽金磬
竹裏山園漱玉泉爾汝樵漁人漸熟滯留骨月夢頻牽
他時大有相思處萬樹梅花幾醉眠

蘆中詩老去人寰長抱遺編自掩關憶昔從容陪杖屨
至今涕淚灑湖山紛紛滕薛重爭長寂寂王韋已不還
欲覓知音竟誰是新吟須寄夜臺刪

別愚千

楚江迴櫂片帆飛予亦五湖深處歸相逢一醉還相別
去去春山紫蕨肥

陪稊亭兄游積翠菴作

山中春草芳畫艇繫垂楊樂哉聯棣萼遂此携壺觴支
筇歷煙嶺憇石眺晴景平田鋪衲衣遠湖開鏡影褰裳
下屣顏迴瞻面面山修篁排綠淨雜花吐青殷招提名
積翠翠色染衣袂來多景不同行熟路能記旋過石坡

陀欹眠藉短莎遙觀笠峰頂游女牽飛蘿粼粼清澗石
中有芹芽白食芹真覺美飲澗聊自適玲瓏竹窗明把
杯聽鳥聲燒筍進香飯摒擋煩老僧留連不忍去散步
松間路清興凌飛泉高嘯據竒樹晚眺嶺頭歸晚風吹
我衣人家夕陽裏樵響數聲微

偕山中諸子泛舟作

三月春水生孤舟蘭葉輕載酒出湖口風濤渺難行煙
橫黛光碧曇花限咫尺眼看漁洋山明明不可即轉棹
隨東風前溪曲曲通拂頭楊柳綠映面桃花紅搖蕩二
三里小泊南塘嘴山卑不知名寺古將欲圮振策欵禪
扉谷鳥相驚飛眠花犬自吠采藥僧未歸入舟暝醇醞

興到杯易盡圓齊切肥薤香美剝新筍半醉倚中流
菟我散百愁扣舷歌樂府格格起雙鷗餘情思藉草提壺
田間道環鳴溝水清浪搖畦麥好迴橈過湖旁此樂未
應忘長年休促我卧石看殘陽

杏花雙燕畫扇

短翮飛難起低花拆尚含上林春幾許風雨滿江南

寄稷亭兄金陵

吳閶殘暑送行舟景物無端又暮秋莫漫雨華臺上望
一江楓葉亂鄉愁

橘

野人亭子橘懸金露葉風枝覆蓋深却怪襄陽孟高士

玉盤翻說勝幽林

三十生朝述懷三十韻

浮梗真難定周星屢暗移家貧爲客慣年壯使心悲小
子趨庭日先公居海時菊花香冉冉楊柳露絲絲命舉
鋤瓜手呼抄飲酒詩題門雖有字蓬髮豈慚兒漸長知
勤學辭親欲就師宿羣舒雁翅穩集借鷦枝鑿壁分隣
火依園下董帷溫經香一炷讀史酒盈卮意氣虹霓上
文章月露隨逢人爲白眼對客唱新詞時俗紛相駭清
狂不自疑易愁憐命薄多病覺身危南渡桃花水東床
德耀眉依稀三月夢倏作百年辭暫得依同姓旋來賦
五噫荒臺感麋鹿逆旅饜藜葵琴爲求凰鼓簫因乞食

吹笏林有賢裔圓月不終虧蹤跡漁樵混心情山水宜
種花求異藥拾草覓仙芝壯志消清話流光入短髭賤
身方自惜鍛翮鎮常垂百里非遼絕頻年嘆別離高堂
念存歿諸弟有寒飢罔極何能報同懷兩不知挽車誠
急急卜宅苦遲遲會是懸弧候彌深故里思高歌纔一
放衣上淚淋漓

移居十首用孟東野立德新居韻同稷亭兄作

寄食百里外邈若天一隅我歸實無所豈曰田園蕪明
廷登俊彥展足遊天衢踽踽空山側落落寒松孤男兒
已三十俛首慚徒舖

凌晨陟高岡谷霧何氛緼鄉思重澶迴托身與白雲滄

江紅尾鯉一躍晴波分口吐尺素書好音忽相聞新枝
許竝集命我歸雁羣

鹿車驅薄薄中載琴書多一笑謂少君共挽心如何人
生有四壁豈復憂其它黏扉剔舊蘚補衣裁新荷屋旁
溪水淺風吹總無波

小人有老母恩比邱山高五色愧萊衣青青寒士袍守
身恐弗堪何以答劬勞松柏況未樹空對遺書號呼婦
拜影堂不識憐汝曹

良朋喜我歸叩門急相尋兄弟喜我歸彎弓弋鳴禽桐
陰遮小閣蘋風送孤潯願傾百壺酒珍此一片心今夕
竟何夕聊欲開吾襟

步出門東望青菘滿平畦離離露滴身竹木使人迷既
欣得圃灌寧嘆無田犁鵬飛亦不遠鷄飛亦不低焚香
讀南華物理真可齊

身賤安僻地心清愛閒居何須美田宅何必高門閭有
母萬事足對兄百愁虛北堂弄雛暇東樓吹篴餘糾然
戴我笠種瓜方荷鋤

織兒處華堂自誇衣食饒貧固非所病富亦何足驕嘯
歌一畝宮但恐歲月消南山杞可餌北山蕨有苗緬彼
高人居所嗟道里遙

土陵峙厥後石梁當我門林外聽鸛處池上觀魚軒守
此蓬廬賤安知華袞尊新竹長比母高梧老生孫毋徒

羨九世終古荆枝繁

宣尼垂六籍日月比光輝談經追賈鄭不逮驅駢駢德
衰鳳不鳴時來燕高飛素志在邱壑著書晰玄微飲水
良復樂鐘鼎與心違

贈毛鶴汀

蚯蚓鼓微竅雅音久沈淪煌煌韓蘇作棄若陌上塵毛
君繼高唱淵源溯前人渾朴謝琬刻奇恣仍清真欲挽
濁河流上接天漢津憶昔汲園叟詞壇羅衆賓予也忝
末座觀君邁常倫寸筵撞洪鐘酬答意未申湖山落我
手采蕨窮冬春十年隔雲樹君詩益璘彬偶從靈運兄
傳寫如獲珍跛牛望天馬希跡終無因今幸還鄉園庶

小山詩初集卷二
獲時一親但以蕪陋故欲進恒遂巡廣川游浩瀚峻壁
攀嶙峋平生有微尚非君竟誰陳

南溪齋玩宣州石用東坡仇池石韻

灑灑寒波清齒齒孤峰綠細細猿鳥路斜斜坡陀足爐
香雲出岫瓶枝樹生腹玲瓏巧匠穿蟠屈長虬蹙不稱
俗子樵祇合仙人牧一見驚欲倒屣看恐已瀆南溪隱
君子懷此未獻玉卧游几案間聊比深巖伏予也耽林
泉赤松居久卜朝同木石游暮與麋鹿逐塵念懷鄉園
餘情戀雲谷轉笑東坡慳亦無晉卿欲但思松花酒醉
唱山中曲石壽知幾何人壽飛電速

金陵中秋用東坡中秋見月寄子由韻

纖雲褰開月未高棘圍晚出重濡毫文瀾壯濶賈餘勇
清吟戛戛風生濤乘醉相呼小范子東門前踏月明於
水疎楊堤上滿羅衣喧雜棲鷗半驚起長空杳杳飛晶
丸照耀萬里金蛇蟠何處團圓賞佳節何人偷拜夜深
寒坡公作詩昔臨汴事過千年月不變青氈却向秦淮
湖露濕煙籠古橋板金陵城外拱羣山金陵城高如鐵
堅明祖開基三百載荒蕪玉殿月中看在家中秋應更
好客裏中秋惜草草一年一對中秋月而我不樂恐易
老槐花屢蹋身賤貧臣之壯也不如人今夜姮娥爲誰
出問予可是蟾宮客

游金山

燕磯曉發舟如箭鐵甕城邊乍朝飯金山秀色緩歸心
落帆了却平生願緇流相引褰衣從古刹莊嚴金碧絢
翠華南巡留御墨虎卧龍跳驚欲炫銅環高鑱玉
座深伐鼓撞鐘法王殿谷鳥猶爲鳳管鳴野花疑學宮
人面試登絕頂凭危欄青煙一抹蕪城見晴巒插天翠
滴滴長江無風波練練倒看楓林綠未霜遠指蘆灣白
於霰摩挲殘碣尋遺跡坡仙去後風流散默思今古彈
指間事若浮雲日千變牛蟻床頭鬪未休何年粥鼓隨
僧膳世人大夢苦難覺夜來空使江聲喚

題畫

薄雲帶蒼巘秋空張翠屏山深人跡絕樹色冷孤亭

酬方礎臣

我夢蹋雲凌紫煙刮淨纖翳開青天欲呼姮娥舞桂殿
罡風吹墮茆堂前柘源方郎勸我獻賦要君王君莫羨
朝爲寒士暮即登明光枯松有骨寒菊自芳浮雲柳絮
空飛揚龍躍虎變應有日何況年歲非馮唐把酒且閑
吟涼飈洗塵襟欵寄歷落我自愛原非高尚輕華簪我
爲蓬蒿人未必蓬蒿老蓬蒿中人亦豪傑仰看碧翁任
顛倒來詩云欵寄歷落人共笑慎勿高尚輕華簪又云天生豪傑必有用豈宜終老蓬蒿間金橘熟兮鱸魚肥掉
扁舟兮荻花飛五湖煙水三萬頃老我何人問是非

壽母

吾母飲此觴兒跪請具陳母幼遭喪亂失恃多苦辛嚴

父爲提携及長方來嬪先公素高尚隱居東海濱寒齋
與麤飯舉案常殷勤出腹五男兒懷抱愛逾珍艱難數
十年白髮遂如銀母雖春秋高諸兒猶賤貧諸兒雖賤
貧清白各持身異母弟復四共孫十二人幼小相嬉戲
笑樂天性真大婦供滫瀡中婦請補紉少婦學婉順有
命亦克遵但願母強健遐齡享千春

偕顧玉停沈子大集繆氏雙泉草堂贈文子武

子

大繆何温温良玉潤澤無癥痕小繆何挺挺孤柏卓立
氣溟滓鳳皇之雛麒麟兒我從金陵初見之暗中動魄
自嗟嘆欲策蹇足何由追頃遭按劍閉門卧脚未造請

心相思我有良友生同里顧與沈沈郎激烈氣凌虹顧
君跌宕腸如錦一與大繆爭飛翻一與小繆劇晨昏因
之爲介兩并合高堂燈火開清尊蘭交在臭味投分非
語言握手始一笑歡若素所敦聯吟盡作鶴頭側傾壺
屢張鯨吻吞醉歌喧譁爛不收霜寒月落驚敝裘眼前
榮辱未可判丈夫所貴期千秋

送稊亭兄入都

燕京三千里君已六七行作駒權奇汗血馬今爲老驥
當風鳴吾聞南山松霜骨久愈勁新蒲細柳紛取憐凜
凜高寒人獨敬北風何獵獵朔雪方漫漫曉起蹋凍裂
自覺衣裳單一氣通冷暖知君遠行難人生無離別那

識會合歡夜醉共燈燭朝辭隔河關願君吐氣即歸山
天公不爲留髣顏功名富貴豈長在何如骨月相團圓

送玉停入都

中林有二鳥忽作高低飛高驚苞采露低傷毛質微我
昔與君交論心百無違十日九相見每見必忘歸青松
久不落霜雪空寒威後來豈無人細數良亦稀君今振
羽翰摩天向皇畿立身非富貴當念四海飢臨岐吐贈
言握手不忍揮獨卧滄江冷青簑拂漁磯

義興城上

空泛荆溪棹城樓祗一經疎林雲片片遙露蜀山青

視徐大龍友疾

秋風落葉滿吳城良友支離見欲驚講帳同爲百里客
吟壇舊是十年兄才名自昔推徐幹病臥於今類馬卿
暗覺飛騰英氣減鄉心一點夜燈清

北星關曉泊

夜發吳江渚朝臨越水隅扁舟苦淹滯百產候征輸日
射波光動雲開嶺色孤不勞津吏詰到此爲西湖

錢王祠

唐祚丁陽九英雄割據秋兵屯八百里劔叱十三州淺
矣鍾賓客遼哉孫仲謀錢塘江上望重見起潮頭

岳墳

肅拜墓門下遷延不忍還傷心南渡事北望舊河關國

勢觀虧月軍容比撼山空餘楊太尉雙勝畫連環

于忠肅公墓

北狩倉皇日孫申為鄭謀變疑鸚鵡識冤起鷺鷥謳社稷功千載湖山土一坏嗟哉徐石輩回首似浮漚

湖上漫書二絕

高峰南對北浮雲西復東靜中觀變化應悟萬緣空
明月映三潭三潭惟一月空山學道人清宵冷禪骨

山中聞琴

好趁桃花片孤舟入漸深空山人靜處猶自有鳴琴

招愚千徐漢光顧蓀臣玉停沈子大集古香堂

分賦得新晴新綠限一東

罨院春陰付晚風鈎簾曉閣日曛曛葉肥煙暗添深碧
花妥泥融露小紅滯悶撥開生意興纖埃刮盡見清空
故人莫惜苔紋合榆莢墻邊屐齒通
換眼春花惜化工滿園新景綠叢叢應將草色一時染
不識鳥聲何處通小閣輕陰宜細雨疎簾嫩影怯微風
西窗幾樹高梧在漸漸能遮晚照紅

和鶴汀懷古四首

金陵

欲厭金陵王氣收秦皇虎視昔巡遊朱衣空使疏淮水
赤幟依然起泗州尚有江山誇險阻可憐金粉盡風流
不知狂客何多感爛醉來登孫楚樓

維揚

錦帆偶駐爲瓊花枉起樓臺作帝家此日雷塘耕寶匣
當時柳岸挽金車獨孤真悞慚皇嗣高顛何勞殺麗華
隱隱竹西歌吹路月明猶照玉鈎斜

錢塘

五國城邊血淚枯虎林山下自歡娛幸無大將違和議
恃有長江作令謨望裏神州淪北塞意中宮粉照西湖
那知第一峰頭句題破臨安山水圖

姑蘇

高臺曾此貯西施歌舞爲歡得幾時二十年餘麋鹿聚
五千人在膽新隨荒淫莫問吳王墓鯁直須尋伍相祠

剩有荷花消夏處至今猶唱采蓮詞

觀鷺粟

風光早夏最清嘉小步墻陰一角斜石鉢柳榷研佛粥
爲貧貪種米囊花

茉莉

琢雪玲瓏翠葉遮卷簾香貯小囊紗月明今夜清無暑
天女應來插鬢華

同徐漢光顧孫臣玉停雙粟毛用雨家愚千懷

一集子大雙桂軒和陶桃花源詩用原韻

陶公羲皇人而產晉宋世所記桃花源樂地隨水逝紛
紛辨有無惻惻感興廢徒令來者思焉得於茲憇我欲

營林園松菊差可藝石斷蜗爭名花絕蜂供稅一籬障
塵空門關無犬吠舊書既百讀新詩時一製比隣多素
心乘閒即相詣風情諧淡蕩意氣頽踔厲未敢希千秋
聊期近百歲嗟哉淳樸風凋喪矜巧慧方寸殊仙凡曾
何析疆界隨地可重來今人自爲蔽目窮高鳥飛送情
寄天外誰能問津者遙遙結神契

登蓮華峰次儲五汜雲韻

停我白竹兜萬綠暗林樾解衣挂蘚磴試險愛驚骨呀
然古洞穿接趺壞石髮頃刻青蓮華跣趺坐超忽羣峰
髻盤盤遠湖舟兀兀何當置茅亭聚景地數笏一滴天
池泉渴肺塵已伐願言老霞上此志日月揭

夏日偕玉停過顧亦岩南圃

携手步城南曉露沾衣履扶疎果園開清晤一笑喜脫
冠挂飛柯流目矚野卉幽尋動高興密話無時已留餐
進玉粒止渴沈朱李是時盛夏天草木鬱茂美彈指恐
零落肅肅秋風起偕隱事易諧蕪萊共鋤理三人已成
衆素心詎能幾

題畫

茆屋前邨後邨青山東角西角溪邊柳影低沈雲裏松
花細落

詠蓼

蘋荇忽無色汀花落影織地荒微豔覺秋淡小紅添穉

挂珊瑚碎根浮雲水兼欲來維釣艇鷗鳥莫猜嫌

颶風集古香堂賦

歲在丁亥夏大旱萬象燿爍成凋枯平疇龜拆稻苗死
空使紅日燒荒蕪不知災祲坐誰致郡縣祈禳師鞭巫
龍王上訴帝赫怒下敕颶母驚羣愚江豚吹浪黑霧重
鸞帆千片東西趨扶開風穴撼地軸倒捲海水漂田廬
蓬蓬并挾濁浪勢瑟瑟更與涼颶殊莽莽百物動交觸
啾啾衆鳥哀相呼巨石摧落顛虎態老樹拔起垂龍鬚
蜚廉作虐順天意雖干執法天不誅瓦溝浙瀝微雨雜
嘉禾難救童稂蘇翻愁大吏歌喜雨政府不見陳災書
嗚呼民生竟何罪天豈以此爲戲乎陰陽燮理望直北

颶風之篇嗟腐儒

紺寒閣漫書

高梧葉盡脫修竹獨受雨寒鳥一雙飛時來相對語

重陽前一日集抱觀堂即事六絕句

猶遲送酒期預尋東籬賞更喜素心多相携勝孤往
故交聯白社暮別朝相見獨我時孤飛零落如秋燕
天清木葉隕霜落池蓮枯此中秋意冷禁得晚蟲無
大宕虎頭齋潑墨寫寒景空林不見人孤亭落山影
白菊暖未開青桂香入酒月中田地荒空使岩阿有
浮浪天涯客先期別意生小重陽可惜自聽棹歌聲於

重陽後一日
有武林之行

松凌道中

桂棹當秋發江楓未落天孤帆懸半景野屋背平川采
采菱絲滑翻翻芋葉圓紫溪何處宅杞菊付荒煙

和鶴汀席上四咏并引

丁亥早秋飲鶴汀齋鶴汀以菱芡蓮子藕四詩索和予遽入郡未暇爲也重陽後之武林舟過菱塘偶得花爲暮雨臺中鏡色借春風桁上衣之句遂援筆盡和之鶴汀近與北里素仙有投膠之契故予是作托物寄情傷於纖麗聊代柳周樂府云爾

秋冷湖塘水不肥壓舟新采鷺雙飛花爲暮雨臺中鏡
色借春風桁上衣愁緒怕如牽蔓亂歡情惜與置盤違
煙波十里紅橋路晚唱從教緩緩歸

菱葉菱絲次第鋪勻圓粒粒勝雕胡羅桂溫軟新窺乳
銀浦光明又獻珠下杵聲傳疑搗藥流匙香起趁提壺
曾煩纖指燈前剝紅豆相思校得無

渚花零落暗流香結子無端透葉長紫葍半含籠豆蔻
翠房輕拆打鴛鴦江深妾願時時涉心苦郎能一一嘗
猶恨此身風浪裏輸他桐乳落書床

潔白千金未易酬瓊瓏心地似雕鏤橫陳玉腕應同夢
細翦冰絲漫織愁人愛花鮮供淨几誰憐泥浣墮荒洲
煩君一掬清泠水沆出根苗死亦休

寓樓晚眺

臨安城中木葉稀臨安城外亂山圍樓臺落日半簾捲
煙火秋風萬竈飛潮打錢塘波渺渺嵐生葛嶺靄微微
宋家南渡成何事却引凌江白雁歸

蘇堤晚坐

天陰無雨但微風水態雲光玩不窮
競唾游鯨驚淨綠
投林宿鳥下衰紅
長橋錦帶彎環樣
暮嶺南屏杳靄中
獨坐湖堤洗心眼
寒泉一盞酌蘇公

湖上雜題四首

西湖佳麗錦成堆
画角城樓待曉開
小袖宮妝連手出
高蹄邊馬逐羣來
拂面西風過斷橋
孤山落木正蕭蕭
澄波一片秦宮鏡
病柳千條楚女腰
葛嶺荒涼蟋蟀聞
西泠橋外倚斜曛
平章舊第無遺瓦
少保孤墳有怒雲

支筇細躡雲雙屐
颭葉涼催酒一鉗
如此年光如此客
幾多心事晚山青

四賢祠

衡山靈異香山佛
學士風流處士高
祠屋欹頽人跡斷
春秋誰與薦溪毛

湖上小集分賦竹枝詞一首

總宜船近北山坡
紅藕花殘空翠波
飛定鴛鴦郎試照
九孃壚畔醉人多

曉渡西湖泊茅家埠

幽尋偏喜客身閒
又放扁舟擢水灣
塔竦晴雲如擁絮
樹深紅葉似燒山
風光一歲當秋好
林壑千尋趁早攀

繫纜留連真樂地桑陰兩岸映柴關

飛來峰

聞說靈奇見果稀洞穿深杳霧霏霏石能生樹應通氣
山訝無根自解飛雪澗俯窺浮落葉霜林頻看閃斜暉
特携酒榼思孤賞先有閑人占翠微

靈隱寺後山

背看雄刹亂峰環巖磴雲梯不易攀椽子風輕時墮瓦
竹梢煙暝欲遮山高僧入定誰驚起野鳥盤空未擬還
一笑浮生成底事法堂鐘鼓喚人閒

冷泉亭

靈鷲山前石徑平流泉激激下坡鳴暮秋楓冷半亭客
清晝茶香多寺僧此處靜觀消噩夢須來枯坐洗浮名
雲林晚磬催人去縹緲孤舟煙霧橫

遊葛嶺四首

癖性頗殊衆孤尋亦勝游避喧趨徑別愛靜入林幽落
葉鳥俱下倚巖雲共留如何仙令宅蕭瑟滿庭秋
懷古意何限蒼茫獨立時已無賈相第猶有葛翁祠歌
舞繁華夢飛昇杳渺期祇應携斗酒醉筆自題詩
躋勝脚猶健雲峰次第攀倦依臨澗石臥看隔江山樵
去無人耦僧逢與我閒平生幾緹屐惆悵不能還
憇屐亭邊坐閒情入望中遠山含黛碧秋葉鬪裙紅馬
蹋銀塘影舟移玉笛風西林斜月上漠漠素煙空

登吳山

孤峰巖磔傍高城，屋瓦參差萬戶聲。
鎮海樓前尋路入，望江亭上看潮生。
氣清秋隼覺逾健，天遠暮帆如不行。
落木西風正蕭颯，捲蘆吹徹戍煙平。

鍾翠亭

雲居林麓愛幽深，次寂荒亭敞素襟。
杉檜繞闌收翠色，鐘魚隔寺散清音。
綠蘿挽袖遲遲去，青嶂和煙漸漸沈。
到此誰知在城市，茆菴桑圃繫人心。

游韜光寺贈山止上人二十韻

已從雲林游西北，轉深靚扶筇。
犖坡幽趣宜細領，菖蒲漱寒澗。
藤蘿絡古礦，萬竹罨濃翠。
氣逼日色冷，悠然道心生。
誅茆時暗省，支公從何歸。
袍履甚清整，延我憇丈室。
觀魚坐泉影，復躋雲軒高。
決皆入溟津，東海開風濤。
西湖列盃皿，錢塘抱城迴。
遙遙障煙嶺，收眼到靈鷲。
霜葉如火炳，天豈厭凋落。
先春奪桃杏，靜叅盛衰理。
梵唄浮生警，山厨進蔬甲。
新釀續清茗，半酣發吟情。
鍊句苦喉哽，請觀方外作。
所喜絕畦町，攀陟意未窮。
烏鳶盤落景，遺恨北高峰。
樵人獨登頂，殷勤虎溪別。
丁寧俗務屏，爲約重來期。
晴波飛舴艋。

湖韻二首

西湖開朗兼清幽，况當落木羣山秋。
衰楊垂垂煙撲岸。

小山詩初集卷三
殘荷颯颯風吹洲共牽小艇載美酒人生本若虛舟浮
嵐青雲白張醉眼到處皆足供勾留君不見長安聲利
客迎車塵逐馬尾誰家亭子書三休
斜陽一縷鳴蟬幽卷衣拂拂涼飈秋紅葉半零楓樹浦
白鷺矯立蘋花洲目眙心蕩頗自得掀眉撫掌呼拍浮
高峰雙插松九里尚少茆屋三間留君不見漁人岩下
宿溪魚肥邨酒釀醉著蓑衣舞未休

醉歌贈江天錦天璋

將軍督漕留京都衙齋清燕一事無翩翩兩郎君陳戲
為客娛投壺分曹爭楚漢博塞袒跣呼臬盧予也儒冠
真誤著壯心英氣空消却床頭鐵龍挂猶吼欲讀陰符
鍊韜畧酒酣請學射未老筋骨堅顏高之弓由基技巧
力二者應須全男兒何能屈項守蠹編朝廷清明四海
靜且獵猛虎南山前

和繆武子冬夜言懷次原韻

何限平生意寒宵付一觴燈殘人坐月葉脫烏驚霜寶
劍醉猶撫冰床夢不長漫愁芳草歇指日見春陽

聞故園諸同志檢校桃源草堂已有成局喜而
有作

晉宋復已遠桃源方寂然高懷吾輩在深識後人傳異
姓連松徑同心種秫田真能携手去應便是神仙

飲笠峰齋賦贈

小山詩初集卷三
三
相思何處驗相見覺情真綠酒能招我青山有此人過
從皆舊識歡笑達高隣醉後論心語空憐世態新

冬日過積翠菴

歲暮還來此三年似夢中認僧多已換看竹與前同崖
障日先隱衣寒月在空傷心舊題處未有碧紗籠

伯兄雙溪先生五十初度二首

賢兄挺奇質卓犖超常倫弱齡侍嚴父理釣東海濱天
鷄鳴扶桑照耀珊瑚新水深虬龍蟠矯矯羞凡鱗身落
隴畝間志與風雲親時命惜不遂卜居南城闔竹木旣
森秀花藥亦紛陳結交盡高隱春秋選良辰清歌裂金
石酣飲流天真時時招野客對奕開心神松陰聞落子
觀者疑仙人逍遙忘物役壽與造化隣

憶昔竹馬年未讀一字書兄來憐我頑提携向城居衣
食兼教誨十載何勤劬文翰稍親習遂竊鄉曲譽青雲
無由攀終作山谷癯風中飛蓬根吹落天之隅豈有四
方志分羣爲飢驅骨月不計恩圖報無乃愚祇愧天邊
雁成行猶不如百年兄已半我亦三十餘會當絕世務
相從憇田廬永言操杖屨寧復慕簪裾

小山詩初藁卷二

男景元校刊

小山詩續稿目錄

卷一



早春舟過晉陵冒雪遊秦園

儲六雅允菽汜雲招同陸錫三王漢階遵一陳思

洛曹諤廷家愚千澄江寓舍雅集即事

擬鮑明遠樂府三篇

代結客少年場行

代東門行

偕儲允菽汜雲蔣維御家兄稷亭遊華山用東坡

與胡祠部遊法華山韻

贈吳美叔四絕句

雨花臺

江行

泛舟虎邱

九日登赤松山

題李山人畫屏

吳門送別愚千之瓜步

紺寒閣示內六絕句

樵李曾梅廳郵寄家兄所薦秋闈遺卷見示感題
送惠仲儁解元入都 大兄煙垂霧接軒小飲

贈吳思緒習之昆仲

宿臥雪軒示家箴六 二首

臥雪軒梅

春日重傷漢舒

月夜自臥雪軒歸飲杏花下

古釵歎

江邨行

養蠶謠

題富春垂釣圖

箴六過漢舒舊居詩以送之

咏李

得稷亭家兄南宮提音

紺寒春晚

過東園

玉停下第初歸箴六招飲用韋蘇州燕居日已永

夏木紛成結為韻得日木二字 二首

荷珠

次韻答繆武子二絕

晚清夜話

家敬敷招集栗園題雙清畫屏

題家葆光中翰小照

得家兄書漫題却寄

雨中作

曉起

偶成

七月六日吳思緒昆仲招同社二十有二人集廓

然堂用東坡七月五日韻 二首

既閑堂話雨 為陳鳳翎題畫扇

寄惠仲儻庶常 游漁洋山

題曇華菴 望法華寺

紅梅 戲食河豚者

送杜望子之楚中 悼女蕙六首倣孟東野

白鬚 牡丹

紺寒閣漫題 二首 獅子林溪亭

早春同玉停雙粟過子大小飲漫成十韻

晚清軒即日 題長慶集

隨稷亭兄謁先人舊廬 題三兄邨居

示諸弟 閣上坐雨 二首

六月五日夏疇箴六携酒南園招陪稷亭兄

得朱竹垞先生凶問 納涼即事 二首

題陸侍御小影 二首 晚清軒偶示箴六

夏日毛鶴汀寄示咏蓮樂府題長句報之兼簡玉

停 輪扇歌

庚寅七月六日再集廓然堂懷吳思緒昆仲

粉壁三友圖為香濤弟作

南園池上晚酌 閏七夕

送稷亭兄由楚之粵 寄懷夏山人

送李學博還廬江 二首 寄愚千瓜步

題楊柳秋蟬画扇

樓上獨酌

題徐秋槎僧裝小像

過戴高士南枝舊寓

既閑堂分題陳白陽雜花畫卷

二首

牡丹
蕙

秋日題桃花楊柳畫扇

感興

溪閣秋晚

贈家冰菴太守

平生一首懷家兄

沈二以美醞見餉詩以謝之

次韻奉酬冰菴見贈之作

小樓夜雪

雪中懷李山人笠峰

雪霽見月

冰菴有哭弟之戚詩以慰之

探梅

游元墓冒雨至馬駕山

泊舟坎下飲郁氏臨湖草堂

宿夏山人琴山書屋

曉度琴山至和安山

蟠螭山石壁精舍

潭西

記得

懷舊

家閩石進士招集善學齋感賦

新居即事

題愚干詩稿後

午睡

寄笠峰

游準提菴

海印菴大樸

寒鴉篇

寄楊文叔都門

送家箴六孝廉入都

寄玉停

卷二

和玉停酬愚千韻

題橘

稷亭兄粵遊初歸出荔枝酒飲客即事

殘冬

立春日作

人日集涵古堂懷玉停用高達夫人日題詩寄草

堂分韻得日字

山橋夜泊

書所見

曉登支硎

報恩寺留贈霜公即用霜公進寺口占韻

由支硎山至瀆川遂泛太湖

積翠菴即事 二首

吳門舟中送稷亭兄還朝

稷亭兄口占賜和疊韻再送

花朝雪用愚千韻兼示香濤

早春雜興用杜春日江邨韻 五首

東園觀梅

落梅

咏柳

潭影軒觀杏

香濤招飲玉蘭花下醉歌

春陰 四首

南園即席

月下索飲

題粉梨畫扇

櫂歌四首題香濤園中小舫

春盡日

毛學博一粟菴雅集即事

漫成四首與香濤因中心初夏鶴來堂雅集賦

毛用雨託疾不赴鶴來之招詩以調之

晚庭即目 偕懷一城南散步

予為香濤作櫂歌四首用雨兩和之因疊韻戲示

兼寄香濤 芍藥

呈吟社諸公 醉中示愚干

寄家箴六庶常

家兄還 朝稍後不及散館詩以慰之

愁 四月三十日漫書 四首

寄徐亮直惠仲鶴兩編修 二首

夏五南園即事

西田公入相寄示晚清庶常

東軒新暑 六言示香濤

寄玉停 二首

七月十日毛菘園携尊招集隆福寺筠上人禪房

即事五首用少陵荷淨納涼時為韻

感書 送子大入都

送香濤入都兼呈稷亭兄 三首

吳正子招集風雨菴觀牡丹 四首

新麥

東山書屋雅集賦得燒筍

家是穠招集畫松堂納涼即事

陸尊光招集觀蘭 二首

玉停枉駕夜話即事 二首

奉訪唐銓部東江先生賦贈 二首

十七夜秋槎招同鶴汀南溪小集

題畫二絕

次韻奉酬東江先生枉贈之作

小春

寄子大都門

聞家冰菴被薦賦呈十韻

雪中招玉停雙粟

有詔搜求實學聞家相國欲以賤名入啓事因

年不及格而止題詩志感 四首

次韻奉和家宮詹拙園芍藥 六首

答家檢討箴六

歲暮憶舊 七首

虞山孫徵君赤崖
萊陽姜高士學在

同里顧文學西齋
家汲園先生

山陰戴遺民南枝
莫釐張山人懋齋
吳門范廬州聲佩

候潮海上

題陳北溪詞稿後

秋涯檢討座上題層嵐曉色圖贈王石谷

賣屋詞

次韻題杜雲川太史花雨填詞圖 三首

題王石谷枉贈秋江漁樂園用前韻 三首

讓木齋獨坐

留別晚清太史

醉中留別愚千

樂郊園雜咏 十二首

專齋

香綠步

烟上

掃花菴

清聽

畫就

揖山樓

涼心閣

紙窗竹屋

翦鑑亭

遠風閣

藻野堂

吳門喜遇謝二皆人

卷三

北行道中雜詩 四首

旅店壁間見同里髯道人畫竹

車中口占

任邱道中

望見西山戲作

贈家司農麓臺

次韻奉和張太史匠門種花詞 八首

花燭詞六首為楊文叔太史賦

咏史詩 三首

送顧太史秀楚南還即次留別原韻 二首

秋夜惠天牧太史寓齋小飲即事

送楊孝廉沛公歸蜀中 德清閣學索題華山圖

送家樹宣監司之任楚南

奉贈孫太常莪山先生 送曹秋坪南歸

送陳季方南歸

同熊皆立沈興之馮夔颺顧玉停夕佳樓小飲即

事

傷吳進士振西

曹進士亮疇招集蔣員外寓齋即事

送未巖殿撰省覲榮歸 四首

題南溪青蓮如意圖 送南溪之柘城

顧蔗田六十初度

送馮文子明府之任秦中 二首

夜坐感懷呈張莪邨太史 二首

疊韻呈黃太史退思 二首

奉和仁和先生新拓書齋倣樂天體詩四首並次

原韻

暮冬新月和博蒼崖韻

次韻奉和西田公南書房 賜膳

家葆光之任邵陽時屬楊子鶴寫山行雪霽圖丁

酉春再任龍巖為題短古三章以當折柳

題畫

盤石菴即事

京師歸未匝月別內赴閩中文幕

雪中陪李學使芝麓遊西湖

友清軒與王孝廉中安芟治佛桑

歲暮示同幕車端平 題蘆雁圖

吳興郡丞高乘亭三十初度 四首

春雪

寄愚千并示玉停

愚千次韻枉答再寄

愚千再疊韻枉寄仍依韻答之

愚千連疊韻枉答四疊韻卻寄

愚千聞南闈信後五疊韻見寄并示諸同學余連

疊韻答之并示北闈獲雋諸君 二首

七疊韻寄愚千并示蓀臣用兩雙栗習之

八疊韻寄愚千并示嗣宗行表

九疊韻追悼陳思洛姚鐵華

將赴中州文幕留別東江先生 二首

題徐太僕泰掖先生遺像

題九峰三逸圖為雲川太史作

陳州陪蔣學使省菴遊蘇圖

次韻酬項雪邨 雙柏行

次韻酬莊麗農見懷之作

雪邨用麗農韻賦旅懷見示依韻和之

客中題畫梅

將赴懷州同諸友與雪邨話別

次韻酬雪邨見贈之作 贈白門友人 四首

和麗農別諸友韻 二首

麗農雪邨疊前韻枉贈酬之 二首

歸舟再疊前韻示麗農 二首

孫子逸依韻見贈三疊韻酬之 二首

岸水謠 題仇十洲畫馬 四首

重題長句

小山詩續和目錄
十
狷狢小女歌為杜房芝賦

池魚嘆

題沈白淩先生全唐詩選

望雨

喜雨

秋日過朱大端揆齋小集即事

題倪高士漁莊秋色

涇東草堂觀老桂作歌

暮冬獨步東園有懷

冬日過桂軒太史

題邵四履九濯足圖小照

送維揚張太史良御南還

漫成四絕示王進士隆川

題儲五汜雲金陵雜咏後二絕

題汜雲浮青水榭圖

次韻酬繆桐邨

次桐邨又題韻絕句

二首

十四夜月

十六夜月

別澄觀相公

別晚清太史

次韻答桂軒太史

二首

寄穎山姪用前韻

二首

喜逢許二子遜

卷四

鐵簫歌

三首

澄觀公和詩慰留疊前韻

酬黃石牧太史枉贈四絕句次原韻

酬姚魯思太史枉題中州所製青絹樂府四絕句

次原韻

贈王忠安選鈞

後遊仙絕句示鄉林雲墀行表漢忠

四首

次原韻酬陳大樹滋枉贈古詩

五首

再贈王忠安選鈞兼示姚魯思姜賦山俞尹思三

卷四 太史

宮庶李芝麓先生和余侵字韻詩枉贈疊韻柬謝

鷓鴣次汜雲韻

二首

見子遜詩有江山無太白寥落一千年之句愛其

豪興不減青蓮足成一律贈之

示沈進士芝岡用鼃補之廖正一贈答詩韻

贈明史館胡大襲參一百三十韻

題楊三笠乘江天一笠圖次韻

再次韻題疊紅吟卷後 題姚四心求采蓴圖

為桐城方十九引除題載書圖

題金粟道人玉山名勝集

古詩三首答子遜

寄孫雲含

題涼曝圖

二首并引

送秋涯檢討南還四絕

次韻和陸香林看花絕句

四首

題畫梅

經香像菴遺址弔烈尼鳳姑

桂軒太史服闋還 朝意欲索余文以為贈憐余

病不能作屬題二十字小詩勉賦以應之

雨窗雜書示潁山素威兩姪 三首

桂軒書猗蘭操一篇見贈作詩報之 二首

壽西田公八十 冰菴太守八十壽

哭族孫仲齡 寄園文讌

寄懷格菴禪師 秋影軒觀荷

秋影軒即景 感題 二首

包山山人携見懷詩過訪次韻酬之 贈鍊師中隱子 四首

小樓晚眺 寄外弟山中

秋日漫成

次韻寄答笠峰山人 秋涯檢討齋觀崑山石歌

次韻答寄桂軒太史 疊韻寄懷陳大樹滋

疊韻寄懷許二子遜

疊韻寄懷繆文子武子兩編修

代中隱子轉索愚干贈句

秋圃言懷 雜書六言十二絕

摘豆 古意

秋日過愚干齋觀文石取揀存數枚以歸賦謝 三

十韻 重陽日候雙栗閒步

諭貓三十韻 花下醉吟

無隱林桂花下小飲用前韻

題式玉詩卷 過吳氏溪亭觀木芙蓉

南溪憶舊 二首

南圃憶舊

暮秋偕雙栗散步東城作

過香濤弟潭影軒觀東莊作畫 四首

題愚千顧烈婦詩後 示少川禪師

少川枉酬四偈依數重題却寄

為甘泉員外題蒼山紫塞及杏花時節在江南兩

畫冊 二首

次原韻奉酬西田公枉招北上之作

暮冬即事 二首

小山詩續稿目錄終

小山詩續彙卷一

婁東王時翔抱翼著 原字
臯謨

早春舟過晉陵冒雪遊秦園

孟春始行邁密雪阻輕舸推篷看雲巘白馬騰駢駢
山本秀絕茲日彌璨瑳其下有名園清遊乃無我塵務
百勸懶幽興一發果踏冰足凌兢一徑趨磊砢入門瞰
澗潭新柳柔絲韁洞壑轉森峭泉聲喚人坐的皜寒梅
拆翩翻凍雀隋氣陰竹色靜地寂松濤播颯然不可留
日暮黃雲鎖

儲六雅允敬泥雲招同陸錫三王漢階遵一陳

思洛曹諤廷家愚千澄江寓舍雅集即事

二月客暨陽逆旅無人知春鳥弄花雨求友聲正宜亭
亭三珠樹來從畫溪澹招邀四郡士素業抒心期諸公
文章伯意氣凌虹蜺正聲久茫昧高譚咸振奇相與棄
俗尚名必千秋垂予性頗淡蕩但能傾酒巵谷蘭吐幽
萼江梅綻寒枝遙遙白雲屨悠悠使我思

擬鮑明遠樂府三篇

惠仲儒顧麗天招集分賦

代結客少年場行

輝輝白鬪袍弓箭常在腰支屈左右臂射落雙飛鷗忽
逢心所契相携入酒肆不顧當鑪人把杯談意氣烈士
性命輕一諾重平生殺人非已仇千里不留行凶命豈
畏死猶擬建勳名事往無遺跡歲徂若東川高視送飛
鴻火色多少年為我謝少年裘馬空翩翩

代東門行

飛晷不可結白髮亦時生壯夫輕遠別貧士甘薄情一
灑牽衣淚仗劔出門行行日以遠風逐蓬根轉暮投
煙邊邨曉起星中飯不能加餐食但見衣帶緩械械寄
生草長依惡木根棲棲異鄉客托跡向誰門狗盜賤齊
士鼠腊羞平原願永舖糜志歸全骨月恩

代昇天行

振策凌丹梯拂霞眠翠巘溷跡亦已久學仙母乃晚地
上自難居不獨嫌世短真人翳鳳皇冉冉空中翔三禽
貽寶訣銘骨未能詳宛宛金鷲蓋煌煌靈芝草餐之尚

苦飢况欲求不老跡晦與世遠道超離俗心蒼然煙霧裏覓影誰能尋蓬壺竟何處海水猶蹄涔

偕儲允茂汎雲蔣維御家兄稷亭遊華山用東

坡與胡祠部遊法華山韻

朝市雲林劃爲界清遊宜接高人派短棹尺猶蕩綠波
透窗眼落青山快濃陰夾道攝衣行激激風泉散砰湃
搜奇不歷衆所經別穿蒙密輕險隘攀枝欲鬪猿鳥捷
隕石擽與煙雲壞長嘯振谷山魈藏狂歌擊樹樵人怪
絕頂風多晚更寒懶去猶迎殘日曬下山邨店酒旂飛
碧筍羹香雜肥薤圓月當杯光潑水薄醉頽然脫天械
况值欽欽磊落人高譚快意如爬疥一鉢羞言龍性馴

萬里何妨鸞翮鍛丁寧遂結五嶽期慎莫推辭兒女債

贈吳美叔四絕句

騷壇雄伯憶當時祭酒文章後世師百尺高梧清蔭遠
琴材長養到孫枝

鍾儀悲與昔人同庾信江南賦最工聞說海棠花落後
老年彈五在東風

西齋佳句也應傳小本偷鈔十五年今日仲容相對處
文星已送入重泉

尋山准擬辦青鞋浪踏槐花問月堦一自清言逢叔寶
塵容不敢照秦淮

雨花臺

雨花無復見高僧
劫後荒臺試一登
萬里清江沈落日
暮雲回首看鍾陵

江行

燕子磯頭晚煙合
金山寺裏曉鐘撞
蘆花雁起楓葉落
涼月一蓬人渡江

泛舟虎邱

畫槳弄雲水風清
七里塘秋花照茶
椀高樹落僧房不
盡遠林翠悠然暮
色蒼解衣思一醉
處處酒餅香

九日登赤松山

霜寒木葉脫山秋
露真形石骨撐磊
磊風泉響泠泠挈
杖呼我友試險升
青冥牽蘿引高步
騎雲摘天星俯矚

吳越盡沆漭連滄
溟澄湖八百里銅
鏡磨空青我方局

樊籠譬若鳥翦翎
高僧施寶筏洗眼
宜心銘

是日古潭上人
諷予以太湖洗

光龍山跡已晦峴
首涕徒零何如從
赤松終年茹芝苓

題李山人畫屏

嵐光不染微雲江
影欲涵秋樹釣船
竝宿蘆灣莫被樵
風吹去

吳門送別愚干之瓜步

十年歸未得正欲
細論文歸計今方
定江行却送君

紺寒閣示內六絕句

金陵文戰又空還
靜掩蓬扉綠水灣
莫道綵毫無用處
細君睂上畫秋山

小山詩集卷一
四
茶鑪聲沸篆烟消鎮日煩君伴寂寥無事捲簾相對坐
一林紅栢晚蕭蕭

落木棲鷗噪夕陽添衣冷澹立空廊墻根喚醒秋棠睡
欲問西風幾許涼

鸞鏡花枝近畫簷兩人隱几鎖眉尖愁心試看初三月
幾夜黃昏漸漸添

叢叢菊影落屏幃沽酒憐儂心事違破費金釵邀一笑
綠窗人擘紺螯肥

揅醉妝臺共一尊文章福命兩難論傷心官燭三條樣
別點銀缸照淚痕

檇李曾梅廳郵寄家兄所薦秋闈遺卷見示感

題

古井不波深復深誰抽五綵試神針嫁衣傳看秋閨淚
傷盡錦機寒女心

送惠仲儁解元入都

覃史研經二十春祇憑三語賞音新明年臚唱升金殿
親說江南第一人

大兄烟垂霧接軒小飲

吾兄高寄南城下水竹脩脩舊隱廬玉子半枰敲淨几
爐香一縷上殘書晝閒杯泛松花酒春暖波浮柳葉魚
幸是嘯歌聯棣萼西林斜月晚煙疎

贈吳思緒習之昆仲

兩葉珠槃仗捧持，雙丁才力又如斯。誰爲知劭知虔者，
無復慚卿慚長時。花發卷簾春命酒，客來燒燭夜稱詩。
烏臺玉署君家舊，猶滯寒江理釣絲。

宿臥雪軒示家箴六二首

已歸仍寄食，猶未是真歸。別館疎燈照，荒廬短夢稀。
溪陰魚子上，泥潤藥苗肥。麤飯何時足，抽書守竹扉。
寒氈分片席，白社舊同林。一夜獨聽雨，十年都上心。
春花紛吐豔，時鳥亦流音。牢落終如此，憑君酒盞深。

臥雪軒梅

盤折依庭勢，其如屈曲何。香偏從冷透，枯欲借春和。
月色自然好，雨聲無奈多。墻邊一步地，留我破青莎。

春日重傷漢舒

當年曾有約，後死託無窮。諛墓誠何敢，哀詞總未工。
春愁新草色，花事落梅風。一卷開香雪，寥寥海國空。

漢舒香雪

詞極工

月夜自臥雪軒歸飲杏花下

樓前雙杏樹，枝葉相交加。飢驅主人出，空自年年花去。
年寒食從郡返，一片正隋春。衫斜遶樹，不能止手拾殘。
朶三咨嗟，今年爲花不作客。託食仍蒙故人惜，日日捨
之去。見樹面生赤，正月蓓蕾萌。二月香苞成，春風淡蕩。
春雨細，小紅半坼窗櫺明。二月十三夜，爛銀盤飛水清。
瀉晚鐘聲斷，忽思家却恐新花便凋謝。瓊街踏影夜深。

歸月壓繁枝恰低亞玉膚細膩紅綃衣香頰輕酣光暎
射欲嫌寒梅太孤瘦豈侶天桃逐風嫁山妻稚女睡初
熟喚起同來立花下更遣赤脚婢提壺敲隔舍問有濁
酒不溜溜喜新醉籬邊翦春韭盤蔬稍支架月明花又
笑此夕真無價一更二更月當天花枝冪歷籠輕烟三
更四更月西隋濃露高低滴花朵五更無月但微風燭
影搖花淺淺紅吸盡殘杯鋪小簟醉魂猶落杏園中

古釵嘆

已下三首擬
張司業樂府

湘君昔南游衡竚墜蒼梧泥侵苔蝕斑竹底三千年後
逢樵夫無人知是舜時物但道形製與今殊君莫愛巧
妝飾館娃宮前埜鹿鳴雷塘墓上耕牛立願隨賢妃脫
永巷不願高髻攏新樣

江邨行

江水清海水濁海潮東來泥漉漉朝輸暮瀉無停留灌
漑農田望秋熟連年旱澇由天災鑿渠蓄水胡為哉急
流泥沙隨水去緩流泥沙塞水路菖蒲葉放蘆芽生雨
足正好勤春耕官今要儂建水閘其奈皇天不識察

養蠶謠

蒿葉青桑葉綠吳蠶蠕蠕動萑薄小婦携筐襪雀飛鶉
鳩亂啼紫椹熟溫風密雨遮深房地爐熾炭融冷光三
眠常忌醉人見邨巷家家斷酒漿櫻桃紅過杏子黃茶
旗盡展麥垂芒眼前百事俱屏却但望雪色新絲長簇

山高高侶屋捉蠶上山去花貓捕鼠慎勿觸老媪拂布
裳拜向馬頭娘暗祝今年多做繭要抵舊債充官糧繰
車絡絡杼札札織成綾錦空羨殺君不見採桑貧女凍
欲死富女裁衣疊箱裏

題富春垂釣圖

至竟雲山画裏青投竿江水憶沈冥少年誤識騎牛子
却遣先生應客星

箴六過漢舒舊居詩以送之

寒食梨花節郊行命筍輿應過張祐宅爲問馬卿書葛
帔流離日塵帷寂寞餘遙傳故人淚相與滴烟墟

咏李

春園發細萼翦雪暎清宵結子疑芡苳吟花比葦綃無
言風裏態微笑月中嬌不遇蕭陳侶何人賞九標

得稊亭家兄南宮捷音

好信傳中夜泥金附鯉魚紅箋喧姓氏白髮慰門閭驥
足終千里貂裘剩一書阿奴空碌碌慚愧似蟾蜍

紺寒春晚

散誕依林石風光欲晚春新陰遮小閣白袷隱閒身花
盡香生竹鶯來語似人雨深茶椀潔不飲洛陽塵

過東園

風物東郊勝名園萬綠新偶來尋水石只見鎖松筠鶴
化羽遺柵僧孤山作隣蕩舟幽興極落日照雲巾

玉停下第初歸箴六招飲用韋蘇州燕居日已
永夏木紛成結爲韻得日木二字

有客京都游獻玉期萬鎰彷彿卞陵陽被刑已非一歸
來愧家老咄咄坐深室空令識寶者望氣傷鬱律物雖
貴世用尤畏喪本質君今抱璞還無得固無失屈久當
大伸連城價轉疾況復當年華頰紅髮如漆故人展清
讌朋好歡笑密爲樂誠多方聊用永此日

孟夏草樹深桐陰覆軒屋好風振枝柯葉葉雨如沐時
有黃栗留飛來轉新曲江魚鱠切銀園筍煮削玉櫻顆
圓而紅豆莢長且綠欣然酌華觴風物家鄉足勸君須
盡醉可以忘榮辱胡爲不痛飲皺纈生倦目壽比堅石
難面學凍梨速置彼搜林斧全我不材木

荷珠

漢濱遺佩鄭郎迷素實黃螺約略齊天乳結胎烏翅展
水風拋彈綵禽低擎來碧玉盤中走滴作紅鉛粉上啼
最是招涼當暑月歌喉一串落前溪

次韻答繆武子二絕

讀君桐華篇正及桐華發夜半攬衣起步看桐華月
抽刀斷江流江流常不絕借問一心人何以悵離別

晚清夜話

梧竹當軒影清燈夜話時暑風無墜葉夕露在高枝坐
久殊未竟心長各自思寸衷難共喻何必不相知

家敬敷招集栗園題雙清畫壁

竹邊寒梅五月發春風到此何其遲君家新粉雪色壁
令我一見生驚疑苔枝鐵幹互蟠結露梢煙葉紛離披
昔聞蕭協律畫竹甚秘重忽寫十五莖換取一百八十
六字知何用又聞王元章畫梅詩更狂羌笛吹他不肯
下白雲萬頃號作梅花王壁上雙清兼二美默坐觀之
不能起簣管谷瑪瑙坡此圖髣髴丹邱柯青梅紫筍盤
中多主人置酒請我歌醉來把燭重摩挲杏花如火燒
林熱雪壓風搖奈爾何

題家葆光中翰小照

采香桂闕升雲端壓枝杏蕊春風寒鳳皇池上紫薇發

一笑掉頭不要看蕉團淨疊輪珠圓茶鑪經卷思逃禪
謝郎東墅豈終老高臥聊同捉鼻年

得家兄書漫題却寄

玉堂清暇却思家烟雨江南道路賒為報舊廬添竹樹
早梅猶未畫梁花

雨中作

傍樹為家織竹門雨飛蛙竈斷晨飧西窗一笑牽蕉葉
據几閑臨屋漏痕

曉起

曉起展清步籬門一徑斜側身叢刺合放眼密陰遮新
雨霑瓜蔓微風落豆花此時幽興極真不蹋東華

偶成

貧豈爲吾累其如百事生奴輸蕭穎士婢惱鄭康成枯
樹蟲偏蝕低花草易平靜思翻欲笑天際白雲輕

七月六日吳思緒昆仲招同社二十有二人集

廓然堂用東坡七月五日韻二首

復此文讌始相與屏衆務緬懷茲堂間高會知幾度琅
琊昔二美聲華沸如煮司成及都諫能續千鈞縷名父
遺雛凰開尊滴秋露羣子各勉旃江湖日東注

秋入氣稍涼晴老雲未上好風溪南來新月屋西亮削
瓜沈綠開擘桃紅汁漲深杯儘留連清言轉遺餉臨分
警節物草木颯已愴願茲時過從高興激頰放

旣開堂話雨

同馮簡綠沈白淩馮子孟容沈子
大繆文子武子分韻得十蒸

落拓尋知己臨觴百感增半年雲外樹一夜雨邊燈覓
句眠重起論心醉可憑平生文酒地猶自得飛騰

爲陳鳳翎題畫扇

疊嶂排秋屏高泉落寒玉閑心與白雲飛入山腰屋

寄惠仲儁庶常

曾聞柯學士種柏在西堂玉河橋上過借問可宜霜

游漁洋山

自識漁洋山十年望中青佳遊已屢阻風濤怯揚舲春
淺餘冬寒倚酒爲此行山靈鑒予意暗使波神迎秀色
展雲黛激湖如鑑平坡陀弭輕楫壺榼尋幽扁迢迢趨

徑誤得睹所未經竹柏既怡性茶桑能養生居人不知

愛過客空高情煌煌容臺公瘞骨無碑銘山中有董宗伯墓遥遥

新城叟祇挂詩中名謂漁洋山人終將絕勝地付與曇華僧

題曇華菴

滄波杳渺山參差道人無事棲禪時春寒不捲梅花帳
壓屋白雲眠未知

望法華寺

漁洋水深龍作潭漁洋山盡見雲菴老僧為指法華寺
更在遥遥青嶂南

紅梅

竹外嫣然倚玉妃桃花嫌俗杏花肥波橫瘦影朝陽寫

風約清魂絳雪飛東壁好留殘句在西岡應乞一枝歸

紅羅亭裏繁華別莫道師雄舊夢非

戲食河豚者

蘆牙初茁早春天青果紅薑佐味全莫道河豚容易食
賦中須熟左思篇

送杜望子之楚中

杜子當春別歸期指素秋綠波江上望黃葉意中愁賦
草彌衡墓詩題李白樓故園多酒客莫戀習池遊

悼女蕙六首倣孟東野

雨中雙鷓鴣引雛向人飛亦不論雄雌雛多覺容輝我
有七歲女但見燒殘衣盤中置梨栗日夕待汝歸

風多樹傷枝葉稀樹傷心開此頃刻花鑄蒂無黃金七
年亦不久積淚良已深堦前抽孝筍拂予浪浪襟
短髮梳鬢髻知愛明鏡光曾顧抱者言安得如孃長纖
質隨風花化作林煙蒼掘根問所由直木無芬芳
翦棄骨月愛鑄此剗心刀割恩竟何時增痛聞孃號綠
火乃敲石因明遂焚膏所生適自累誰扶天之牢
宛轉垂死泣絮被留啼斑憐爾含凍餓未病骨已孱獨
於貧苦中少小能怡顏天屬綴心孔豈止藏牙關
結襦已逾紀終隨浪鳧雙回顧他母雛寸心激風江占
數天或有衡理吾未降呼婦且對坐默懺東西窗

白鬚

東風吹愁根種作頷上鬚一莖白皎皎勢已壓衆烏吾
年甫三紀鬚白不早乎人有早白髮早白鬚則無一白
可盡白盡白只須臾兼恐白未盡骨朽綠髓枯寒銅驚
病婦照出水絲麤當窗請摘去爲計徒區區摘鬚不摘
愁斫樹留根株不如畱此鬚以爲達者模

牡丹

鄭衛風詩扇淫氣草木流穢生洛陽唐宮移入妃子笑
嶮巖蜀道奔三郎亦如阿廢恣歡樂天以瓊蕊徵妖祥
後來戎葵角多少散播萬本方繁昌朱門購植築華館
疊石高下環雕廊竊春偷暖爛熳拆綵旗繡幄誇濃妝
笙歌鼎沸喧俗耳酒肉狼籍充肥腸豪奢能幾花易主

非惟破國家亦亾韓弘邸第命劓去所以不效兒女狂
昌黎學道賤幻術辨鐫詩句誠荒唐更聞白傅妖花語
春銜笑殺奔車忙世人愛此空有眼浪奉稱號何煌煌
淺根柔幹極細小葉麤花大徒敷張遠觀似豔苦無韻
近嗅有氣非真香濂溪賢人子周子以蓮爲說惜未詳
吾生寒儉厭華侈欲著花史閑評量孤山梅妻林處士
東籬菊友陶柴桑細別貞脆分雅俗此種不復煩遮藏
舉肥相者應怒我一株方擲千金裝

紺寒閣漫題二首

汲汲無家客終然愛故林三間溪閣小幾載夢邊尋藏
石愚人見棲雲野鶴心不才應獨棄非敢薄華簪

清抱不入俗窮愁也自嫌午煙吹桂玉暮雨滴蘆簾
葉凌冬秀桐陰入夏添閑心消物理濃睡下蘆簾

獅子林溪亭

風皺春溪鏡影斜可憐紅雨落禪花但須識取波心月
北秀南能是一家

早春同玉停雙粟過子大小飲漫成十韻

水竹城南路閑中好共尋蘚堦通宛宛梧院靜悒悒濃
綠含微照低空度晚陰棋聲幽鳥熟畫卷亂峰深龍籜
搜篁徑魚腮上柳林老饕狂客態小酌故人心談劇詩
難就形忘酒易斟傾壺開一笑寸燭抵千金率爾成良
會悠然展素襟何當携手去結隱碧山岑

小山詩集卷一
晚清軒即目

茗椀閑消夏日長
桐花開處隔簾香
中庭時有熟梅隨
正及好風生午涼

題長慶集

李杜文章是我師
玉川昌谷更爭奇
近來愁病心情懶
一卷香山自在詩

隨稷亭兄謁先人舊廬

重來栗里認遺踪
頭白先公記舊容
細檢門前五楊柳
四株蕭颯一株濃

題三兄邨居

傍水籬門草徑通
乳鶯雛鴨綠蒲中
轉頭暗憶十年事

輸此櫻桃樹下風

示諸弟

負耒長耕東海濱
憐予方悔著儒巾
祇將舊業還清白
莫道爲農不及人

閣上坐雨二首

抱閣清溪漲橫窗
白雨來瓦溝
聞颯沓墻角
看滌洄蓮葉沈
難起桐花冷
不開披綿當盛夏
撫几問殘杯
索月重陰結孤輪
何日迴三農
方望歲
調燮在中台
小似黏蝸舍
斜如泊釣船
泥深門閉雨
炊斷竹生煙
漏已頻移榻
飢仍擬拆椽
池寬嬉水馬
林濕抱瘖蟬
莫羨魚多樂
空憂螿未遷
刹那身世事
靜坐結初禪

六月五日夏疇箴六携酒南園招陪稷亭兄
門庭七葉舊相因載酒園林盡主人引徑紅橋排雁齒
俯溪碧檻照魚鱗喜隨羣從歌華萼閑聽幽居話洛塵
劇飲不須論斗石雨多六月暮寒新

得朱竹垞先生凶問

文星光暗秀州虛欲置生芻玉不如避世暫從金馬隱
退身終老碧山居薄田僅取供麤飯清俸都持寫異書
腸斷白蓮橋下寺譚經華髮已蕭疎

納涼即事二首

密林包晚暑危閣隱殘霞竹氣生新葉桐香落小花隣
溪銀暎網遙浦雪翻車免憶山深處城南亦可家

已聽疎鐘斷重聞遠笛吹星繁初月夜露滴未風時清
黃頭網茗閑成口號詩明燈觀細字默指向秋期

題陸侍御小影

人歌驄馬御史自許山林隱君綠髮不沾春雪青眸閑
看秋雲

玉局朝雲爲伴維摩天女同禪漫話綠章舊事且書裙
帶新篇

晚清軒偶示箴六

嘉樹生圓陰葉葉綠未破輕風蕩疎簾抽書相對坐深
趣默自領紅輪忽西隴

夏日毛鶴汀寄示咏蓮樂府題長句報之兼簡

玉停

吾鄉人人愛詩篇周秦樂府獨不傳抽花儷草紅配白

香雪擅能三十年

家漢舒詩餘極
王集名香雪

東街近有洗桐子

玉停自
號也欲

繼香雪精覃研予也鈍拙不識字雙手但解耕山田遮

邀入社譜宮徵窘束頗類啼窮猿鶴汀古歌追杜韓今

體亦在錢劉間忽收波瀾入詞卷新豔儼如王碧山雄

辭麗製俱占却殆使來者不復言六月盛暑紅日懸溪

亭風涼歌采蓮銀牋小草得快讀却似清冷澆瓊泉莫

釐峰脚消夏灣玻璃萬頃花連天相携好約洗桐子扁

舟一葉香中穿重拈水調相唱和吳兒折斷琵琶絃人

生作達古所賢浮漚電火真可憐君不見香雪詞人窮

到死十五嬌兒種木棉

輪扇歌

集稷亭兄
古香堂賦

客熱可奈何聽我輪扇歌左琴右劔形製古堅木精鐵

相支柱雪色鸛鶴拔勁羽插成六翅輕欲舞金烏銜火

盤空中燄燄萬里燒雲紅蜚廉罪深帝不赦敕縛囚閉

無由通是時阿兄方設客汗如白雨不能食浮瓜雪藕

竟何益發狂大叫歌苦熱爐煙不動林梢直於焉顧童

子命取輪扇來輪兮扇兮真奇哉蓬頭小奚長五尺天

地噫氣手所出赫赫祝融威乃失中樞旋轉圓影移有

風徐徐復微微颯然涼飈吹葛衣蒼蠅倒退不用揮銅

瓶水花香亂飛鬚髯飄揚髮襜褕肌骨蕭爽心清夷快

樂不言中自知主人勸進酒衆賓盡忘歸由來萬物以
時貴此輪此扇當其時我思物理起三歎會見地爐重
簇炭

庚寅七月六日再集廓然堂懷吳思緒昆仲二時

吳入都其姊倩杜望子作
劇座中毛鶴汀年最長

尊前事事去年同只有機雲滯洛中舊雨共來尋杜子
論詩仍得聽毛公星高北望懸珠斗月淺西流下玉弓
兩地故人空記憶依稀牛女路難通

粉壁三友圖爲香濤弟作

一葉秋風始黃落幽軒蒼翠忽滿眼松老爲龍樹樹鱗
梅枯立雀枝枝蘚更兼竹勢欲千尋未集鸞皇佳實晚

何人併寫歲寒姿浮豔穠華能盡剗園中紅槿好顏色
朝開暮落無心管相看不厭只此圖面壁繩牀終日展
南園池上晚酌

丹柰開園熟銀鱗出水肥晚涼池上酌一一見螢飛印
月蓮塘近懸燈竹寺微稻香門外立嬾向醉中歸

閏七夕

雕陵鵲起重登樓風露涼深景更幽蟲滿籬根偏促織
花殘竹尾賸牽牛看星處處增良夜賞月年年欲半秋
莫道近來歡會數臨分應觸兩回愁

送稷亭兄由楚之粵

北歸半載臥田廬又是江山發興初梅下欲看庾嶺月

柳邊先食武昌魚昔人難擅題樓句新語無忘獻闕書
正及涼秋宜夜坐空齋聞雁獨愁予

寄懷夏山人

褐中懷玉世誰親長傍雲林作隱淪雨沒湖田憂稅重
月涼蘿屋苦吟新幽蘭無色元生谷野鶴雖飢不向人
欲問琴山最深處可容王翰卜為隣

送李學博還廬江

泐溪溪水碧於油泐溪草堂花竹幽先生官冷心更冷
江月滿船歸去休
東吳八月鱸腮紅斫鱸搗橙煙雨中漫憶銅盤左元放
不如小住過秋風

寄愚干瓜步

美人隔江水渺渺日相思偶然逢迅羽不及寫書時

題楊柳秋蟬画扇

柳梢風晚動柳葉露晨流蟬糧供不盡秋閨獨無愁

樓上獨酌

百尺好置閑身一壺自有深味聊從枕上杯中長對柳
眠竹醉

題徐秋槎僧裝小像

浮漚認作全海蒸飯終成熟沙識得神珠繫處元來空
裏無華

過戴高士南枝舊寓

短簿祠前路遺民寄旅魂誰憐晞髮子未莖白雲邨戴嘗

賣字莖徐侯齋先生余昔年贈詩所謂猶喜諸陵無恙在冬青只為故人栽者是也今見停棺舊寓不勝慨然

既閑堂分題陳白陽雜花畫卷二首

牡丹

濃露沾枝重豐肌上酒勻春風洛陽陌何限看花人

蕙

百晦靈均樹誰人作佩纒年年和九畹煙雨對清湘

秋日題桃花楊柳畫扇

柳為徵士門前樹桃是漁郎洞口花疎雨半簾飛落葉何來春色到山家

感興

赤荆頭上釵白櫻耳邊璫美女雖有色去飾無容光所以微賤士抱義難自明言甘人易入語直人易傷中懷何耿耿佇立以彷徨握劍遶四周意氣空飛揚南山有猛虎君其善自藏

溪閣秋晚

霜林豁秋閣水蓼明孤渚澄波翳空烟黃葉下寒雨高韻屬清坐深思結疎語冷然雲菴磬日暮懷靜侶

贈家冰菴太守

東越風流守高吟萬象收靜能與景會貧不為官休人竝寒冰潔門關老樹秋幾枝龍畫戟只換一扁舟

平生一首懷家兄

平生無俗事閑作愛秋人立雨看紅樹沿溪採白蘋雁
羣含思遠鷗陣得寒新何處尋真樂蕭然只耐貧

沈二以美醞見餉詩以謝之

皎皎寒月吐凜凜涼風生獨處既不憚時序感復驚被
蒙君子惠嘉命枉柴荆綠酎發新坭青絲提玉瓶懽焉
嘗芳冽興至遂自傾十千價非重何由報來情涉園采
霜鞠一握黃金英幸免甘醴誚相期晚逾榮

次韻奉酬冰菴見贈之作

宗老今摩詰詩中擅聖名陶鎔關力學神骨是天成簪
紱襟期淡江湖氣味清萬言如水瀉百鍊得金精白雪
無人和浮雲任世爭撫謙前輩事弘獎昔賢情下拾蓬

螢細深慚芥羽輕軒軒煩玉降一一贈珠明夙昔親風
雅從茲領正聲自嗟遭困悴矢口失和平臥疾逢迎缺
懷思夢寐生鑿坡空屬望碌碌不如兄

原詩自有凌雲賦鑿坡屬弟兄

小樓夜雪

窗白天未曙風篠時聞折夜氣逼樓寒鳥栖一林雪

雪中懷李山人笠峰

荒廬抱遺經雪斷門前跡猶以城中寒日暮懷山客

雪霽見月

滴滴檐冰消凍月照清夜不就紅爐熱開簾步階下

冰菴有哭弟之戚詩以慰之

昔似四韓盛今難二陸全傷心寒被底隋淚斷鴻邊命

已歸長夜情宜節暮年遺孤勤撫鞠深足慰重泉

探梅

溪邊竹外始經過冷眼尋梅破淺莎何事春風渾別樣
南枝翻少北枝多

游元墓冒雨至馬駕山

朝日紅隱霧松徑生午陰梵鐘動古寺法雨清塵心山
梅拆未半閒者能先尋雲氣暗羣壑花光逗寒林每愛
春意淺幽興乃獨深迤邐二三里前峰轉森沈石滑趁
穩步霑濕仍登臨萬事謝不敏茲焉力所任

泊舟坎下飲郁氏臨湖草堂

言停木蘭棹提壺叩雲屋主人素未識賣藥隔山麓排
扉竟入座列席傾醞醪情遙愛師古性逸難拘俗幽庭
起徐步短墻縱遐矚春湖開半面幾點浮巒綠所愁風
色正能令歸帆速安得縛茆亭結隣來往熟

宿夏山人琴山書屋

昔我居山中常與山人遊今雖不居山喜有山人留日
夕松門暗願言於此投開軒然燈坐道從靜者求文章
多古調譚論陳前修須臾出酒饌屢告不得休稍訝雞
黍外羅列何其稠乃知孤高士情重逾俗流

曉度琴山至和安山

夜宿山下居紙帳香不已曉登山上看始悟在花裏山
南萬萬樹彌望不可止豈知過山來花更多於彼晶光

耀幽谷玲瓏日色美未測路遠近行行輒十里仙犬護
山家午爨雞聲起欲藉白雲眠灌園長已矣

蟠螭山石壁精舍

落帆蟠螭下振策入松色紆回忽平曠飛鳥去不極湖
山獻三州風瀾渺難測斧劈石壁陡繩挂墨泉直躋險
築雲扃架空開淨域昔游當暮春紫蕨曾飽食重來面
貌非逢僧罕舊識人世有羈鞅悵焉生歎息

潭西

潭西奧且曠有地皆栽梅天晴十分放正及携春醅六
浮上新閣萬峰登古臺空煙冒層林積素無纖埃人家
沒香雪壓屋繁如堆愛此幽步緩細徑多縈回有時拂
地坐得意傾深杯落日弄寒條清興方悠哉

記得

綠桑半翦蠶三眠春酒正熟紅櫻然記得山居好時節
小樓風信棟花天

懷舊

山人張懋齋
歿已十年

寄跡山邨爲卜隣風情猶記老遺民斜坡犖确紅藤杖
短髮飄蕭白氎巾得句常誇詩律細銜杯只怕酒家貧
今來翹首門前路觸撥傷心已十春

家閭石進士招集善學齋感賦

昔時文酒此留連腸斷迴車十二年獎飾自慚辜武子
風流重喜對斜川履綦約略尋遺躅詩卷依稀記舊篇

美酒名花空一醉歸來清淚滿燈前

新居即事

新買東城宅幽仍與舊齊綠蕪沿砌長青橘壓枝低書

笈携千里

謝凌遠兄弟自武昌來從游

漁竿借一溪譚經復垂釣何用怨

卑棲

題愚千詩藁後

君本謫仙人遠游逢賀老

謂阮亭司寇

拂衣去京國涉湘弄芳

草歸來虛白間源流日深討古思發高韻雄辭抒鬱抱
紛披四五帙把玩得奇寶味在鹹酸外心識口難道蹠
蹕邯鄲步曰予非不早雲濤隔三山何由踐蓬島

午睡

彫胡飯熟配香蕪飽後閑眠竹簟陳斜日半窗清夢斷
風吹松子落衣巾

寄笠峰

折麻望巖阿西嶺白日下何由躡高蹤從君憇松舍閱
水照雲巾尋山整煙駕相與排冥筌超然乘物化

游準提菴

寺外清溪遶疎楊一徑深入門羅野趣拂榻面城陰僧
話無塵事禪花不染心人生幾緡屐只合向祇林

海印菴大樸

招提有大樸擁腫亦參天未寺應先植何人知歲年終
無匠氏顧竟以不材全獨撫意誰契蒼蒼橫暮煙

寒鴉篇

寒鴉羣飛聲肅肅寒鴉羣栖爪握縮柳林凋落柏林空
侵晨啼霜暮翻風鷓鴣能捕魚剖葦能搜蟲嗟爾寒鴉
但能張口飢噪終何功秋鷹何來捩眼見列陣紛紛不
敢戰高飛難逐日中烏隨陽那及天邊雁吁嗟乎獨不
見郊原牧笛斜陽外一隻荒寒啄牛背

寄楊文叔都門

何須問行路之子念平生蘭臭元相合松枝有宿盟世
情輕舊識物論重時聲空谷寥寥意終期在淡成

送家箴六孝廉入都

明月蘊滄海瓊樹移蓬瀛家寶與世共送子今遠行遠
行三千里去去之燕京公卿熟姓氏五色炳華星雲磬
發金石鏘鏘陳帝廷詩書濯裘馬冰蘖資聰明輝赫
雖世胄練達殊經生小草非定論遠志出乃成空山日
延佇一慰折麻情

寄玉停

江頭臨別日樹色濃如霧天寒聞葉墮蕭瑟難爲度霜
霓侵人衣希君保貞素

小山詩續藁卷一

男景元校刊

小山詩續藁卷二

婁東王時翔抱翼著 原字
臯謨

和玉停酬愚千韻

凍雪殲伏蟄嚴飈獵枯枝羣物畏冬令孤懷耿春姿忽
聞雙鳥鳴酬畲多哀思一怨鍛翮短一愁素羽緇高下
殊未判飛集誠有差春鉏帶長翰拳足眠冰池獨無翬
舉意飲啄適今時

題橘 讓木齋小集
分韻得文字

綠葉凌冬倚夕暉白花開更足幽芬天星可識璇樞散
地氣休從淮水分三百顆惟思餉客一千株豈羨封君
靈均作頌陳王賦自古曾供絕世文

稷亭兄粵遊初歸出荔枝酒飲客即事

相見何須問粵裝
祇携名酒自殊方
纔傾淡白梅花色
細領輕紅荔子香
萬里停杯談客路
九迴揚觶洗離腸
明珠翡翠原無用
贏得親朋醉一觴

殘冬

空齋風雨悄然思
長作閑人也自宜
壯歲縹緲仍舊業
殘冬燈火似平時
紙窗待補遮寒急
土釜停炊得飽遲
莫望然薪相暖熱
祇須酒脯祭新詩

立春日作

柴扉寂寞背條風
只認山梅小蒂紅
人賜一枝新綵樹
不知誰近望春宮

人日集涵古堂懷玉停用高達夫人日題詩寄

草堂分韻得日字

初正弄氣已涉七靈辰
從古稱人日故鄉朋好相招呼
煎餅調羹坐深室
令徵前事觴咏新
共簇紅爐歡笑密
遙憶天涯薛道衡
離家半載歸難必
當年人日曾同醉
今年人日重追述
手把梅花暗斷腸
蒼茫雲水空如一

山橋夜泊

煙抹疎林似畫成
山橋吠犬亂泉聲
牽舟夜就前溪宿
沙岸一燈和月明

書所見

玉泉泠泠石上流
松風謾謾冷如秋
月低烟暝半巖火

山鬼移燈照夜遊

曉登支硎

曉日初推紅玉輪
曉雲如曳碧紗巾
敲門看竹僧未起
不作登山第二人

報恩寺留贈霜公即用霜公進寺口占韻

平生野性愛名山
竹閣苔梯趁早攀
趙老高踪空劫後
寺係趙凡夫高隱處休公詩思碧雲間
雙梅盤屈含苞冷
一澗滄泓映石閑
多謝清泉相浣濯
此中何處著塵顏

由支硎山至瀆川遂泛太湖

別僧槎棹未斜暉
淺水孤篷漾影微
背嶺雲橫山障列
催花風軟社旗飛
千家古鎮長川直
萬頃澄湖遠樹稀
會得鴟足逃世想
釣船如葉可忘歸

積翠菴即事二首

又過精藍地居然
宿昔歡提壺成晚醉
燒筍爲加餐
遠磬穿雲出清琴
就石彈稍前
憐翠色莫畏竹風寒
探歷方初旭
衰稟竟夕曛
濯殘松澗雪
夢斷石牀雲
累在應難住
情依未易分
籃輿促歸路
樵唱不堪聞

吳門舟中送稊亭兄還朝

吳閭握別手重揮
畫鷁晴江綠水肥
南國凌雲春雁去
上林遷樹早鶯飛
祥琴彈後辭楸壠
朝鼓聲中拜袞衣
從此堂前停綵服
安心珥筆侍金扉

稊亭兄口占賜和疊韻再送

離思如雲未易揮，低回春岸荻芽肥。難隨跋浪三千遠，愁見揚帆五兩飛。西日斜斜停去棹，東風拂拂上征衣。瀕行重把墳笺和，獨掩鄉園舊板扉。

花朝雪用愚千韻兼示香濤

尋山迴棹當花朝，壓江雲暗風帆飄。春寒天意苦蕭寂，細翦玉朶排枯條。沙汀微茫鷺鷥沒，柳岸阻絕驂騑驕。漁舟半橫綠蓑重，酒家斜颺青旗招。撒波鹽消類和糝，射蓬箭疾疑追逃。猶勒古梅藏玉質，豈有霞臉舒夭桃。迴飈且愛白苧舞，素女髣髴吳姬嬌。忽然長歎指畦隴，寒深麥短方未搖。去年荒稔木棉壞，海隅氣象殊蕭騷。何期春令仍冬令，陰張陽伏終難調。只今民活賴米賤，復恐水旱災禾苗。我雖無田謝耕垆，亦有生意留東臯。達哉吾弟園林主，令節勸勿辜良宵。欲祀花神速歸艇，支寒飲福開新醪。

早春雜興用杜春日江邨韻

集雙柱軒賦

經凍花多斂，迎陽草易深。未為春賞計，猶滯歲寒心。寂寞時難處，寥梢景獨尋。古人如可見，何必不宜今。遲遲回淑氣，急急感流年。節候欺梅雪，光陰落澗泉。殘書編幾絕，短榻坐將穿。亦有探芳意，晴和待好天。晚寒天欲黑，薄醉面微紅。殘燭三更雨，幽軒一夕風。林芳牽野客，溪漲約漁翁。漫把人間事，來填空洞中。老屋剛臨水，閑門半染苔。鶴諳雲海路，櫟愧棟梁材。對

景心偏觸逢杯眼即開東君吾勸汝莫遣柳花來
澹泊循先訓蕭條度半生人心方竟進吾道在遺榮媒
雉惟貪食冥鴻豈近名春風吹不轉貞柏似無情

東園觀梅

尋梅出郭指雲莊淡藥疎枝乍破芳曲沼遙環千樹雪
長闌橫截滿林香翠禽自立花間語素袖宜携月下妝
為有仲圭留粉墨畫圖重省竹邊廂

臨歸坐梅花廊
觀壁間畫梅

落梅

天忽晴還雨梅初放即殘蹋泥當屐齒和月隨闌干簷
下追前笑溪邊悔晚看水流香片片風捲雪漫漫斷夢
空無影相思祇剩寒由來高潔者所遇定艱難

咏柳

江南今日柳知否出靈和曉露長隄滿春風此樹多舞
筵牽翠袖妝閣鬪濃蛾颺縷橫官道飛花蕩遠波無情
能繫馬有色愛如鷺欲折應停手其如孃孃何

潭影軒觀杏

兼懷徐亮直儲汜雲顧玉
停繆文子家箴六諸孝廉

欹墻亞竹杏花寒白石空庭置酒看煙靄江南沈醉處
馬蹄紅雪襯長安

香濤招飲玉蘭花下醉歌

日色破霧霧天空開蔚藍春風駘蕩百鳥語呼我步履
來城南紅橋翠徑穿宛轉驚覩玉樹凌高檐藍田烟淨
掃翼歷湘山香遠聞菴醴藐姑仙人碧霞帔飄飄鶴駕

鸞爲驂偶然下戲試奇巧琢冰團雪枝頭黏唐昌蕊歌
瓊花盡幻此素豔遙相參縱無明月自皎皎未怕細雨
垂纖纖綠樽倒浸張綺席紅燭半射鈎晶簾北窗繁絃
武仲撥柯亭長笛桓郎拈清歌惟應愛水調痛飲何須
畏酒監起揖四座客且聽狂夫談功名翬氏媒鳥囚魚
有糝強直鈎曲誰其諳大兒畢卓偷以貪小兒劉伶頌
誦誦有酒不喫真愚憨鯨吞波卷罄復添醉向花前鸚
鵒舞碎瓊撲簌飄春衫

春陰

小閣春陰悵望中斜陽偶露即朦朧飛來雲葉漫天碧
襯出桃花罨水紅錦袖寒多猶自怯繡林香斂定成空
美人何處思芳草萬里平蕪細雨濛

紫陌閑行路欲迷青驄應惜錦障泥鶴昏花霧濃邊夢
鶯隱柳煙深處啼曖曖不知殘日下垂垂只覺暮天低
無端觸忤生愁思酒旆模糊颺竹溪

休憑燕翦一雙飛吹散東風氣力微不見晶晶和皎皎
常看靄靄更霏霏落花小院潛生草無雨中庭暗濕衣
盼斷清明渾未得熏香終日下簾幃

若有人兮隔遠岑濕煙漠漠路難尋長成高枕眠雲思
消盡看花似火心青嶂沈來停著屐朱絃潤後不彈琴
閑窗閒寂無憀坐一樹棠梨伴獨吟

南園即席

入春幾度南園醉盡日
已猶總稱情命駕雲山逢客到
過溪烟竹有僧迎嘗茶雨足新泉活載酒波寬短艇橫
更喚小伶明月下碧桃花外按歌聲

月下索飲

自笑傾囊無一錢清光似水落堦前
每愁好景尊偏竭可奈良宵月正圓
莫惜金釵成酩酊更移玉鏡映嬋娟
露寒猶伴如泥坐應比劉伶婦較賢

題粉梨畫扇

檀心含素質冷豔一枝斜不是東欄雪應為左掖花

櫂歌四首題香濤園中小舫

煙水無多路不窮纔西又轉石橋東
春深亂落楊花影

道是漁舟榜雪中

茶童却遣學吳歌倚楫閑聽水調多
一段清溪半篙淺何勞為唱定風波

翠袖清尊映碧流琵琶斜撥背船頭
月明夜夜花間泊只載歡情不載愁

春去應教縛柳邊休從水面損荷錢
也須近岸栽蘆葦好仿秋江聽雨眠

春盡日

潭影軒雅集賦

穠芳都與逝川東婪尾花棲未落紅
是處盤筵留夕照轉頭簾閣換薰風
不妨月盡兼春盡今歲三月晦日春盡但得心空

任色空莫似冬郎枉惆悵慙慙把酒病愁中

毛學博一粟菴雅集即事

藤架花籬一院陰先生奉母寄幽林玉膚園筍羹粘箸
紅縷江魚鱠落碁客訪閑居成小飲鳥依密蔭和高吟
誰知醉卧茅菴日不異當年捧檄心

漫成

且任人嘲且自誇時尋醉夢認爲家忙惟門響催傾酒
懶到庭空不種花野馬影中皆俗事飢蚊睫上亦生涯
似聞傳說爰居鳥聽樂悲愁憶海沙

初夏鶴來堂雅集賦

春歸猶有惜春心垂下蘆簾悵獨吟草淺草深多暮雨
花開花落變新陰年華晚晚羞長賤書卷叢殘懶更尋
若不早衝櫻筍宴欲於何處散幽襟

毛用雨託疾不赴鶴來之招詩以調之

清和景物十分佳命酌遲君到日斜漫託午眠緣中酒
大都春病爲憐花但教委地梳長髮何必支機傍舊槎
寄語龍邱扶拄杖茶蘼芍藥正芳華

晚庭即目

書帷漸黑意闌珊斐几閑憑拄頰看新月殘陽分暮色
嫩陰幽草帶輕寒偶然好景因閑覺如此佳時欲覓難
信口詩成還索醉家人休報酒瓶乾

偕懷一城南散步

萬綠陰陰二麥秋城南携手作閑游無名僧屋敲門入

未識人家見竹留淡蕩此襟應共會
超遙散客竟何愁
欲歸直待斜暝盡圓月光中樹更幽

子為香濤作權歌四首用兩兩和之因疊韻戲
示兼寄香濤

莫笑漁塘短易窮蘭舟時載玉丁東
撐出溪心岸邊望
蓬萊依約海波中

阿誰重叠唱清歌小姑彭郎離思多
一雙瀟灑戲蓮葉
停橈休遣更驚波

春溝香雨逐船流流到東西兩岸頭
東去見蓮西覓藕
浮萍一葉任他愁

泛宅儂思就爾邊不須更索買山錢
水風涼透波紋穩

柳影蘋香稱意眠

芍藥

讓木齋
小集賦

白石欄邊野客栽重跼累萼映蒼苔
名佳有木偷為號
春老無花後獨開勝集豈期韓令宴
清吟須擅謝公才
調和欲問揚州信莫共煎烹水部梅

呈吟社諸公

暗憐稀髮不勝梳終覺愚頑與世疎
礪鏃故應傷繳雁
臨淵未免羨鱖魚時聞拔地升僊宅
長是依巖老故廬
磨耗雄心消歲月可無文酒共相於

醉中示愚千

朝來醉倒折枝屏只愛絲繩提玉餅
流輩無多穿白帔

交游強半入青冥
閑灘遺落雙拳鷺
小水浮沈兩葉萍
我賴酒杯君不飲
手盛花露注前經

寄家箴六庶常

高燒蓮燭照詞鋒
知有才名徹九重
御苑遷鶯啼曉
睨玉河驕馬蹋從容
長鳴君作驚人鶴
卑伏予慚判蠶龍
多少彈冠西笑意
爲煩鞭起舊疎慵

家兄還

朝稍後不及散館詩以慰之

閨門柳色久盤桓
難別因愁大被寒
雲關偶當淹鶴駕
蓬山誰不是仙官
香須漫爇應徐待
花要遲開更耐看
五十身榮未爲晚
莫將顏鬢歎衰殘

愁

悄悄心期只自知
遠於天外細於絲
夕陽拋卷初慵後
斜月橫窗未寢時
老樹倚多常獨立
小闌凭久不曾移
破除也莫憑尊酒
清醕盈觴總怕持

四月三十日漫書

又過新陰嫩草天
筍高成竹影娟娟
一年最愛清和月
比送春歸較可憐

閉門長日更添慵
睡起茶杯意獨濃
好整輕便消暑服
淡黃草履白輕容

節隣重午鬪芳華
翦勝裁符定幾家
却訝盂光燒鬢影
荆釵也點石榴花

熱客人間弄戲槿
應輸五月釣清江
梧桐葉大芭蕉展

且趁涼陰卧北窗

寄徐亮直惠仲儒兩編修二首

飛黃騰踏棄蟾蜍雙壁揚輝玉府儲七子久推徐幹論
五車多服惠施書春風先後升瓊宴明月相將伴直廬
遙羨才名似元白新詩傳徧六宮初

瓜牛舍裏自沈冥不見文壇舊典型心記十年香火社

眼看兩度佛名經齋中紅豆相思樹

惠有紅豆齋

橋外丹楓望

遠亭

徐舊居楓橋

可念釣竿長拂海故衫零落草痕青

夏五南園即事

初換蕉衫薄閑園更一尋花空篁帶粉葉老樹添陰乳
燕飛還止游魚靜不沈風清歌管脆日落酒杯深擾擾

人間世悠悠此際心何須話京洛嵇阮且同林

西田公入相寄示晚清庶常

韋平重繼美舉世久相期 睿鑒徘徊後 皇心慎重
時六官皆歷試一德受深知沙路鳴珂穩綸扉退食遲
甄陶誰不被風度可容窺猶子惟君近常陪太傅棋

東軒新暑

五月生新暑東軒獨靜觀雛鶯多逐母晚筍自成竿桐
葉圓如扇蕉陰薄近闌脚方乘草履頭欲脫雲冠忽忽
霑微汗遲遲怯午餐漸應防熱惱準頓白旃檀

六言示香濤

網得魚肥作鱠笏成酒足如泉恰值涼生雨後斜陽樹

杪新蟬

寄玉停二首

凌晨步幽園清露沾衣巾中有分枝鳥交交聲轉新意
態非附和似各以義陳悵焉起北望鄙懷何由申時榮
爛朱槿古節生寒筠敬矣告我友豨膏謝方輪

麤頑一片石乃抱攻玉姿玉雖不藉攻石意豈有非為
石誠可賤為玉匪易治磨礪成古式琮矩而璧規獻當
禮郊廟韞亦含光輝君子苟自愛鑑此方寸微

七月十日毛菘園携尊招集隆福寺筠上人禪
房即事五首用少陵荷淨納涼時為韻

城西有古寺煙水門前多十畝青琉璃中浸萬菱荷每

羨翹足鷺占斷雲錦窩況茲已徂暑秋意生涼波忽聞
枉嘉命携酒邀清哦曛曩日初出及早當來過

吾生百事塞幽賞亦有命猗彼池中荷翦伐誰所令花
葉半不存秋風搖斷柄紛紅與駭綠坐想明年更置之
勿復道萬物有衰盛長嘯驚魚跳萍開窺淥淨

入寺求精廬細徑穿匝匝真僧不外飾禿頂披補衲架
掣支公鷹盤羞菩薩蛤瓜茶滋燥吻松塵麾禪榻開襟
恣高談湖海相吐納一掃蒼蠅聲金飈歛蕭颯

膽瓶花未墜猶貯前溪香靜院帶晚色捲簾置壺觴相
與文字飲燭淺新月涼倚酒各諧笑揭隱無一藏四座
且勿起主稱夜未央朋好縱易聚愛此清淨方

零露沾殿角低月銜城陣欲去挽我袖楊柳飛秋絲醉
立荷隄上敗葉翻風時無花樂如許有花復何爲看花
必有花是名貪而癡不信試借問蓮花座中師

感書

味以濟而美音以和相召繚竹雖異物何必非同調不
辨鸞皇聲孤絕蘇門嘯

送子大入都

鴻鵠棲幽林振翮思飛揚士方不得志往往輕故鄉念
我平生友時見舉離觴故鄉更誰在城南有沈郎高居
誦皇墳慷慨師古狂發論每驚衆自許殊難量十月木
葉下風捲征衣涼忽復相告別跨馬之朔方沈郎人中
傑不獨能文章看君意氣雄天下士莫當偶携一卷詩
萬顆明珠光誠爲希世寶被褐焉能藏去去視屨鼻行
戒慎勿忘

送香濤入都兼呈稷亭兄

春草春波黯別魂送君南浦更無言黃河泰岱竒觀在
莫爲鶯花戀故園

水木亭臺鏤碧雲獨尋阿買共論文酒人寥落詩人散
月白花紅最憶君

不才也擬出菰蘆一醉相逢盡百壺乞向阿兄先致語
俸錢能辦酒資無

吳正子招集風雨菴觀牡丹

自憐春晚一庭空，來看欄邊可意紅。正是百花憔悴後，故矜穠豔笑東風。

風日難禁翠幕遮，飛來瓊島襯丹霞。誰將貴客題名號，氣壓圖中十二花。

張敏叔十二客圖以牡丹為貴客是集共十二人

紅蠟金尊夜色妍，輕風小雨養花天。座中我是韓宣武，也製清平醉拂牋。

大陸名方盛洛中，蓬萊應見御袍紅。遙知能繼裴璘句，

一日新吟滿六宮。

難兄思緒新登京兆賢書

新麥

穗黃鬚老罨塍溝，四月腰鎌刈隴頭。桑柘影中雲暗動，鵝鳩聲裏雨催收。人情望飽初嘗日，天氣猶涼也號秋。

餅餌香生田舍客，一燈兒女正無愁。

東山書屋雅集賦得燒筍

限七古十二韻

五月纔過竹生日，凌晨折簡煩呼喚。王郎為愛此君來，斑犀迸蘚縱橫亂。籬脚和泥下短鑿，鑿滴滴流膏白弱斷。瑩膚展盡紫錦褌，圓孔切成青玉瑗。廚師調絮加薑麻，風味清嚴屏蔥蒜。銀瓶更汲井華水，細淘雲子炊香飯。簷前日色乍亭午，脆滑堆盤陳几案。龍牙鶴膝品殊絕，魚腹鼈裙應不換。欣然放筯未覺空，坐客加餐那須勸。飽後鼾眠到黑甜，一枕支頭北窗畔。俗流疑是刮腸篋，只啖花豬誇美饌。況有林中寄養人，橫索青蚨五十萬。家是穠招集畫松堂，納涼即事

水竹羅城陰幽棲此焉托脩脩門巷冷可以忘蒸爍嘉
吾文翰侶游行同為樂永日宜高譚棋聲亦間作風微
樹影圓雨驟雲光薄十千陳王酒三百康成爵白波卷
江湖清露灑焦灼醉拂葛衣輕赤足乘芒屨屢起輒被
肘放意繁文削安能事啗吟冠帶紛相索

陸尊光招集觀蘭

分韻得
灰先

眾芳蕪穢正低徊高會初逢九畹開好時田園方作達
澹澹來莫把華堂校幽薄琴歌一曲瀉金壘

謂尊甫侍
御先生

謝庭子弟況多才秀如玉箸亭亭立香與金飈

紫莖綠葉帶湘烟猗靡隨風散几筵綺石共栽疑得地
甘蕉相蔽竟誰憐舊稱屈子離騷句新擬繁生託興篇
賴是同心談笑處且圖沈醉臥花前

玉停枉駕夜話即事

買隣三載望關河此夕纔邀月下過不似昔人猶兩巷
青楊蕭隔白楊何

濁酒寒釐坐笑譁西窗折聖問星沙懶探五色蓬萊樹
却向汀洲賦冷花

時玉停從楚歸不就禮
部試是夕分填紅夢詞

奉訪唐銓部東江先生賦贈二首

萬卷紛綸盡貫穿文章海內更誰先譙周考謬評遷史
僕射稱詩笑鄭箋多較牛毛竟何用精求雞跖始應傳
雲亭一霎傾心坐面壁空慚二十年

歲月蹉跎那自知劇憐狂態尚欽欽常懷吾刺誰當詣

曾有人稱叔不癡謂家汲園文酒幾番知己痛雲霄千里壯
游遲非因任昉能推獎落葉蓬門正掩時

十七夜秋槎招同鶴汀南溪小集

白髮蕭閒客虛堂對晚涼語從清坐少味覺老人長殘
月雲中見寒花露下香一尊知意厚病酒亦何妨

題畫二絕

危巢結松頂高與青霞齊衆鳥各傾效歛翅就卑棲
輕儵浮綠波殘花落紅雨悠然無覺心吹香自吞吐

次韻奉酬東江先生枉贈之作

先生挺東南高辭懸藝林銓綜薄文部一笑抽華簪日
深鄉閭敬華嶽瞻嶽嶽俗學尚鞶帨組織多糾紆及茲

奉職志點鐵成精金門羅問字車如四國獻琛賤子幸
同里而客吳山岑碧石以為礪寒猿相與吟手攬千尺
綆汲古聊自斟跡同貧病思質忝魯鈍參春禽矜巧哢
獨類反舌瘖十年歸故園英彥紛追尋屹然望國老無
由測高深撫已內不愜瑟縮乃至今暮秋百蟲絕為奏
風前琴豈伊鍾子遇遂賞山水音時調固足鄙箏笛徒
哇淫人生貴知己卑微甘陸沈况蒙清風贈披拂開愁
襟相期在千載語重未敢任猥辱齒牙論永言銘寸心
薪傳倘弗棄瓣香夙所欽

小春

靜照軒分韻得灰字

十月重陰深閉日豈知偏有豔陽才柳餘麴色絲絲挂

花借楓林樹樹開蕭瑟秋風方過後續紛寒雪尚遲來
校量牢落中年客酒發朱顏意未灰

寄子大都門

去年相送玉山下別後愁多記不真一歲但增沈醉日
五更常妬熟眠人江邊鐵鎖爲余斷天際金臺與子隣
憑仗清才騰駿譽致身須早慰交親

聞家冰菴被薦賦呈十韻

畫省官曹貴名邦典郡還遺榮輕五馬卜隱閉雙關高
誦仍儒素清風立懦頑中朝書久絕野外意方閒 聖
主能求舊賢臣勸賜環薦章飛北闕物望繫東山經術
誠堪用文辭固夙嫻三千看老驥七十尚童顏且別漁
樵侶重登侍從班青蒲需獻納應不避投艱

雪中招玉停雙粟

竹几書縱橫瓦甕酒清冽獨立望羊求屐印門前雪

有 詔搜求實學聞家相國欲以賤名入啓事

因年不及格而止題詩志感

芝產銅池天馬來深宮側席 詔搜才麟臺虎觀諸僞
滿那有遺賢在草萊

阿湛清狂衆共嗤未經談易獨先知深慚三十年名士
莫對 君王道不癡

草堂歲月暗中移雙鬢蒼浪氣已衰今日始知臣尚少
左雄方議限年時

弘獎今猶有古風託身千仞射千同
氈氈恐類羊公鶴
又枉殷公語庾公

唐先生東江方為予移書仁和少宰勸令補牘

次韻奉和家宮詹拙園芍藥六首

聚花學士坐花茵醉筆題詩字字新
為憶翻階吟賞處
江南夢落玉京春

送人楊柳年年折贈客梧桐歲歲持
獨我風光暗消歇
可離花發閉門時

潤露芬敷臨曉砌籠煙綽約冒輕紗
應知麗草能調味
置驛何人貢此花

東郊萬樹綠陰新賸有殘枝婪尾春
好是空濛烟月夜
花神驂鶴覓詩神

南園水竹最清幽文酒相邀盡隱流
高會不將花壓帽
星星四十鬢先秋

豐臺名種萬花稠朝退羣公結勝遊
記得四枝金帶後
揚州佳話屬皇州

答家檢討箴六

平生膠漆契蓮炬直金鑾
聖世為麟鳳芳臯擷芷蘭
醜人蒙刻畫野鶴自清寒
猶感呼鳴意臨風刷羽翰

歲暮憶舊七首

虞山孫徵君赤崖

雪窖歸來意自恬不能更作上竿鮎
孫郎只向江東老
玉立飄然記紫髯

山陰戴遺民南枝

釣臺竹石碎淒涼短薄祠前白髮長
曾過巢南尋越鳥寒風颯還下斜陽

萊陽姜高士學在

為守先公舊典型祠門淒寂晝常扃
閑開團扇山樓上雲氣時時畫敬亭

莫釐張山人憇齋

不數前朝蔡羽才和陶詩就即銜杯
紫萼綠橘蕭疎地重望先生管領來

同里顧文學西齋

海濱高臥日襄羊豈意居人失彥方
一樹長松萬竿竹

滿林風雨閉書堂

吳門范廬州聲佩

祇留清白付孤兒日暮靈風捲敗幃
旅寄一棺應渴壑素車何處哭相知

家汲園先生

說項回思歲月徂十年愁病滯江湖
移家却近西州路只為羊曇淚已枯

候潮海上

東帆潮落飛如羽西櫂潮生去似仙
若論客心齊欲發蘆花那繫候潮船

題陳北溪詞稿後

陳係崔不
雕外孫

茉莉花前月一痕北溪詩中句新涼佳句最銷魂北溪出自崔黃葉始信甘泉定有源

秋涯檢討座上題層嵐曉色圖贈王石谷

石谷老人今畫聖年餘八十猶精強鬢髮雙鬢白雪影
照耀兩頰丹砂光時時看山覓粉本脚力未要支枕榔
煙舟一葉泛秋水翩然訪舊來吾鄉昔者東南妙繪事
最數廉州與奉常老人少與兩公遇如溯水派通天潢
奉常有孫今太史風流博古師歐陽壯歲辭官愛清暇
碧山長嘯方焚章老人過之贈大軸層嵐曉色紛鋪張
嶺分向背割明暗樹間疎密攢青蒼泉聲涓涓下石壁
雲氣冉冉飄松房置身恍在縹緲際徑欲呵叱金華羊

吾聞南北宗旨異南宗摩詰開諸唐荆關董巨大小米
有元大家推倪黃此圖能得癡翁髓文沈不敢同翱翔
廉州奉常倘復起出藍應許誇專場太史對之驚且喜
招客共賞神洋洋老人高談四座寂傾耳靜聽淵源長
是時十月天雨霜陵陽被別嗟神傷向壁無言似瘖啞
暗貯熾炭煎愁腸安得北風圖一幅挂我破碎團茅堂
紙端獵獵噫氣發頓吹內熱成清涼收身便老雲山裏
清泉白石聊相佯

賣屋詞

夜半不眠披絮起腹中車輪若抽水淪落蓬蒿四十年
男兒寧能佛鬱死手携一卷蚩冷符屢欲辭家遊帝都

山妻牽衣指兒女君行誰護雞窠雛餅中無粟架無襦
分燭徐吾無李吾況君遠行無僕夫看囊一錢并亦無
三千路長豈易到何從跪捋羊鬚珠長安貴人體貌殊
貂裘坐擁紅瓊瑜嫵媚左右供使令言出唯諾羣相趨
君之骨相本寒乞矧乃爲計多迂愚挾策豈宜蠻角走
帶經只合牛邊鋤語悽意苦泣幽咽惱亂雄心欲摧折
明知貧賤百事難拭淚爲汝更一說丈夫墮地志四方
桑弧蓬矢懸門旁歲月悠悠蛇赴壑便恐兩鬢生秋霜
故人半在日月際我獨魚頰而鳥旂 聖朝崇儒重經
術公卿好士羅賢良門才濟濟稱貴盛宗老正坐中書
堂阿兄雖貧官內翰逢人說我能文章子雲遊京年已
晚安能終處菰蘆鄉汝家遠在吳山陽三年不歸母斷
腸茶畦桑圃聊可給作書有弟思迎將目耕舌織我久
厭補衣麤飯汝慣嘗一女三歲始扶牀一兒半歲懷中
藏女能聰慧兒玉雪抱兒提女還山莊骨月滿眼且歡
喜慎勿相念空嗟傷仗劔出門當大笑驕騶縱老猶騰
驤獨乏腰纏我有策頭上數楹新買宅人生天地猶逆
旅何妨反主重爲客卜居不定風中船十年輾轉經三
遷緝寒讓木鴻爪雪徘徊桑下真徒然山妻破涕一道
爾寒雞喔喔啼窗邊起呵凍硯冰毫秃紅帖黏門書賣
屋

次韻題杜雲川太史花雨填詞圖三首

昔年如玉號檀奴一段濃春寫作圖今日牽舟照江水
蓼花煙雨膾秋鱸

綵雲歸有月明知小杜風流小晏詞好揭珠簾重繪影
尋春不到綠陰時

幾載親探上苑春江南花雨卷中新携來第二泉頭坐
誰道離天尺五人

題王石谷枉贈秋江漁樂圖用前韻

蕪詞只合作詩奴換得先生漁樂圖徑欲一竿如畫裏
檣頭船尾釣江鱸
莫將文采使人知拍手惟歌銅斗詞好是半江紅樹影
短簑醉舞月高時

不要桃花流水春清江秋霽鏡磨新未知兩箇舟相竝
此一舟中是甚人

讓木齋獨坐

歲晏獨無事坐殘寒鳥聲南牕一樹雪照我勘茶經

留別晚清太史

繞梧百匝棲鸞樹傍竹千迴飼鳳枝何況冷雲殘雪暮
更無一語別君時

醉中留別愚千

蘭從出谷香璞為藏山賤醉語猶自壯四十髮未霰俗
眼短於睫盛年急如箭安能終棄捐零落同秋扇平生
所低頭幸託雲龍便糠粃猥欲先佇子明光殿

樂郊園雜咏

專壑

背城度虹梁履石穿雲徑高松灑涼風心清萬緣定

揖山樓

面山結高樓樓開林影積下有如鏡波常照閑登客

香綠步

修廊歷宛轉細徑兼屈曲新雨竹園深清陰上衣綠

涼心閣

淪漣起風漪琅玕滴烟翠赤日不能來松床宜美睡

煙上

架石凌空虛危亭構其上日落見梅梢輕煙羃青帳

紙窗竹屋

蕭疎竹間月青熒窗裏燈蕉團修淨業合與坐禪僧

掃花菴

奇峰壓簷來平橋貼波去時見踏花人沿溪覓無路

翦鑑亭

巖深波復杳幽閒生疑畏日暮吼林風水腥如虎氣

清聽

隔水割僧居依然築樵广鐘魚靜中聲林花落紅點

遠風閣

高窗俯澄潭小閣炎囂絕披襟受南風六月涼如雪

画就

小山詩續藁卷二
空明十頃陂濃淡千章樹斜日坐移時蜻蛉渡溪去

藻野堂

崔巍棟宿雲掩冉花含雨籬落接芳郊春耕冒煙語

吳門喜遇謝二皆人

深掩苔扉四十春青山常與結芳隣餘霞曾熟宣城句
識面真同見故人

男景元校刊

小山詩續藁卷二

小山詩續藁卷三

婁東王時翔抱翼著

原字
臯謨

北行道中雜詩四首

張帆渡揚子擊汰溯煙波南北分於此家鄉隔奈何青
山船尾斷黃土馬頭多賴有壯心在開襟一浩歌
竭來淮水北春色枳籬殘夜夜黃茅店家家綠韭盤燈
昏孤寢倦星照曉行寒回首江南路鶯花正未闌
彌望平疇濶新晴景乍和春風蕎麥短落日棗林多得
得升山道峻峻轉石坡何人慰行役前後起勞歌
遠涉經齊魯連朝馬足勤沙深如積雪塵遠似驚雲岱
色叅天起松聲著地聞金泥懷絕頂封禪有遺文

旅店僻間見同里髯道人畫竹

渡江無復幽篁色粉墨蕭疎誰寫真
入夜携燈重細看
故鄉景物故鄉人

車中口占

悠悠驅馬度山椒日暮征途覺尚遙
輸與邨農指歸路
笨車黃犢轉林腰

任邱道中

曾聞北地時時雪不及南中樹樹花
今日鄭州城外路
楊花如雪點平沙

望見西山戲作

未向深宮見尹邢暗凋玉貌度芳齡
朝來試校西山色

猶賸蛾眉一抹青

贈家司農麓臺

江南古揚州厥惟下下田近代賦獨重始自南宋年臨
安一隅地國計殊彘彘咄哉賈秋壑酣歌葛嶺巔但知
股民膏官田禍尤綿元明雖遞加此實導其先所以千
載後快心於木棉 聖主勤軫恤公溥誠無偏良由財
賦區彌復增憫憐新租旣屢免舊賦亦時蠲奉行偶未
善恩膏少遲延諤諤司農公直氣凜無前申章排衆議
雨露迴九天江南萬萬戶引領待安全

次韻奉和張太史匠門種花詞八首

張憑宅裏一庭寬留得春風十二欄
暗識清泉相灌意

好花端不抱香乾

春寒梅老尚遲開空費驚雷夜夜催莫道祇陪林處士
水曹官閣也移來

桃花長學美人妝紫陌紅霞笑豔陽應有國香人未采
十年空谷避羣芳

漫嫌霜菊傲東籬護取靈泉益壽枝却怕薏花能亂影
乞苗時節要先知

露滋枯榦發纖芽老桂扶疎一樹斜子落淮南成別種
此花元是月中花

長安紅杏各爭探羞向兒童擔上擔若縱馬蹄相蹴踏
淡煙微雨憶江南

穀雨年年花最繁暮春人愛午風溫明年五色開奇絕
只倩韓郎為染根

溪面荷花自作叢瓊瓏玉瀉吐真紅何時移植瑤池裏
且托廉泉讓水中

花燭詞六首為楊文叔太史賦

小院紅榴助晚妝金蓮花炬照蘭房神膠續髮裁羅幔
五月南風似水涼

紫府仙人瞰玉京相逢齊作鳳皇聲未須天上憂飢渴
親酌流霞與曼卿

盛朝優渥眷詞臣欲展私恩未許陳夢到阿茨山畔路
錦衣雙拜白頭人

合歡被啓繡羅紅角枕宜男畫伏熊好是鏡臺先送喜
九雛翹尾玉釵風

名閨萬軸插牙籤花亞紅窗透玉蟾漫恃綠沈雙漆管
戰詩人在水晶簾

銀臺三昧轉欣然竝倚熏籠號比肩從此衣香應不斷
莫猜多惹御爐煙

咏史詩三首

漢祖仗雄劔逐鹿風雲隨樹業圖宏固定嗣轉遲疑徘徊
求似已此意人未知叔孫雖強聒前星益以危卓哉
留侯計帝心乃潛移四老偉冠劔從容歷階墀數言成
羽翼炎祚萬年基遙遙望商山悠悠寄我思浮雲翳深

谷何由見紫芝

宣尼昔云歿大道淪空虛嬴政握天紀欲令黔首愚六
籍乃焚毀三綱遂榛蕪維漢起英辟隆禮招羣儒談經
設虎觀校書開石渠宗賢得子政庶姓來江都下帷劇
攻苦燃藜亦勤劬區區補綴功千載不可誣慎勿揮金
椎扣頤傷其珠

武皇騁雄姿天兵靖沙磧壯卒三十萬控弦拓長戟赫
赫雷霆威壓境虜窮迫單于驚遁逃賢王被俘獲幕南
遂空庭萬里沙草白一雪和親耻無復輸金帛衛霍建
高勲張傳成奇畫馬卿素善病雍容詞賦客奉檄定西
南亦擅安邊策

送顧太史秀楚南還即次留別原韻二首

秋風五兩暮煙沈
佇送歸舟指舊林
繞箸鱸堪為鱸日
開籠鶴有入雲心
一時金紫寧須戀
千載文章好獨尋
遙想寒山寺前路
爛紅楓葉照閒吟

梧桐百尺最高枝
欲斲成材被斧斯
抱璞還山真自愛
見竿吐餌未為遲
清宵古驛燈前酒
落日秋原馬上詩
冷澹風光偏耐領
不知林下更逢誰

秋夜惠天牧太史寓齋小飲即事

官閒一無事
閒客此閒過
獨樹清陰滿
空庭秋思多
風塵羈劔佩
湖海夢漁簑
不醉先生酒
悠悠奈若何

送楊孝廉沛公歸蜀中

時送其同年鄭太史之喪還蜀

張范交情世已稀
看君白馬送喪歸
懸知萬里橋邊路
玉壘浮雲不敢飛

德清閣學索題華山圖

華嶽蒼茫辨有無
知公奉使自秦都
靈臺粉本藏纖芥
此是携歸第二圖

送家樹宣監司之任楚南

江湘水潤土脉腴
一歲再熟田生秬
困瘠填溢供委輸
四方散布充舟車
人以沃饒忘勤劬
辛苦粒粒盤中珠
吾家曹司千里駒
曾佐大農軍國需
簡重慎密含秘樞
練達國體魁朝儒
繡衣領節從南趨
督察漕輓來京都
應如崔鷗寬嚴俱
嘉禾作貢成禎符

奉贈孫太常莪山先生

南朝孫楚賦金石有遺聲鴻寶猶藏枕織筵廼叩鐘何
期威鳳意肯接候蟲鳴溫語憐寒士開襟對上卿天高
雲盡卷秋爽氣方清古調重爲奏泠泠山水情

送曹秋坪南歸

問余何以留問子何以返北風颺黃塵一騎青山遠

送陳季方南歸

豈有還珠者徵君抱璞歸南鴻方北向猶道及時飛
同熊皆立沈興之馮夔颺顧玉停夕佳樓小飲

即事

撲面黃塵裏金蘭自有羣垂簾生靜氣據几讀高文壯

志爭青簡浮榮看白雲今宵尊酒意莫遣外人聞

傷吳進士振西

一第成何事平生志未舒臨棺惟老僕寫旒不中書同
舍封殘篋羈魂返故廬九泉逢給諫握手共欷歔

謂西齋先生

曹進士亮疇招集蔣員外寓齋即事

杏花簇簇柳參參携酒池亭試一探笑卷白波忘客裏
誤擡醉眼認江南

送未岩殿撰省覲榮歸

蓬萊供奉領羣仙得占螭坳又四年破例陳情蒙 特
許望雲心逐渡江船

名父歸田意氣殊渥注真見產神駒趨庭膝上安文度

可道人言汝勝無

遠遊衣線賴慈親此日宮袍穩稱身盡說永寧今已貴
先知却是李夫人

櫻筍江南好物華堂開畫錦進流霞未須更著萊衣舞
風顫猩紅壓帽花

題南溪青蓮如意圖

如意不過頑鐵青蓮亦是空華趺坐靜消諸相湛然月
印澄窪

送南溪之柘城

南溪先生本靜者棲遲五十衡門下花香樹影蕩筠簾
瀟茗清吟意瀟灑博陵訪舊著征衣淹滯三年未得歸

乘興欲瞻宮闕壯一鞭殘日到京畿郭隗臺邊訪陳蹟
草淺烟深見空碧颯然風雨腕底來大篇傑句鏗金石
名動公卿求識面朱門倒屣諧歡宴馬周青雲可立致
庾杲紅蓮聊自遣柘城勝地古朱襄梁苑爲隣憶孝王
借問長卿千載後何人詞賦得專場

顧蔗田六十初度

門闕江東舊荀陳盛德俱少時推碩彥中歲覓清娛兄
弟無分樹鄉邦有令模靜棲宜十賚吐燄出雙珠斑袖
爲名士金屏滿巨儒鶴觴歡醉後頭黑未須扶

送馮文子明府之任秦中

天下知名士江湖已白頭一官臨小邑萬里入邊州峻

仰蓮華峙清看渭水流所期惟不朽窮達總悠悠
握手金臺下相思識面初論文方有得為政更何如未
雪冬猶暖回陽日轉舒平安涉長道莫使雁翎疎

夜坐感懷呈張莪村太史

落拓天涯客空憐髣髴華古琴常挂壁老劍已生花博
物憑磨洗知音為歎嗟寄言紅蠟淚此夕忽交加
吾愛張夫子論交意氣真青松應不落白首願為隣策
馬千門坎驅車十丈塵京華擾擾地何意得斯人

疊韻呈黃太史退思

曉看京國路寒色滿霜華高節不宜竹閑情欲種花凌
霄雖未見委地亦堪嗟靜待孤妍發應須甘雨加

忽湧波千頃方窺叔度真學將文作囿心與古為隣扇
却癡蠅隊簾防野馬塵偏迴阮公眼垂盼素衣人

奉和仁和先生新拓書齋做樂天體詩四首並

次原韻

廣廈能遮四海人小栽花竹養天真壁間閑擬香山句
座上和生茂叔春時值昇平隨意樂地登華要不嫌貧
山林朝市俱安適大隱看成自在身

辭貴清真指授初浮華應黜玉臺徐升堂老宿趨蓬苑
載酒名流侍燕居翰墨西園方有托管絃東墅可能如
力持大雅開人意風滿林端快一梳

清鑒無私古所難此間公事莫相干許談風月來三徑

敢有賓朋乞五官幽韻蕭疎成竹塢閒情銓次到花欄
從容退食鈎簾坐鳥語聲聲勸晚餐

遙山入望慰思家靜挹風煙興自加公意寧忘段橋柳
君恩猶靳鑑湖花冰銜已盡掄魁柄沙路將成轉犢
車請向閑牕聊握鏡髻絲渾未點霜華

暮冬新月和博蒼崖韻

寒魄初生一角天朔風弓勁欲張弦空鈎斜下潛魚處
枯樹微明宿鳥邊照夜未深方黯黯待春若到更娟娟
西樓呵凍調青黛學畫眉彎記少年

次韻奉和西田公南書房 賜膳

天府文章蔚彩霞台星一點照銀紗諸儒袖手春風裏

上相題詩淡墨斜盛典適頒珍膳至 殊恩特為老臣
加高吟大啜公方健傳語蒼生免嘆嗟

家葆光之任邵陽時屬楊子鶴寫山行雪霽圖

丁酉春再任龍巖為題短古三章以當折柳
百里聊小試作吏同作客風捲征衫紅雪壓遙巖白衝
寒馬足競於以勵冰蘖

昔行嘗楚橘今行啖閩荔何必祇飲水方可稱廉吏東
風正融和春旂看搖曳

從容歷花縣逍遙登粉闈轉眼到臺省無嫌此官微側
聞瀛洲仙嘗斷炊煙飛

題畫

野鳧雙立葦汀煙依約江南五月天
記得短篙撐艇子
蘋花香處枕篷眠

磐石菴即事

藤陰樹色暎疎煙一片清光別有天
方外無人知姓氏
禪牀安穩借高眠

京師歸未匝月別內赴閩中文幕

北去三年辭易水南遊千里又閩山
征衣有淚君休理
但洗塵埃不洗斑

雪中陪李學使芝麓遊西湖

畫舸衝寒玉屑零魚肥酒釀醉湖亭
清茶日暮孤山坐
冰萼光中淡使星

友清軒與王孝廉中安芟治佛桑

佛桑枯死半無陰翦剔隨君保愛深
他日花開紅似火
何人解識此時心

歲暮示同幕車端平

丹山碧水懶題詩荔子江珧空自竒
豈有夢中人索筆
校文一載不眠時

題蘆雁圖

高飛已怕遭彈射俛啄猶虞觸網羅
揀箇水清沙暖處
荻花深覆睡如何

吳興郡丞高乘亭三十初度

傳家勲闕樹旌麾公子清才獨愛詩
擬看碧瀾堂上月

風流重對杜分司

遙聞攝篆雉州城茗雪雙流勢欲爭掩却南朝何敬叔

箬溪上下滿清名

時署知長興縣事

罨畫溪頭樹色斑金沙泉下水潺湲嗜茶我亦同桑苧

挂席來尋顧渚山

握手論詩隔五秋京華回首夢悠悠羨君三十能為政

直上台階定黑頭

春雪

律換春方淺雲凝雪又深草遲青萬里花早白千林暖
晝旋融玉良宵更值金暎來慵細讀撥處起高吟南國
休誇瑞東君別有心征西憐凍甲陽轉未消陰

寄愚千并示玉停

書來已經年欲報無一語涇東菜甲枯夜夜聽春雨

愚千次韻枉答再寄

近有包山人來作包山語期我橘林中高牕坐秋雨

愚千再疊韻枉寄仍依韻答之

來詩云君非山中人莫作山中語長風吹岫雲

乘雷化霖雨

君作青雲人那知白雲語白雲淡如煙孤飛不成雨

愚千連疊韻枉答四疊韻卻寄

來詩云山中同一雲莫作分別語

莫言同一雲為君分別語山中有此雲山中無此雨

愚千聞南闈信後五疊韻見寄并示諸同學余

連疊韻答之并示北闈獲雋諸君

車笠盟雖存高下難同語一作凌空雲一為墜地雨
長江限南北相望不得語煙波愁我心颯遶楓林雨
七疊韻寄愚千并示蓀臣用兩雙粟習之

君逢失意人替儂傳一語易水寒蕭蕭歸來釣煙雨

八疊韻寄愚千并示嗣宗行表

兩度竹林人相隨竹林語慣作五鳳飛雙鷗臥沙雨乙酉

南閩余與惠天牧徐文表達夫顧嗣宗楊文叔顧玉停相聚拳屋各誦闡義今未得者獨余與嗣宗而已丁酉北閩余與愚千及胡襲參姚行表沈芝岡姜賦山沈子大相聚僧房聯契尤密今未得者七人中獨余與行表而已

九疊韻追悼陳思洛姚鐵華

飄零閩嶠行幽憤誰告語心傷兩孤魂闌干淚如雨丁酉

榜後知已分飛思洛客死于荆湘鐵華自裁于逆旅余崎嶇閩嶠常抱劉楨之疾幸猶在此而兩君之墓宿草矣為之涕零

將赴中州文幕留別東江先生

第一低頭拜平生是我師豈徒鄉鄙敬直受歲寒知貧
賤依人際冰霜就道時含辛辭馬帳子影照清伊
三載瞻宮闕無成眾共嗤游梁才既盡入洛意何為故
舊憐家食艱難與客宜獨懷知己感惻悵不能辭

題徐太僕泰掖先生遺像

際運方衰候排璫正燄時前將軍竟死南太僕堪危勢
與文姚竝名同楊左垂肅瞻遺像處袍笏儼深思

題九峰三逸圖為雲川太史作三逸者雲川及僧天鈞道士洞泉也

常過九峰下不知三逸誰近聞雲川子遺榮與世辭禪
老碧邛杖仙人青玉卮遥遥結深契望望空相思

陳州陪蔣學使省菴遊蘇園

車騎雍容盡日迴，非貪春賞細銜盃。
州人盡說三年旱，却愛泉從竹裏來。

次韻酬項雪邨

野夫懶散是樗材，豈有清陰布八垓。
多謝高情比貞柏，人將蒿柱倚爲臺。

雙柏行

南陽學署作

我來南陽見雙柏，階前竦對如嚴客。
植者何時不記年，黛色霜皮一千尺。
稜稜直幹排煙青，凜凜高枝障日赤。
夜月靜照陰森沈，時聞竽籟飄清音。
忽從蒼翠露枯禿，嗟呀折裂空中心。
鳳鸞不棲羣雀噪，使我涕淚紛霑襟。
指捫手抱口稱善，剡苔剔蘚誰能見。
蜀相祠前祇浩歌，漢皇臺上無高宴。
吁嗟乎樗櫟擁腫猶可薪，此木偃蹇徒干春。
安得颯然風雨助，拔地雙龍躡雲去。

次韻酬莊麗農見懷之作

首夏辭大梁，入蔡漸徂暑。
裒裒宛洛間，風吹葉如雨。
會合歷三時，復睹同心侶。
贈我四十珠，絡以黃金縷。

雪邨用麗農韻賦旅懷見示依韻和之

霜肅天已寒，火然心更暑。
病客自多愁，不待聞風雨。
非無良宴會，非無好儕侶。
入夜一燈殘，髮吐冰蠶縷。

客中題畫梅

馬家山下香如海，鄧尉峰頭雪作林。
身是江南愛花客

何能不起故鄉心

將赴懷州同諸友與雪邨話別

梁園多勝友相對黯離襟客判行兼住交方淺到深一
燈風雨夜四海弟兄心早識分携後清愁祇獨吟

次韻酬雪邨見贈之作

浮雲四飛揚從之安可得何況田中泥上與層霄隔所
以欲閉門尋求古人跡又苦時代遠無由瀝肝膈尚湖
雪邨子聞聲在疇昔相思不相見夙愴空委積竭來大
梁遊乃遇直諒益貌古蒼蒼松氣肅巖巖石靜如菊香
歛清比蘭露滴並觀優絀分返鑑潛自惕蕭然共羈旅
密爾同硯席雖有得朋慶而苦爲物役各懷麋鹿性避
喧恒就寂幽吟滌煩襟高論擴淺識支離道路間深荷
慰藉力彌年締金蘭一夕離思迫情以還鄉順境緣揮
手逆車轢草芽青棹泝江光碧到家啓塵笥點檢舊經
籍道充豈憂飢皓首兩勿斲

贈白門友人

匣繡銀鋸未試銛酒杯愛向月中拈神情開朗腸如雪
俠氣時看拂紫髯

舊業羞稱覓舉才自言不到郭生臺誰知上下千年事
長向瀾翻舌底來

鍾王已遠誰能繼楷法時賢結體疎健似秋鷹筋入骨
銀箋小字率更書

擬學君平卜肆閑蕭蕭匹馬汴京還門前一片秦淮碧
冷浸芙蓉建業山

和麗農別諸友韻二首

直榦松稱叟虚心竹號君千秋期努力一載共論文寒
盡桃花見春深杜宇聞還鄉各惆悵說與舊同羣
殘燭深宵坐悠悠付一卮雄雞斷尾日腐鼠嚇人時鄉
國雲遮遠關河馬去遲回看大梁地公子正堪思

麗農雪邨疊前韻枉贈酬之

風流逢二老引我作三君贈別頻投句相知豈在文澗
松寒不落臯鶴遠能聞何意眠沙鷺沖雲得附羣
物變嗟春晚無心把別卮開殘百花後留剩片香時底

事遊梁倦偏同去魯遲景光須共愛莫漫苦相思

歸舟再疊前韻示麗農

日夕生悵望依稀似鄂君停舟對山縣殘雨滴波文野
樹和雲暗邨歌隔岸聞前汀棲宿好吾羨白鷗羣
風物當新夏天涯斷酒卮櫻桃初見日楊柳過花時去
去歸程杳厭厭行路遲隣船相借問何以慰憂思

孫子逸依韻見贈三疊韻酬之

絕藝推前輩今來定數君烏絲臨綠字碧石勒朱文昨
歲方親見當時已蚤聞蕭條同乞米愛看寫鸞羣
竝泛仍分處無由共舉卮打篷聽雨夜泊櫂候關時心
比虛舟觸身隨斷梗遲長淮洗塵土高唱發清思

岸水謠

五月無雨雲尚作六月無雨惟吹風晝懸紅輪夜皎魄
遙天一碧磨青銅田中圻裂苗盡死日日農夫猶岸水
海枯潮信不通河車聲但碾飛塵起明知岸水是空勤
農夫切莫辭苦辛官家待輓東南粟要飽萬里西征人

題仇十洲畫馬

集晚清軒作

虎脊龍顱骨相全銀蹏花鬣玉尻圓遙思柳谷圖形處
一點房星照墨船

千里驂騮一日程戰場未試莫相輕漢文明主獻不受
何異長沙老賈生

玉花拂拂氣如雲牽向天閑待建勳若遇南朝齊太祖
龍驤定得號將軍

蹴踏天山萬騎多閒居小幅共摩挲座中有客來西極
慷慨高吟天馬歌

杜望子新自雪山歸

重題長句

少陵先生論畫馬但貴畫骨非公言亦如評書貴瘦硬
好以飛燕凌玉環仇生此馬兼畫肉神駿不減何軒軒
兩權協月瞳夾鏡三花高聳飄連錢垂梢窳地中結束
汗溝微滴紅珠妍觀其體勢豈常產追風躡影非所難
春郊細草青芊綿方解玉勒除金鞍圉人執鞭為前導
神閒態逸天應全吾聞老驥志千里空啖棗脯亦可憐
聖皇神武開雄邊購買駿足垂十年欲踏萬古不到

處秦漢僅歷門庭前天誅何為尚稽緩郅支之頭久未
懸通靈妙畫能變化真龍躍出飛翩翩朝秣東吳暮西
極辟易萬馬居其先蹴平鹵幕成功返形隨上將圖凌
煙

牯獠小女歌為杜房芝賦

雪深六月西番部牯獠女兒年十五搖曳蠻煙白草中
蓮花亭亭一枝吐江南書記身姓杜萬里從戎搏雕虎
相逢不覺眼波迴勾留微笑輕千戶支機石邊十日語
心孔瓊瓏渾未許戒體須堅郎自持兒家不是摩登女
贈郎輪珠勸郎轉東方快樂西方苦郎馬東行莫更來
西去脩羅箭如雨

池魚歎

集烟垂霧
接軒作

吾兄高棲水竹居雙池夾岸垂綠榆平時尊酒置池上
落花浮面觀游魚去年一旱池水涸廣羅鋏鍤重穿疏
淺波魚苗動宛宛正賴甘雨流春酥豈知今年旱益甚
天青日赤和雲無池形深窈底半圻寶愛滴水猶真珠
大魚已盡小魚困鬢垂尾禿相煦濡微腥瑣瑣獺久棄
時見張爪眈狸奴朝來阿咸感物命邀我繞看生嗟吁
萬事反覆未可定林鳥且共聽提壺安知尺水無神物
風雷歛忽騰天衢

題沈白淩先生全唐詩選

沈公材大世不用白首萬卷空紛綸自製金爐鎔古器

更携玉尺量前人唐家取士重辭賦全詩一代百寶陳
太宗龍飛尚英武往往落筆驚羣臣何況奇才如甫白
多以文采遭遭屯江河羈旅發精氣雄篇傑句光磷霏
後來繼者子韓子橫空排冪兼輪困古淡藻飾有別種
險怪寒瘦恒殊倫要其佳處未可廢巴歌亦與風雅隣
鳥鳴蟲響雜瑣細一竅或入元音淳十年巨眼坐木榻
放斥淫豔收清真蠅頭小書四十帙欲使後學知通津
惜乏金錢付雕刻散布萬本垂無垠歲當龍蛇文星隕
扃鐫竹筍猶奇珍金閨名彥啓令嗣展觀手澤招窮賓
他日詞林推作者長江萬里由峨岷

望雨

旱久萬物悴水縮干流竭歡心逐雲消憂思隨境發脩
脩嫌清風皎皎畏明月

喜雨

斜飛聽牕鳴直下看簷霽甘澤一以沛秋田行可救猗
猗豆苗長藹藹黍華秀

秋日過朱大端揆齋小集即事

凌晨赴佳約入戶琅玕青幽軒啓文囿高窗瞰疎櫺涼
雲閣微雨秋葉零空庭重以素心愛對酒誰能醒

題倪高士漁莊秋色

秋入江山靜漁家氣味深寥寥人境外中有子陵心
涇東草堂觀老桂作歌

我昔夢上青雲端月中有樹高團團癡墓當關不放入
淚珠和露飛曉寒醒來身隨茆堂裏一畝荒園自鋤理
可憐老桂禿無花枯幹嗟呀半生死乞來玉斧從吳剛
閒修不覺日月長青枝翠葉瓊瓏影忽見黃雪堆濃香
笈中破書無所用好換東隣新酒甕呼得平時舊酒徒
瓦盆且向花前送瀛洲仙人何處來高歌一曲雲徘徊
袖携天香相比竝勸我重去尋瑤臺碧空沈沈廣寒遠
老矣卻詵嗟歲晚淮南小隱足盤桓北指燕山宜急返
暮冬獨步東園有懷

冬日過桂軒太史

寥落歲寒心棲遲日暮思聊爾獨行國荒城任所至忽
復詣君家君家誠易記匪以桂枝芳愛此凌冬翠

題邵四履九濯足圖小照

酒中有仙人赤脚弄江水應思變醜醜盡瀉金壘裏東
華香土霏輕雲看君健步凌紫氛衣船不上醉入謁須
防蹴踏高將軍

送維揚張太史良御南還

北辭金馬門南指滄江路得意搖吟鞭掉頭留不住浮
雲萬變空復空好景揚州今古同水部梅花紫微月涼
秋剛遇季鷹風

漫成四絕示王進士隆川

平津座上集羣才愛重如登郭隗臺今日秋風看拂檻
更無魏勃掃門來

七載重遊到玉京何人車笠記前盟尋盟便是寒盟日
香火慵教附姓名

束髮思聯漆共膠誓言生死莫相拋年華意氣空消盡
不敢逢人說定交

結密由來貴結心蘭交心可斷兼金世人盡賞銀箏曲
誰信朱絃是古音

題儲五汜雲金陵雜咏後二絕

江山靈氣發詩篇莫道風流久不傳紅豆漁洋高唱後

畫溪新句壓前賢

聞君弔古儀蘭橈豔曲庭花怨未消解帶石坪松下歇
斜陽一瞥似南朝

題汜雲浮青水榭圖

佳景盡收水榭新詩應替樊川雪中牽棹已晚好趁如

畫涼天

杜牧之水榭詩云他年雪中棹陽羨訪吾廬
時余與汜雲同客都門方相訂旋里故云

次韻酬繆桐邨

游戲人間世王城稱隱君試看天際影原是岫中雲東
海未歸釣北山應有文相携終共往沮溺可爲羣

次桐邨又題韻絕句

不遣清襟染世氛素衣猶帶故山雲門前滾滾黃塵客

遍數閒人我共君

莫道名心更待持逃名猶自怕人知依稀審雨堂中過
可是盧綸夢覺時

十四夜月

已下二首和
朱稼翁韻

葉脫生瀟照茫然空遠思一輪猶缺夜萬戶已涼時鵲
繞終無定蛙鳴祇為私且乘清景坐隔樹漸成規

十六夜月

樹色朧朧晚依然傍客明光從今夕減愁逐後時生及
醉始嫌飲逢虧方見盈何戡歌怨曲淒絕下階行

是夜
聞郁

黃洲
歌聲

別澄觀相公

公方謝台鼎況我一青衫古道鳴征鐸清江下峭帆就
荒餘舊徑托命有長鏡多感相留意含情歸碧巖

別晚清太史

本是江湖士安能久馬鞵欲行君輒阻應妒我先歸朝
宁多榮辱林泉無是非臨岐相借問胡不直金扉

次韻答桂軒太史

題書學士翦秋梧一縷高情雲外孤容易片言商出處
問君能老故鄉無

盟壇誰復是齊桓情似秋雲重一官賸有陵陽舊時淚
更無人處自偷彈

寄穎山姪用前韻

不生竹寔不生梧鳳德衰時影亦孤借問故園香稻粒
飛來鸚鵡啄殘無
謝公疑謗不逢桓摩詰琵琶祇換官好語竹林狂醉者
古琴無處向人彈

喜逢許二子遜

句句清新字字奇十年丁卯夢中詩風塵屢誤南歸計
只待浮萍會合時

小山詩續藁卷三

男景元校刊

小山詩續藁卷四

婁東王時翔抱翼著 原字
臯謨

鐵簫歌 為朱芋
陂賦

紫竹易裂碧玉脆精鐵百鍊成茲簫爛斑古繡苔隱隱
勻圓疎孔星寥寥朱公孫手持黑螭向我言此物淪棄
久不貴爨琴獄劔同沈寃長懸闌闔客莫顧淳音澹泊
含雲門朱公孫迫窘詰屈困羈旅摩抄鐵簫與君語吹
來空作鳳皇聲俗耳誰聽淚如雨

君携鐵簫何所用夜深獨抱常飢凍人前耻作乞食吹
人去嗚嗚潛自弄長安親故鬧如煙涼風凜烈衣未綿
祇將鐵簫閒撫翫愛客傾囊無酒錢朱公孫君家插架

三萬軸胡不歸家擁書讀湖沙十畝可躬耕青蓑細雨
驅黃犢扣角何妨月下歌鐵簫蘆笛紛相逐

朝歌鐵簫意慷慨暮歌鐵簫語悽惻君長八尺聲洪鐘
腹有詩書壯顏色相公之裔太史孫高步青雲應易得
胡爲學富身逾窘逆旅棲棲困衣食僕也嶽嶽潦倒人
相逢灑淚金臺側即今時下求賢詔塌翼風塵無氣力
鐵簫兮鐵簫爾能吹開萬里之浮雲白日照耀毫芒分
明堂清廟奏韶濩徹續一聲聞 聖君

澄觀公和詩慰留疊前韻

漸老花枯管知無柳染衫一詩開暖谷百計緩秋帆寫
恨桓伊笛謀生杜甫鏡東園絲竹地終侍謝公巖

酬黃石牧太史枉贈四絕句次原韻

賈鄭周官毛鄭詩寒窗屈首不求知偶携敝帚燕臺下
元宴先生許左思

交態浮雲逐日生花開花落幾枯榮常逢二到不相識
劉峻猶懷任昉情

會稽老守今詞伯玉雪襟期冰雪文一自桂林迴棹後
澄波千頃說逢君

會稽老守
謂家水菴

隱侯家學更誰雙一寸筵將萬石撞祗以少時鄉曲愛
欲通勺水滙長江

隱侯謂
沈敬亭

酬姚魯思太史枉題中州所製青綃樂府四絕

句次原韻

廣寒無路鵲無枝散誕浮踪只自痴驅馬孝王園外過
凌雲氣盡少雄詞
郵亭落葉旅情多浣壁頻遭候吏訶那曉仙班競傳看
濁河原不隔天河
北宋詞高未極工渡江白石啓江東汴京遺蹟閒題徧
調落吳興一卷中
中原逐鹿古今爭七子徒留鄴下名慷慨吟成聲激越
洛波風起嶽雲生

贈王忠安選鈞

官邸時尋訴客棕深談猶見故情濃昔隨閩嶠同昆弟
今上燕臺判蠖龍九萬遙程君忽到三千弱水我何從

征車欲發施金柅未許南還作老農

後遊仙絕句示薌林雲壻行表漢忠

水木煙霞未盡非重來仙犬吠人衣玉真休怪難尋覓
自是劉郎不合歸

桃花迷路不如初盼斷仙邨桑竹居可是高人劉子驥
窮源偏遜武陵漁

不見耕煙舊日龍朱霞碧靄鑠重重瑤花一霎風吹盡
高處青葱長瓦松

石臺方罨草爲茵袖手旁窺局勢新落子未停西日趁
暗憐身是爛柯人

次原韻酬陳大樹滋枉贈古詩五首

陸離窺寶肆光燄啓文府卓卓陳子昂高唱誰爲伍恍
獲千明珠那羨五色組我將霧隱豹君以風從虎徘徊
岐路間灑翰寫肝腑

寸心四海通何必定相識及其相識時歡愛自逾格淡
泊有同音苑枯無異色覲此君子交萬慮一時釋勗哉
崇明德沒齒庶勿斃

敦槃杳無會邾莒相侵分漁洋一以歿誰能襲遺芬憑
高試展眺泰岱橫長雲携手叩幽宮側耳庶有聞相與
棄俗尚毋爲異志紛

少愛山水音常伴林間鹿適性以自藏寤歌在邁軸一
出成小草塵埃空眯目逝將捨茲去行矣何妨獨日誦

清風篇儼隨賢者躅

裊裊空中雲萬變亦何常吾兄士林愛半與身淪亾荷
蒙金石交宿草銜悲傷東流少還波西墜無迴陽感我
骨月痛滴淚申此章

再贈王忠安選鈞兼示姚魯思姜賦山俞尹思

三太史

落拓京華白髮侵青雲不改歲寒心武陵薦友常携賦
伯玉逢人漫碎琴愁重五更難伏枕感多三歎易沾襟
玉河咫尺金門啓碧宇層層未抵深

宮庶李芝麓先生和余侵字韻詩枉贈疊韻東

謝

道未中充外慕侵故山空養十年心却因 聖主方懸
鐸擬對高賢更鼓琴鬧處每憐逢惡夢靜中猶喜挹清
襟荷公忘分相酬贈寸綆難量大海深

鷓鴣次汜雲韻

錦翼離襟甚羈孤怨客携楚煙香處夢朔雪冷邊迷花
隔黃陵喚鶯猜紫禁棲都官定流品聲價可甘低

驚此南禽瘦輸他塞雁肥趁人求片粒曝羽臥斜暉湘
水空前影蘭皋穩後依縱然行不得風雨也應歸

見子遜詩有江山無太白寥落一千年之句愛
其豪興不減青蓮足成一律贈之

江山無太白寥落一千年不謂於今世猶能逢此賢氣

雄輕紱冕才逸吐雲煙淡蕩求同調滄洲興渺然

示沈進士芝岡用鼉補之廖正一贈答詩韻

京國何人開笑口懷家夜夜看珠斗千門如市一門關
擬趁秋風挂席還身羈薊北黃埃裏心在江南紅樹間
飛飛野鶴排雲上鶴背飄飄暗矜賞執袂已荷相公情
故人至自長沙城欲留半死枯松樹再伴三春桃李榮
金殿臚聲掄國士琅琅三策無如子眼常遭白我方窮
眉乍添黃君有喜自分麤才遇合難囊琴塵滿不須彈
鄉路千盤容易到天門一步何由攀明年四月櫻桃熟
簾閣新陰守故山

贈明史館胡大襲參一百三十韻

明祖起濠上仗劍臨八荒一揮元命訖再揮羣雄亾真人固天助亦由得士昌劉公侍帷幄神算猶子房青巖與金華文學何鏘鏘虎將況麻列冠之以徐常捷伐吳楚寇其易如割羊武定師懸橐坐治開明堂禮樂叔孫制律邁蕭何章誅夷或稍過國勢益以張惜哉青宮天太孫繼垂裳仁懦弗克荷乃削諸侯王鼉錯豈無見似不同齊黃事敗禍歸君奔竄思逃藏所嗟方景鐵滅族夸一鄉燕邸洵龍種被迫心恐惶坐中紫袿裳奮臂起贊襄白帽手親奉黃瓦徵其祥張李忠且壯桓桓復洸洸長興誠宿將一敗萬卒僵景隆乳臭兒瑟縮焉能當白溝大喪師遂致金川降冕旒化灰燼或云易僧裝遜

國實疑牘靖難開靈長瘡痍待煦嫗相業來三楊本固雄心生拓地西北方幕南竟空庭天低草茫茫崩於榆木川車載殊輻涼威德既遠播奕世貽謀臧仁宣蒙故業昇平頌洋洋不異漢文景民氣何樂康英宗循祖制巡邊越巖疆宵小豈足倚乃致土木殃龍章遭挫辱神器幾皴黻烈烈于少保忠智定搶攘吾國已有君謀宋策果良公之輔景帝師古非自創金繒敵計沮車駕還上皇錮宮非不爭事秘語不彰七載得無恙幸公握其綱天意在復辟大物未淪喪奪門亦何功讒夫肆披猖朝衣赴東市沈寃至今傷憲宗嗣大寶庸暗須扶匡乃更寵奄豎潰壞如決防泰陵寶英主勤政親縹緗文治

翼嘉運羣儒何煒煌茶陵執魁柄著述兼宋唐何李起
拔幟駿足齊高驤文摩屈宋壘詩壓韓杜墻厥後相俎
豆得失未足詳治久伏禍亂國事如劇場天子稱將軍
魚服戒已忘佞倖逞奸膽忠直輸烈腸予杖百七人遠
謫同夜郎侃侃汪泗州屁股血尚瘡徵女進陋婦入宮
授蠶桑親籓蓄異志雄臂非猶螳伯安扼其衝幸獲此
保障縛賊反見誚彬寧何愚狂邗酒供御膳野花沾異
香淫縱絕皇嗣主鼎將誰望新都定大策支流續天潢
世廟本聰睿偏任無劬勩當時議大禮紛紛沸蜩蟬往
事觀漢宋於禮未盡妨稱帝竝七廟列宗相抗行永嘉
巧迎合踰制定始倡獲罪在萬世應難托歐陽流禍及

祀典經師半摧戕殘刻啓大憝台座登虎狼分宜虐朝
士忠良血滂滂陽合而陰伎文貞伺其旁一言誅孽子
餓死無餘糧時方號中興兩姦爲棟梁詎免盛治累孰
云帝道光穆宗衍其脉歲時頗豐穰未克稱幹蠱聊可
承蒸嘗定陵英武姿側席開天閭冲齡仰元輔意在高
翱翔江陵擅才器而性或稍剛中樞吳尚書外閫寄南
塘功在中外安如馬能服箱縱無調良德千里殊昂昂
奪情誠大節掎擊何雷礮身歿毀其巢公道虧巖廊致
傷任事氣才臣淚浪浪遂釀養癰疾頽廢成膏盲吾家
太傅公入告多拜颺是時爭國本伏蒲陳御床山陰去
則已公疏盈一囊秘如溫室樹久韞不暫揚耿耿留此

心默默對彼蒼光宗堯舜主德音何琅琅意長日月促
四海泣嗶嗶手提藐藐孤付托心仿徨甫節結聖姚權
勢歸貂璫毒流於播紳忠臣盡銀鐺人亾邦國殄有識
戒履霜挺挺莊烈帝投袂起慨慷遽捽奸奄首獨斷非
衆商清琴奏時雍曲終淚縱橫內賊雖已除流寇日益
強梟戮我人民瓜裂我金湯朝堂但朋黨將帥多鼠麀
悠悠復泄泄闕下羅旗槍抱憤殉社稷委身懸海棠勲
戚有劉鞏侍臣如范汪恩養三百年聊以一死償彼哉
復何人拜賊頭低搶三綱旣淪斃大運城復隍我清
行弔伐乃命尚父姜王師震雷霆刃殲賊肱拯民出
水火御寓朝未央江左暨閩浙餘閨不自量區區史瞿
輩不救嬰兒殤國滅史不滅橫雲啓書倉夙奉
聖祖命排纂何遑遑辛勤四十載書成髮蒼蒼
聖心特慎重再敕加端相虎觀足燕許麟臺集珪璋椽
筆共濡染彪炳相頡頏吾友劒在匣芙蓉初試鋌脫身
賢書中凌跨乘仙航柱下有此士選木得大杗史才寔
所難截玉宜截肪决裂編年體班馬爲濫觴矧彼穢雜
書於道猶粃糠來者恐難誣後生舌如簧獲麟希聖作
子其可不夔

題楊三笠乘江天一笠圖次韻

江雲漠漠江樹紅蘭漿劃波如劃空好是建康山影裏
玉龍嘘起打魚風

再次韻題疊紅吟卷後

百篇新句盡吟紅
千古詩才眼底空
繙到夜深愁燭盡
一痕殘焰手遮風

題姚四心求采蓴圖

少年身落湖山中
兩點洞庭煙水通
阿儂時泛如梭艇
親煮蓴羹延釣翁

為桐城方十九引除題載書圖

引除為密之先生之孫北素先生之子

忠以明臣心孝以盡子職
孝復繼孝後畫裏孤舟色
載父之書侍父同千秋
祖德父書中誰將片紙傳
三世烏鳥盤旋鵲血紅

題金粟道人玉山名勝集

遺文開掩客燈前
賓主風流四百年
今夜玉山歸夢遠
寒烏無樹繞平田

古詩三首答子遜

肅肅雁羽霜莽莽馬尾塵
金臺挂寒月照骨淒我神
引領瞻故鄉曰歸當及辰
欲發屢自止待我心所親
所親未相識跡疎道為隣
十年懷密欵一見意已申
握手各驚歎俱是蒼顏人
齒髮向衰老文章空賤貧
已矣莫復道志士多苦辛

昔我有阿兄登朝涉清班
五十始通籍深知遇合艱
風塵覲才彥愛敬重於山
脫裘換美酒留賓常閉關
一長劇推獎時置口頰間
況君天下士吟唱日往還
服膺固

所宜寄書命追攀見君兄已歿新月十二彎雲霄有要
路突兀無由扳窮塵話疇昔酸辛涕潺湲

荷君激勸意與君慷慨歌賤子少年日盛氣羞媿嬰張
眸視八極高嘯遺世羅酌援北斗柄醉弄天孫梭意謂
帝鄉近攀翻桂婆娑流光忽荏苒壯志竟蹉跎垂暮兩
之京望闕空巍峩塵埃感徒步同學盡鳴珂閱世味已
少還鄉興偏多冰雪淨我腸委懷在岩阿榮名縱堪娛
奈彼白雲何

寄孫雲含

孫郎雄才壓羣彥長句天矯凌韓蘇江河浩浩來萬里
素扇簇簇銀鈎書我初見之心已折逢人歎詫驚座隅

自開小篋看殘稿徑欲付火藏虛無況子高文儷秦漢
上追賈董懷良圖天門誅蕩引豪俊乃胡爲者猶泥
塗風吹塵霾障眼暗白晝不覩光明珠聞鐘誤投蕭寺
飯當關羞謁蒼頭奴南宮先生識寶氣爲施鐵網收珊
瑚牢扃玉匣重拂拭榮光夜夜騰天衢席上珪璋應特
達一策歸釣有潛夫

南宮謂虞山先生

題涼曝圖二首

并引

家檢討秋涯相國西田公之猶子也綜練而淡於宦情高簡而諳於時務跌宕而篤於天性故甫通籍而遽辭簪筆既長休而猶侍圍碁蓋館選於壬辰授職於癸巳而甲午即歸乙未以編纂春秋再至自此棲遲京邸遂及十年所履者非出非處之地所謀者亦家亦國之間若其孜孜嗜古固情之所鍾亦意有所托非余所能盡知矣壬寅夏日公退朝之暇曝書畫於庭秋涯從旁展翫若將有所請者公隨以范文穆朱子趙承旨墨蹟畀之秋涯喜動顏色退而思張其事乃屬徐子采若用蘇長公詩意繪涼曝圖於前而裝界三家

之書於後一日余請觀之秋涯以韻語見屬余惟古者兄弟之子與伯父叔父直稱父子蓋天屬之最親者秋涯少孤公愛憐之特甚當乙未之再入都也公甚欲其留而後以其超然榮利之外未可以此意數數言也而秋涯遂默窺之而不忍去昔漢疏傳之婦有兄子受隨之以婦共享賜金之樂晉謝公之出有兄子元隨之以出共成破敵之功今公致政而未得遽歸秋涯謝職已久屢欲去而重傷公意猶依依於此較之疏氏之受謝氏之元所處為尤不可及非孝弟根心烏能仰體公於神明之際若是哉余孤愚疎屬少習於秋涯而兼辱公之知因觀此卷而言其父子之慈愛順承者如此而系之以詩

玉堂仙客罷然藜
滯跡京華憶舊棲
海外畢鸞辭禁樹
雨中良馬惜障泥
煙霞癖待他時了
翰墨緣從宿習締
誰解十年羈旅意
問紅空擬榜花溪
上台明處侍文星
兩阮於今總典型
未置故鄉疏傅酒
尚留玉樹謝公庭
蕭閒偶爾貽三帖
鄭重何殊授一經
涼曝圖中無限意
好傳佳話在丹青

送秋涯檢討南還四絕

五十飄飄此賤身
孤雲無意入風塵
別君幾度書驢券
今日翻為送別人

十年君已擲瑤簪
去住低徊兩不堪
明日片帆揚子渡
杏花春雨認江南

報國墳荒兩地同
荷戈持糗各從戎
春明門外傷心淚
公子牽裾夕照中

上三語謂宮端副使今送檢討出國門者毓燕兄弟也

人看君面歸應喜
我識君心去欲遲
茅店一燈迴首夜
白頭東閣不眠時

次韻和陸香林看花絕句

松花寂歷不禁憐
常在寒雲冷澗邊
惟有金臺三月柳

颺空狂絮撲春煙

草色青青曉露輕天公枉作一春晴北枝寒重無梅信
賸有啁啾翠羽聲

爭賞薦然日及花玉壺春酒萬人賒不知涼照秋風裏
誰爲霜林晚駐車

翦綵爲花樹樹新莫分誰假更誰真依稀暗裏幽蘭氣
草草重經一度春

題畫梅

雪蕤冰蘂度春暉紅綻和鹽樹樹肥只有一枝如靜女
玉龍吹斷不曾飛

經香像菴遺址弔烈尼鳳姑

綠楊絲軟絳桃殘有美如雲興未闌畫馬春風游冶處
何人知拜鳳姑棺

桂軒太史服闕還朝意欲索余文以爲贈憐

余病不能作屬題二十字小詩勉賦以應之
大事君無憾抒忠又一時莫耽文苑傳但草侍臣詞

雨窗雜書示潁山素威兩姪

擬賒隣店新篘酒閒向西窗好論詩秋雨秋風太無賴
小樓銀杏葉黃時

瓶中白菊殘枝瘦几上黃團帶葉肥縱使粟空炊欲斷
煮茶猶有碧煙飛

暗憐白恰車塵滿回首青雲雁足踈獨有高人寄相憶

包山長句笠峰書

桂軒書猗蘭操一篇見贈作詩報之

澄波浸巉巖鄙性清以峭出攬天下士誰歟是同調惟
子貴不驕自處十年少屈身謬相推肝膽白雪照念我
雨中飢古意發潛耀龍蛇走混茫落墨何精妙寫贈猗
蘭篇于以慰屠釣

幽蘭無人採揚揚復猗猗祇厖蕭艾懼豈作紉佩思國
香苟不改遲暮其何悲空谷長已矣當門子宜知熒熒
陵苕華裊裊高樹枝驚飈一以起弱蔓已先萎固窮在
自守緣物者多危

壽西田公八十

首春始七日厥惟生人祥是日號靈辰篤生多俊良我
公自嶽降適選時運昌童牙紛鳳彩五色備文章一鳴
百鳥廢蓬山恣迴翔玉立美風度和聲叶宮商安恬罕
超競撝謙戒飛揚洊歷六官長優游贊巖廊率屬勤以
慎供職精而詳崇深符蓄蘊遂膺蒼生望卜占金甌吉
車碾沙堤香十年作元老密勿資勛為德在不見但
見調陰陽遐舉慕黃綺世美同表揚顧家計則短報國
心甚長丹忱積炯炯白髮深蒼蒼知臣莫若君烈日明
秋霜迴瞻景陵松攬涕增彷徨勢替道逾隆身隱名
益彰勿云春秋高礪溪方釣璜

冰菴太守八十壽

功名嗤薄朱翁子典籍紛綸井大春冰雪襟期違此世
東南風雅寄斯人白鬚紅頰菁華滿傍菊依松氣味真
三老蒲輪應致養門生載酒醉江濱

哭族孫仲齡

棘刺常滿眼松柏不必老天心竟難知萬事有顛倒以
子淑粹姿辭世一何早子生於世閱紈綺習盡掃幼得
父母懽孝友自襁褓玩弄百不愛娉修以為寶律身儉
且恭遇事默探討出口或期期在心恒了了聰穎含渾
厚相法宜壽考憶昔象勺年從余共昏曉端坐誦墳典
學文如學道竊愧章句儒無能進深窈別子就四方十
載髮皓皓憐余窮且衰頻來慰枯槁觀子神色間慘沮
出中抱豈意衰者存而子忽云歿痛淚緣睫流悲腸日
迴繞閉門謝少年一尺庭中草

寄園文讌

得十
二侵

設醴芳園碧樹深繁音消歇奏清琴一聲好鳥相求意
千載名山共此心莫以文章誇藝苑須留經術在儒林
慚子寂寞漳濱卧豈有雲亭誤爾尋

寄懷格菴禪師

一樹青梅未熟天新陰簾閣思悠然逆風不隔香方異
離舌能嘗味始全無本愛吟搜險句維摩多病悅幽禪
擬過蕭寺同休夏佛火珠龕了靜緣

秋影軒觀荷

得五
微

清池菡萏映朝暉，屢滿郊園入徑微。潔到禪心敷作座，閒供騷客集爲衣。游魚戲影驚風沒，水鳥穿香帶雨飛。醉看紛紅兼駭綠，晚涼晴月照人歸。

秋影軒即景

消暑快風梳骨，抨窗驟雨翻泉池。上倚晴幽客林中，抱濕吟蟬。

感題二首

一年蝸舍息勞形，昔夢多消貝葉經。偶檢玉京酬贈句，

文星落到第三星。

謂毘陵陳秋田比部淮上王隆川義興儲汜雲兩進士也

二老風流嘆已亾，典刑終自在吾鄉。試看古桂殘花盡，

猶作空庭十日香。

謂東江師與家水菴太守

包山山人携見懷詩過訪次韻酬之

深掩園扉木葉零，蕭蕭華髮對秋庭。已甘文采淪空竈，不惜年光似迅霆。斜日甌香炊玉粒，微風窗靜展金經。相思賸有湖山客，淨履新篇過草亭。

小樓晚眺

硯北勞勞百未成，閑中凭檻適幽情。淡雲時露暮天碧，孤鳥忽棲秋樹明。

贈鍊師中隱子

中隱何妨踏市塵，飄然高岼紫荷巾。未須石室金庭杳，一寸珠光守谷神。

朝開珠笈暮琅函，家有修真杏子衫。莫與樊孃輕試術，

金盤紅鯉獺能銜

雲邊高臥月邊鋤予亦人間暫謫居常欲笈天無處寄
青藤煩爾作朱書

乞來佳句袖中隨索我羚羊挂角時底事西華藥書滿
紫雲猶誦俗人詩

秋日漫成

移竹夜聞雨罨窗秋見花蕭閒諸境寂虛曠一心遐爐
息無縈篆樽空祗對茶猶嫌麤識字吟諷作生涯

寄外弟山中

老樹邨中紅葉斑白鷗磯畔蓼花殷扁舟未得汎湖去
七十二峰朝暮閒

次韻寄答笠峰山人

澄湖洗眼淨高雲盪胸寬棲山景物曠伸眉何繇攢秋
晚歲功畢井稅輸已安酣歌邨社酒寧知行路難吾友
洵夷懌余亦終泥蟠結葉可爲衣劬蔬可爲餐生死同
晝夜萬事焉足歎

秋涯檢討齋觀崑山石歌

蓬瀛仙人秋涯子拋却蓬瀛反鄉里空齋無事亦無言
終日支頤憑淨几誰贈崑邱一片雲靈竒縹緲移於此
陂陀宛轉巖巒峻鬼斧無痕斲天髓菖蒲不老生九節
高下丰茸青猗靡素甕白圓如滿月浸以澄波山在水
秋涯子對之心劇喜忽然好事同少年置酒延賓張厥

美在此位者宜爲辭酒酣有客高歌起秋涯子君胡爲
兮賦歸來漱石枕流良有以海蜃青紅頃刻銷山暈彩
翠須臾委一泓清淺鎮悠悠一拳峻嶒長齒齒已焉哉
塵中何處著神仙蓬島瀛洲此間是噫吁噫吾知之矣
次韻答寄桂軒太史
自與東陽別論交向古尋青雲遮曉夢黃葉冷秋心近
學蓮華偈兼無梁甫吟故人有高唱知我一何深

疊韻寄懷陳大樹滋

我憶陳夫子清容合眼尋高空雲比跡太古雪爲心可
有吳山夢聊添洛下吟何時重握手殘燭話宵深

疊韻寄懷許二子遜

許子今人傑喬柯一萬尋十年推義膽百折鍊雄心文
擬龍門筆詩齊太白吟丈夫期不朽責世未須深

疊韻寄懷繆文子武子兩編修

二繆郊祁侶窮交每過尋屢沽燕市酒皆有鮑生心秉
筆同鑾直鳴珂竝轡吟應思荷蓑者蘆葦釣船深

代中隱子轉索愚千贈句

蕙帶先生名進士破屋忍飢危坐時何許道人不解事
打門風雨乞題詩

秋圃言懷

涇東小圃纔半畝環呂寒潭清瀏瀏冬青子熟雀銜時
烏柏葉丹鴉宿後疎疎桑竹暎籬門藹藹桂桐當戶牖

黃垂瓜蔓斷猶餘紫挂豆花開獨久水晶簪卓尖者葱
書帶草鋪肥是韭秋茄蒂苦懸未摘晚菘甲脆挑還有
先生燒硯鎮常閒日日繞畦千匝走東偏銀杏道家誰
南隣红柿園丁某偶生幽興思佳會好事難成但低首
重陽已近風雨晴早晚菊香須釀酒苔階綠錢豈蚨母
荔墻古字惟蚪蚪笑板山妻頭上釵買秫可能盈一斗

雜書六言十二絕

懶任塵昏匣鏡近來老至不知偶然清溪濯足照見雙
鬢新絲
乍說東隣拆屋又聞西舍鬻田儂家別無故業有文那
值一錢

犬瘦酬功乏食貓飢欲去無魚主人一月斷酒吻渴不
觀漢書

全家衣穿履破轉眼露冷霜繁賒得隣機匹布商量與
誰作禪

左氏女初學繡於陵婦正辟纊獨我灌園餘暇北窗高
枕爲娛

一夜颶風驟起海田又被秋潮莫道干卿甚事墻陰吹
折芭蕉

悄悄螿蛄啼月悽悽蟋蟀吟風晚立枸椽樹底清歌攬
入秋蟲

斲上碧螯銜稻網中黃雀披綿休問水鄉風物寒菹嚼

響清圓

黃面禪僧索偈青袍道士求詩更有山居弟子報言綠
橘甜時

落葉晚風颯颯敲簷曉雨淙淙自檢簾中故紙新寒補
却西窗

有客來談北事先生隱几無言蛺蝶隨風高下花香多
處翩翩

天外飛來長劒眼中截去空華好把柴扉掩上呼兒拾
葉煎茶

摘豆

籬豆裊長蔓竹尾何翛然步園親試手扳摘斜暉前涼

葉紛紛冉冉幽花墮翩翩夜窗對兒女明燈方未眠

古意

庭前雙桂樹一花一不花有花人盡賞無花日誰加無
花枝葉全有花攀折多有花與無花得失竟如何

秋日過愚干齋觀文石取揀存數枚以歸賦謝

三十韻

君子吾石交自幼至衰老雖已分龍豬而不異枯槁秋
令方刻削金天司太皞敞縕當涼風敗屨踐衰草乘閒
偶過之談諧展襟抱忽覩几案間五色燦文藻盆盎羅
衆石清泉浸汪浩或明如摩尼或鮮如瑪瑙或綠如貓
睛或碧如魚腦圓者若畫卵墮者若仙棗合美若婚媾

小山詩集卷四
九
鬪豔若嫉媚陸離傍芸帙光燄射蘭橈云從閩豫遊掇
拾親滌澡秘惜無時離壓囊隨遠道歸來閉門坐對此
忘昏早拔尤比得賢收穀還棄藁席珍固已多韞櫝尚
不少昔余獲燕石兩三恒自保祗足供胡盧詎堪樹旗
纛匪敢奪所愛分餘竊心禱遂命出大甕銅盤試傾倒
磊磊復硜硜落落兼皓皓廉取懷其八手捧返蓬葆啓
窗細摩挲頑樸含淳顯叅置宿所留妍醜勿深討聃非
可同傳牛驥宜共阜萬物美惡殊一一出洪造美者物
之病見美意應埽惟其無可悅適以成至寶再拜謝君
子識之永爲好

重陽日候雙粟閒步

九月九日天半晴期君携手作閒行有時疎雨一兩點
高送遠鐘三五聲何處黃花綻籬落誰家紅樹陰茶鐺
須將逸興酬佳節峴首徒思後代名

諭貓三十韻

家乏倉箱儲得粟貯餅缶雖鼠其奈何穿屋復窺牖叢
殘架上書嚼裂作淵藪所以畜汝貓盼汝爲防守裏鹽
以償值麤飯聊相誘微功固足錄薄酬未能厚主人食
無魚烹葵啖乾糗安得市上鮮止汝饞涎瀏意嫌主人
貧遷怒乃及狗主人方食時側目坐於右瞰案無腥臊
高叫昂其首狗亦緣飢來尾若搖風柳汝輒張汝牙直
前欲驅走此狗頗有知念汝是儕偶枵腹明退讓帖耳

忍暴吼矮柵一母雞啄蟲升土阜望此或生卵庶可配
以韭差爲近肉味當用進白酒何汝乃飼隙伸爪攫其
後毛稀半脫落背禿如禿叟畏汝常伏窠骨細嬰兒拇
汝處雞狗間曲直吾自剖汝性剛且貪戒汝將無狃大
地同一飢無食者十九側聞簪纓胄又或著作手二黼
且不給旦暮糴升斗區區汝微生而思飫厥口主人誤
儒冠卷軸棄已久一子不教讀待令治田畝破書任鼠
銜於汝亦何有

花下醉吟

濁酒一杯花一株涼蟾如玉露如珠爲問幾人能白髮
奈爾飛騰金翅鳥

無隱林桂花下小飲用前韻

無隱林中四十株疎疎密密黃螺珠清絃小語隨莽蒼
一醉月明啼夜鳥

題式玉詩卷

馬糞諸郎第一流人如叔寶善言愁秋風一笛梅花怨
吹亂禪心散未收

過吳氏溪亭觀木芙蓉

散人無定踪來坐閒亭子涼翠抱幽林朱霞冒秋水
南溪憶舊

四月紫藤垂六月紅藕花春梅與秋桂時飲南溪家
十年別南溪偶過問鄰里此屋易姓多不知今誰氏

南圃憶舊

南圃多芙蓉疑是芙蓉城曾訂桃源約於此祀淵明諸公紛游宦游宦半已返不見芙蓉主低回夕陽晚

暮秋偕雙粟散步東城作

閒居罕人事高秋白雲斂爰携同懷子野步辭拘檢道遙東城阿畦蔬紛荏萼紫菊笑踈籬綠雲映低广清溪漾文波芙蓉發涼燄時逢植杖翁兼坐殘僧簞境因幽輒留心以空自貶盤桓羲馭傾言歸粲星點

過香濤弟潭影軒觀東莊作畫

微陰淡照雨兼晴閑探幽人午夢輕黃葉一林溪舍冷捲簾畫裏看雲生

竹杪斜陽冉冉徂忘機靜對侶水壺慄然陡覺秋衣薄正寫寒峰雪霽圖

蒼巖磽秃潤煙霏摹搨山樵已入微何處匠心猶未愜任儂笑卷衷携歸

園林旣擅蕭疎景賓主還逢曠逸人留我閒吟伴皴染菊花新釀恰清醇

題愚千顧烈婦詩後

袁江流繼廬江作鼎峙茲篇後定無莫怪士衡驚輟筆左思先已賦三都

示少川禪師

千尺垂絲向碧潭離鈎三寸任君叅淮雲寺畔蕭蕭木

何似深林鑿隱菴

少川枉酬四偈依數重題却寄

靈苗養就摩耶腹桂樹曇華次第探剗草一經初祖地
橫挑日月下江南

曹溪四葉到雲巖滴滴泉香可療饒重見洞山行獨木
寶珠光露石人衫

北禪上刹繼元燈聚石生公講座興解道闡提皆佛性
背經僧是識經僧

道吾偶過鶴林寺一笑婆心引夾山我學淨名方默坐
法雲何意落柴關

師卓錫淮雲意在接引海寧至公故有夾山之句

為甘泉員外題蒼山紫塞及杏花時節在江南

兩畫冊

用玉停韻

奉使東行異粵裝亂山圍塞儘蒼涼袖中祇有當歸草
不染三楹五葉香

九重親敕理歸裝拜覲椿庭白髮涼二月今年寒未退
杏梢紅萼尚含香

次原韻奉酬西田公枉招北上之作

白雲未補衲衣裝東閣飛書到石牀蒙指卻說明月路
優曇華紋桂枝香

暮冬即事

書卷非恒業年荒值歲闌凍鷗盤樹杪飢雀啣簷端拾
葉供朝爨春糠作晚餐放歌聊一寫不學乞人寒

冉冉空衰老
硜硜守固窮
清吟猶自愛
高卧亦稱雄
但似黔婁餓
何須主父功
由來天下士
多在布衣中

對酒
對酒當歌

大風蕭蕭
西田公孫
士之

杏林
杏林

大重
二月
今
平
寒
未
盡

不
三
葉
香

本
對
東
山
圍
塞
盡
蒼
涼
中
蘇
育
當
龍
草

兩
畫
冊



